

Лука мейо Рохеллис Хабар (Иса авараглис хабар)

1 къаьм

Байбикил

¹⁻² Илоъ э^Ндо йахъийо шинаб жо, аь^Нйд-
дакъа бехъхъа йегайана Каламлил хъул-
лухъ богъцалана йе^Нйагъийа хабалла чāхал
муьхобальна зукъойо тели аьдамла. ³ Ва-
гъальльобза, муьгъканлъилаъ вагъальос ни-
сол-илена, гъихъхъалакъа къацIцIо йахъийа
жойлас дул чахал гъоькмо бахъийо диена,
гъуьрмат къоддас Теофил, ⁴дул малъзи
йойо шинаб жо гъаькъкъаб гаьгъийакъа
дибо йако йо^Нкъальгъа.

Закариял Рохеллис Хабар тухъийо

⁵ Гьерод Ягъудиялиъ ханлъилаъ гаъгъийа замаллиъ, зукъона гей Абия тухумлис* Закариял^о нисокас гъо^нс кашиш. Гъолцос ахъона зукъойо Гъарун авараглила наслолас аьдам. Гъольльос ца^нна зукъойо Элисабет. ⁶ Гъоллѳл кьонана зувакьона Аллагълис мацова валийа. БетІергъаллис къацІцІо амрона, муьмин-лагъликъа тІаддаб жона йакІо нилІна йовагъийо гъолло. ⁷ Амма гъоллос кьова зувакъеэш. Элисабет зукъона кьова бāхъаъкас аьдам. Гъоллѳл кьонана зувакьона мех мекъейā сукІоба.

⁸ Гъо^нс водолалъ Закария, гъидела тухумликъа ирга мокъоль, Аллагълил хъуллухъ богъкас зукъойо. ⁹ Кашишлāла аьдатликъа гъолцокъа цІула йо^нкьойо БетІергъаллила билІоъ э^нкъена маьгъ нийā бохāс готІ мейал. ¹⁰ Вагъли йогъцалаъ, гисда гаъгъийа къацІцІола аьдамлā какла йовагъийо. ¹¹ Вагъальльо мехлаъ Закариял эгāл итІилло Бичаслис малаик. Малаик эчейо маьгъ нийā бохāс готІ богъцала хирияб мицала кІетІакъала рахълиъдā. ¹² Гъули эгаль, Закария

* 1:5 Кашишлās гъо^нсцойс тухум.

гъаьгъелъна гъихлъойо ва йилІа гъи^НчІейо.

¹³ Малаикли гъолцохъа нисойо:

– Ми гъицІакъа Закария, Аллагълил дибо гъари-доъа тухъийо. Дибол ахъхъа, Элисабети, дул оъжо ѳс. Ягъя гула ми оъждикъа цā^Нна. ¹⁴ Дул талигъна рохелна бахъца, тели аьдамла рази бāхъца гъули ахъийакъа, ¹⁵ судло нисода БетІергъаллидой аь^Нйдā гъули къоддās ахъца. Гъолцо гъинона чІаъана хулāъас. Ийола о^Нхаъзу Илагъияб Ругълис оцца. ¹⁶ Израиллис телидās аьдамла гъолцо гъидела БетІергъан Аллагълильдā муъвахолча. ¹⁷ Иляс авараглислъийо къудратна гъаьл-кІолъина бахъна о^Нкъос гъули Гъокцогъа аь^Нйдā: ийо-абосна къовасна сидил-гъо^Нсо йакІодана йуь^Нвахолал, Аллагъликъа мутІиъ бахъаьцасна муъмиллāла гъинолкъа мокъолал, Къоддās о^Нкъольол халкъ гъаьдур бовал.

¹⁸ Закария малаиклихъа нисолло:

– Лъинкъад дил вагъли йикъеш? Дона ицлолъна гей, дие ахъона мех мекъейо аьдам гей.

¹⁹⁻²⁰ Малаикли гъолцол жаваб нилІийо:

– До гей Аллагълидой аь^Нйдā гаьгъийо Жабраил. Гъолцо э^Нгъна гей дұхъа икъла-шанна рохел нисанна. Гъинила замаллиъ йахъцала до нисова йаьжлāкъа божаьаль,

гъуна же дул йикъе, дибо йаъже йохца, дѹхъа гьѡѡшѡна нисона йахъаъас, до нисойо жо йахъцал.

²¹ Вагъальлъѡ мехлаъ халкъ гисдѧ гуваба-
цѡна бечена зукъойо Закария о^Нкъаллахъа.
Суле Аллагълила билѡѡѡс гиса говаъас-
лѡна гъикмат бѧхъна зувакъойо гьоллѡл.
²² Гиса о^Нкъоль, Закария халкъилахъа икъ-
лашена ахъеэш. Гьоглол биджи йахъийо
Аллагълила билѡѡ гьолцол Аллагъли ил-
гъам* гуллолъи. Гьольлъѡгъа муьгъаттѧ
гьоглохъа кѡдѧд ишан богъна икълашейо;
Закария йаъже йохна гъихлъойо. ²³ Аллагъ-
лила билѡѡ хъуллухъ богъцас водбо йова-
лъоль, Закария билѡгъа э^Нкъейо.

²⁴ Ласона гаьчѧел гьолцѡс ахъѡ Элисабет
о^Нх гаьгъийо йахъийо. Лъина боѡо мекъе-
цал, гьѡго аьдамлѧъ гисакеш. ²⁵ Гьоглѡ
нисос зукъойо:

– Гъуна, вагълѧ йогъна гей Къоддѧла Бе-
тѧергъалли, вагъалло водлѧъ дѧхъа гъаьй
йе^Нхелло аьдамлѧъ э^Ндо дѧкъас рогъона
больонна**.

* 1:22 Илгъам – Аллагъли тухъал (йикъал) йитѧилло
йаъже.

** 1:25 Аллагъли цѡб гулечѧе къова бѧхъаъаль, ийо-
лѧкъа рогъѡ мокъѡс зукъона.

*Жабраил малаикли
Мариянхъа Рохеллис Хабар нисос*

²⁶ Илънасла бицоъ Галилейлила Назарет шагъарбаъ, ²⁷ Давудила наслолала Усуплю нисойо сукІол йо^Н къал гъаьдур йойо киббадой Аллагъли Жабраил малаик э^Нш. Гьольльо киббасна ца^Н зукъойо Мариян. ²⁸ Малаикли э^Н докна нисос:

– Рази йахъ, Аллагълис баркат михъойо! БетІергъан Аллагъ дугъой гей.

²⁹ Нисова жойлакъа гъайран йахъна гъихльойо гьоло, вагъло сийо саламди бахъал нуцІослю нисона.

³⁰ – ГъицІакъа Мариян, – лІо нисойо малаикли гьольльохъа, – Бичаслис рагъмат михъойо дул, ³¹ Гъуна, ми о^Нх гаьгъийона йахъна дул оьжо ахъца. Иса гула Гьолцокъа ца^Нна. ³² Ца^Н йе^Нкъейо сукІо ахъца Гьолцокъа. Кьоддалас ОьжолІо нисас Гьолцохъа. БетІергъан Аллагъли Гъули Давудила – гъинила абола* – тахликъа** голца. ³³ Гъули ахъца нитоназу Якъубила халкъилал пачалъилаъ, ханлъина гьолцос гьо^Нсна йолъаъас.

* 1:32 Гьолцола наслолас або Давуд авараг зукъойо.

** 1:32 Тах – ханлъилас кьō (трон).

³⁴ Марияни малаиклихъа нисолло:

– Ахъо ѓе^Нкъешла дил нигъад вагъли ахъца?

³⁵ Малаикли жаваб богъна нисос:

– Илагъияб Ругъ мокъос дукъа. Къоддалала гъаьлкІолъилас гъидоци ѓахъца дул. Вагъальльобза гъолцо къовахъа илагъиябна Аллагълис ОѓжоналІо нисос. ³⁶ Гъуна, дибо аьгарай, къова бахъаьцаслІо нисоцас Элисабетна, же ицлолъаьлѓ о^Нх гаьгъийо ѓахъийо. Гъолцо къовал илънас боцо гей, ³⁷ Аллагълихъа ѓахъаьцас жо гъоьшѓона гаьа.

³⁸ Бета Марияни нисойо:

– Гъуна, до БетІергъаллис лагъ гей! Ми нисогъа ѓахъала дил.

Бета малаик гъольльодойс оьчойо.

Ахъо-къова Мариян Элисабетила билІоь

³⁹ Лади водлаъас эдеъзи ѓахъна Мариян ѓе^Нкъеш Ягъудиялила маьдаьла улкалиъ гаьгъийа шагъарбаъ. ⁴⁰ Закарияла билІоьна э^Ндокна, гъольльо Элисабетил салам бѓс. ⁴¹ Мариянис салам тухъийоназу, Элисабетила о^Нхаъ гаьгъийо къова лахдас, гъоло Илагъияб Ругълис ѓоцца. ⁴² Бета гъольльо ѓукъо тухъинна нисос:

– Барка дул, Мариян! КъацІцІа ийолѧ̃
э^Ндо же ми баркат михъойо йахъийо. Бар-
кат гаьгъийо гей дибола о^Нхаъас къова.
43 Дйгъа Къоддѧлас ийо дйдой йо^Нкъойо –
нѧсди дил вагъдо баркат! 44 Гъуна, дибо
салам дил тухъийоназу, цІилІона диела
о^Нхаъас къова лахдѧйо. 45 Гъольльокъа бо-
жийо ми гъардараб гей, судлІо нисода
БетІергъалли дѹхъа нисойо жо йахъца.

Мариянис рец-бакълис кечІ

46 Марияни нисойо:

– Диела йакІи БетІергъан къоддѧкІца,

47 ЦІилІона гей дие ругъна диела Аллагъ-
ли тиса багъоцалакъа,

48 СудлІо нисода гъаьй йе^Нхелло гъинила
пакъираб лагъликъа.

Гъуна, дил баркат михъоль желагъа муь-
гъаттѧ къацІцІола агъловѧ̃ дил рец бовас,

49 ГъаьлкІолъи йѳль дил Къудратаб Бе-
тІергъалли.

Гъогцос цѧ^Нна илагъияб гей.

50 Гъинхъа гъийабачІецаала агъло-агълола-
къа раьгъмат гулца.

51 Гъинила кад къуватабла ишла йова-
гъийо.

ЦацакІзи бовагъийо йакІо чІугъарабла аьдамла.

⁵² Гьогцо залимабла – тахлāкъас тІува-тІийо, пакъирабла – кьоддабāкІийо.

⁵³ Нувабаковāl гьолцо кІетІо шинаб жо нилІийо, бечедабла гьоьшшона гаьчІел мец-цабакІийо.

⁵⁴⁻⁵⁵ Гьолцо комак бōйо Израиллила хал-къилал – гъинила лагълāl;

Аллагълил йакІкъа гей илла умумаллил – Ирбагъинил, гьолцола къавмалил абадул-аба-дийаль раьгъмат бовал нисойо кьутІи.

⁵⁶ Гьулиъ лъанальийо боцона багъона, Мариян къāь билІогъа йе^Нкъейо.

Ягъя ахъийо

⁵⁷ Мех мокъоль, Элисабетил оьжо ахъийо.
⁵⁸ Аллагъли букъо гургъел богъна гьольльол оьжо ахъийо тухъльо, гьольльогъой маду-гъаллана аьгарлъина рази бахъийо. ⁵⁹ БелІ-насла водиъ оьждил суннат бовал мокъовā сукІобāl йатІийолІо абокъацей оьждикъана Закария ца^Н гулал*. ⁶⁰ Амма ийо нисойолІо

* 1:59 ЖугьутІаллис аьдат гей оьжо ахъна белІнасла водиъ суннат богъцас; вагъальльо водиъ ца^Н гул-цас аьдатна зукъона гей гьоглІо замаллāь.

оѣждикѣа Ягѣа цѣ^н гулал нуцѣослѣо нисона.
61 Вагѣаллийо цѣ^н гаѣгѣийо сукѣозу гаѣѣа
дибола аѣгарлѣилаѣлѣо нисойолѣо гѣогло
гѣольлѣохѣа. 62 Бета кѣдѣд ишан богѣна
абохѣа нисолло оѣждикѣа нѣйо цѣ^н д гулал
дул ѣацѣалѣо. 63 Гѣо^нс кѣокѣкѣона ѣакѣол-
лина Закария гѣольлѣокѣа кѣодо чахийо:
«Оѣждикѣа Ягѣа цѣ^н гула». Кѣацѣцѣа аѣжаиб
бѣхѣийо. 64 Ыаѣже ѣохийо Закария вагѣал-
лиѣисзу Аллагѣлил рецѣна богѣна икѣлашал
уѣ^н холѣийолѣо. 65 Гѣулиѣ сѣ^нгѣой гаѣгѣийѣа
аѣдамла ѣилѣа гѣийабачѣейо; вагѣло хабар
Ягѣудияллила кѣацѣцѣа мѣѣдѣкѣа мѣтеме-
кѣейо. 66 Вагѣло хабар тухѣийѣа пѣкро бѣс
зукѣойо:

– Нѣйо сукѣод ахѣал вагѣакѣо оѣждиѣ-
кѣѣ, – лѣо нисона.

Зукѣанна Бѣчаслис гѣѣлѣѣолѣи зуѣона
гѣй гѣокѣоѣ.

Закарияс реѣ-бакѣлис кѣчІ

67 Илагѣияб Ругѣлисна оѣцѣна, Ягѣѣла або
Закария, Аллагѣлила кѣламликѣа нисос:

68 – Буѣо реѣ Бѣтѣргѣаллил, Израиллила
Аллагѣлил, судлѣо нисода, Гѣогѣо о^нкѣона
Гѣинис халѣъ тѣса багѣойо. 69-70 Гѣогѣо
гѣехзу, гѣинила илагѣиябла авараглѣѣкѣѣ

илол йо^Нкъолал къодо йохийо хъосарлъи
 жейса йо^Нкъойо Гъинис лагъ Давудила би-
 лЮъкъа̄. ⁷¹ Аллагъли нисойо вагъдā: илла
 тушмаллāкъасна, къацІцІā иле бātІаъцалā-
 къасна хъосар боваллЮ. ⁷²⁻⁷³ Илла агълолал
 къодо бохийо рагъмат бованна, вагълāзу
 Гъинис илагъияб бугъаъцас къутІина илос
 або Ирбагъинил нилІийо гъāна йакІкъа
 йо^Нкъолална. ⁷⁴ Аллагъли нилІийа къутІи-
 лакъа зукъойо нисона иле тушмаллāкъас
 хъосар бōслЮ, бета Гъогцол гъийабачІечІе
 ибадатна бōслЮ. ⁷⁵ Нитоназу илла оъмро-
 лаъ Аллагълил ибадат бовал Гъогцос мā-
 цовā валийацойна бāхъна. ⁷⁶ Мина, Оъжо,
 Бичаслила аварагълъилаъ бикІзи овас, Ми
 э^Нш Къоддāла гъингъа аь^Нйдā Гъинил гъино
 йе^Нлъелал, ⁷⁷ Гъинила халкъилал хъосарлъи –
 мунагъ-гъаькълиъис гъоггōл мāцолцаслъи –
 нисал, ⁷⁸ Бичаслила гилъилла рагъмола
 мехелло бохъ къоддāкъа мокъос илол,
⁷⁹ колІІаъна хеллила гъидоцилаъна бечейāл
 бахъальгъа, илос хаьбāна рекъеллила гъи-
 нолкъа йе^Нйагъальгъа.

⁸⁰ Ягъя укълъис зукъойо, а^Нкъло-лъайли-
 къа о^Нкъос зукъойо.

Израиллила халкъилал ваъзалил аьгъиъ-
 цал, гъолцо оъмро бōйо боьчІчІа авлахълиъ.

2 кѡам

Иса авараг ахъийо водо

¹Гьогло водлѡъ Август кѡайсарила амро-
лакѡа дуниялликѡа гаьгъийа кѡацѣІа аьдам-
ла чѡхал нуцѣос зукѡна гей. ²Вагъли аьдам-
ла чѡхийолѡи зукѡна гей аь^Нйддѡш, Квири-
нийли Шамлиѡ наиблѡи йогъцала замаллѡъ.
³Мекъейолѣо кѡацѣІа гъй-гъидела шагъар-
бѡъ жувѣл чахиллал. ⁴Галилеялис Назарет
шагъарбаѡаш аьгъиѡна Усупна Ягъудияллиѡ
Бетлегъемлѣо нисойо Давудила шагъарбаѡ
къодо э^Нкъейо жу чахиллал, судлѣо нисода
гъули Давудила насло-зуриятлисна билѣосна
сукѣо зукѡйо. ⁵Гьолцогъой кѡацѣо зукѡйо
гьолцол магъар гулло о^Нх гаьгъийо ахъо
Мариянна. ⁶Гъулиѡ гьоддѣл мокъоль, гьог-
лѣол кѡова ахъал мех мокъойо. ⁷Марияни
ѣйо аь^Нйддѡш кѡова, ѣжѣо. Бета кѡйлѡѡна
ѣлѣна голло гьольльѣо гъули синакѣбаѡ,
жувѣл бецал билѣѡѡ маьче михъаѡаль.

Малаиклана векѡѡа

⁸Гьоглѣо мицаѡ зувакѡна гей авлахъ-
лиѡ нише гъидеш боцѣи богъѣас векѡ.
⁹Гьоглодой Бичаслис малаик о^Нкъойо,

БетІергъаллила Нурли гангъизи бѡйо гьол-
лѡл, гьольлъохъа век̄ана йил̄а гьийаба-
чІейо. ¹⁰ Малаикли нисос век̄ахъа:

– ГьийабацІахъа, до мизол бакъойо
къацІцІола аьламлил бахъцас букъо рохел.
¹¹ Жейса Давудила шагъарбаъ ахъна гей
Аллагъли аьдамла тиса багъал э^Нйо Кьоддас
Масигъ. ¹² Гьуна, миже вагъальлъокъа боьва-
жаллъийо аьламат: мизол и^Нхъос синакІбаъ
оьлІна голло кьова.

¹³ Гелокъасзу малаиклигъой къацІо йо^Н-
къос гъа^Нсаьла агълолас йукъо гъаз. Аллагъ-
лил тасбигъна йогъна гьолло нисос:

¹⁴ – Гъа^Нсаьла Аллагълил рецна,

ЛІийо дуниялликъа Аллагъли цІоб гул-
лал – рекъелна!

¹⁵ Малаикла гъа^Нсаъ мекъена муьгъаттā,
век̄а сидхъа гьо^Нсо нисос:

– БетІергъалли илол тухъал битІилло
вагъдо хабарна, гьулиъ йахъийо жона йи-
къелал Бетлегъемлиъ иле мекъал.

¹⁶ Вагъаллиъисзу къапІун мекъейā гьол-
лол, мийахъос Мариянна, Усупна, синакІбаъ
укилло кьована. ¹⁷ Кьова эгāйоназу век̄а ни-
сос, кьова ахъийас хабар гьидел малаикли
илгъам бѡйолІо. ¹⁸ Гьодлохъа энекзи бахъийā
къацІцІа аьдамла аьжаиб бāхъна гьихбалъос

векā нисойо жойлакѡ. ¹⁹ Нисова жойлаш маънана богъна, Марияни шоваълечѣе ѡакѣкѡ ѡовахийо гъолло шибаблис ѡаъжбо. ²⁰ Малаикли нисогѡа гъидел тухъанна бегāнна битѣилло хабар битѣун михъоль, Аллагълил речна тасбигъна богъна векā къаъ боъвачош.

Исал суннат бѡйо

²¹ Белѣен водиъис къовал суннат бѡслаъ, гъолцокѡа Иса цā^н гулца. Вагъли цā^н зукъоѡ малаикли Мариян о^нх гаъгъийо ѡахъал аъ^н ѡдā гулалѣо нисойо цā^н.

Иса Аллагълила билѣоъ акъойо

²² Мусала къанонликѡа гъоггѣл мāцолцас водбо ѡо^н вакъоль, гъолло ѡжѡ Иерусалимливъ акъос Бетѣргъаллил назро* ѡгъна нилѣал. (²³ Аллагълила амролакѡа ѡѡола си^н ѡаъас гисакийо шибаб абоддāс насло Бетѣргъаллил назролъилаъ икъелца зукъона.) ²⁴ Вагъальлъѡ динияб къанонликѡа къурбаллил мухал нуцѣос зукъона гей къона ваъаъас илба, ѡаги илбалис къона лѣапан.

* 2:22 Назро – Аллагълил нилѣанна ѡованна нуцѣѡѡ тѣаддаб илагъияб жо.

²⁵ Гьуна вагьальльо мехлаъ, Иерусалим-лиъ зукьона гей Симеонлю нисойо суклю. Гьули зукьона динияб муъмин ва Израил-лис халкъ БетІергьалли тапшур боваллакьа йаклю гаьгьийо суклю. Гьолцогьой зукьона Илагьияб Ругьна. ²⁶ Гьолцол Илагьияб Ругьли тухьал йитІилло жу Бичаслис Масигь эгайчле угьаьцасльи. ²⁷ Вагьаглю водиъ гьули Илагьияб Ругьли о^нкъолло Аллагь-лила биллоъ. Ийо-абона акьос итІино Иса гьулиъ, Гьолцол бовал нуцлойо динияб аьдат бовал. ²⁸ Симеони окчиш Гьули коъ, бета Аллагьлил рецна богьна нисос:

Симеони муьгьалІ йахъцас жо нисос

²⁹ – Йа Рабби дие БетІергьан, до Дибо лагъ, мокьола дил къадар до угьал, Ми нисова йаьжкьа рекъенна богьна. ³⁰⁻³¹ Ми къацІцІола халкъилал йикъальгьа гьаьдур йойо хьосарльи йегайо диела гьаьйдаъл, ³² мажуслаъл канльи-лъай, дибола Израил халкъилал рецна къадрона.

³³ Оьждикьас Симеони вагьла нисоль, ийо-або гьайран-гьикмат бахъийо. ³⁴ Гьоллол доьъана богьна Симеони нисос Мариянхъа, оьждила ийохъа:

– Гьуна, вагъацо оѣждиѣкъ̄а телид̄ас Из-
раил халкъилас аѣдамла бейакца, телид̄ас
къоддаб̄акца, вагъди кьова ахъца Аллагълис
аѣламатцой, амма тели аѣдамла гьолцол
данде бечеш, ³⁵ – дибона йак̄ло балъайяхъа
лъукъзи йахъца, – телилас йак̄лиъ гаѣгъий̄а
пикрована загъир йахъалъгъа.

Гъаннати муѣгъал̄I йахъцас жо нисос

³⁶Зукъойо гьулиъ гъиниъ караматлъи
гаѣгъийо Гъаннат – Пенуэлис кид, Ашер-
ла кьибиллиъис, йил̄а ицлолъийо аѣдам.
Гъинила бет̄Iергъаллигъой ахъо йе^Нкъена
муѣгъатт̄а ал̄на л̄и йагъос. ³⁷ Бел̄на-йигна
оѣ^Нкъона л̄и йе^Нкъеца кьоролай нитоназу
Аллагълила бил̄оѣос йолъаѣас зуѣона гей
нишена-хискъана Бет̄Iергъаллил какна-к̄ал-
на йогъна, т̄аѣат-ибадатликъа йечена. ³⁸ Ва-
гъалълъо мехлаъ гьолълъо Аллагълил
рец-бакъ богъна м̄еш зуѣойо Исас хабар,
Иерусалим тапшур боваллакъа йак̄ло гаѣ-
гъийа къац̄лола аѣдамл̄ал.

Къ̄аѣ Назаретлиъ мекъейо

³⁹ Бета гьолл̄ол, Бет̄Iергъаллила къанонли-
къа бовал нуц̄лоѣо аѣдатна богъна, мекъена

мокъос Галилеялиъ, гъидела шагъар Наза-
ретлиъ. ⁴⁰ ИтІино укълъис зукъойо, къува-
табна аькъилабна ахъца зукъойо, Аллагълис
баркат зукъойо Гьолцощь.

АцІона кьонлІис Иса Аллагълила билІоъ

⁴¹ Шибаб лІиъ Гьолцос ийо-або мекъа-
гъийо Иерусалимлиъ ПасхалІо нисоцала
ид-водил. ⁴² Гьолцол ацІона кьона лІи йе^Н-
къель, аьдатликъа ид-водил гьоллѳл ме-
къейо кьодо Иерусалимлиъ. ⁴³ Бета ид-водо
йольона муьгъаттѳ гьоллѳл къѳъ мекъейо,
гъихлъос гьоллос насло Иса Иерусалимлиъ;
гъули гъихлъѳлѳи икъѳѳас ийолна аболна.
⁴⁴ ГицІийолІо гьодлол Гъули гѳслІона бад-
логъой. ЙалІокъѳш йагъойо гъино йольона
муьгъаттѳ, муьхобалъийолІо гьоллѳл гъули
и^Н зал аьгарлъилаъна бега-бийакъейѳъна.
⁴⁵ Гъулина и^Н хъечІе, къѳъ кІѳъймуьхона ме-
къейолІо гьоллѳл Иерусалимлиъ гьолцо-
гъойна миздабана. ⁴⁶ Лъанасла водиъ Гъули
и^Н хъона гей Аллагълила билІоъ муалимлѳъ
алІо къѳна эчена, гьоглохъа энекси ахъна
гьоглол суалла нийаццас. ⁴⁷ КъѳцІѳѳа энекси
бахъийа гъайран-гъикмат бовагъца зукъона
гьолцола а^Н кълолана жаваблѳна. ⁴⁸ Гъули

эгалъ, ийо-або гъикмат бāхъийо; гъолцола ийо оѣждихъа нисос:

– Йā дие оѣжо, сийод ми илол йōйо. Гъуна, дибо абона дона йукъа пашманлъила ми и^Нзийо.

⁴⁹ Гъолцо гъоллохъа нисос:

– Суд миже до и^Нзал нуцІос? Мизол икъаъасди зукъойо до диела Абола билІоъ ахъал нуцІоцаслъи?

⁵⁰ Амма ийо-абол биджи йахъеэш гъолцо нисō йаѣжлāш маъна. ⁵¹ Бета Гъули аѣгъиъна э^Нкъейо гъоллогъой лІийо Назаретлиъ. Гъули ийо-або нисогъа уѣ^Нхо-аѣ^Нхейо. Ийона гъогцос йаѣжбо шоваѣлече йакІкъа йо-вахийо.

⁵² Иса укълъийо, аѣдамлāла а^Нкъло-пикролаъ о^Нкъойо, Аллагъллинна аѣдамлāнна Гъули йилІа атІийо.

3 къаъм

Ягъя авараг халкъиладой аѣ^Нйдā аѣгъиъца

¹ Тиберий къайсарлъилаъ ахънас ацІоналъинас лІи зукъойо; Ягъудиялиъ наиблъилаъ Понтий Пилат зукъойо; Галилеялиъ ханлъилаъ Гьерод зукъойо; гъолцос ис Филипп зукъойо Итурейлилана Трахонитлилана

вилаятлис хан; Лисаний Абиленаллиъ хан-
лъилаъ зукъойо; ² Гъаннана Кайафана биш-
шун букъа кашишлалъилаъ гаьгъийа мехлаъ,
Закарияла оьждил – Ягъял боьчІа авлахъ-
лиъ Аллагълис йаьже тухъийо. ³ Гъолцо
Иордан э^Нхедой гъица гаьгъийа мицāъ
кІаьйлІона лъйд мацоллолъи тІибитІизи
йōйо, мизос мунагъла тавба богъда чурзи
йāхъцалІо нисойо. ⁴ Вагъаддийа йаьжбо
чāхна гей Ишая авараглила ТІекликъа:

«Гъо^Нс гъокІ тухъца боьчІа авлахълиъ:

Гъуги о^Нкъольол гъино къачІази йова,

Къоддāлал гъино йа^НкъойцІойо йова,

⁵ Шибаб куво-аьракъ йолъала,

шибаб маь-бизова йе^Нйалъала,

ЧикІ-чІекІдийо жо йа^НкъойцІала, хир-хоб-
кІилā маьче мелъала,

⁶ Шибаб ругъ-чІаголъилал Аллагълис хьо-
сарлъи йегāла».

⁷ Гъолцодой мацолал мокъова халкъи-
лала аьламлихъа Ягъя нисāгъийо:

– Гъай миже, цІодола бекелалис насло!
Лъод миже тІамзи бōйо къодо мокъоцала
Аллагълила симолдойс боьвачал? ⁸ Миже
бōва тавбалас пихъ йегала. Иле Ирбагъини-
ла наслолас къовā гейлІо нисона бикълаба-
шāкъа. Гъуна До мизохъа нисос, Аллагълил

йадда вагъаддѡл кьалāна Ирбагъинила кьовāл Гьогцохъа йуъ^Нвахонна йāхъца. ⁹ Хобхила хемухадой о^Нг гуллолѣи мизол йикъе. Клетѡ пихъ кьодо йахъаъцас хобхо буьчІна цѡѡ гулцаслѣи йикъе.

¹⁰ Гьиде сийод йовал нуцѡслѡ нисос зукъойо аьдамлā. ¹¹ Ягъя жаваб ницца зукъойо:

– Кьона мухун гаьгъийа гьѡ^Нсцойс гаьччал нилā, кен гаьгъийана вагъаллā йова.

¹² Мунагъла чурзи йовагъиллал мокъовā гъаькъ бокѡлал бечеллā аьдамлāна нисолло гьолцохъа:

– Йā Муалим, иле сийод йовал нуцѡс?

¹³ Гьоллол жаваб нилІийо Ягъя:

– Мизол бегаллагъа кьоддāс багъāкъа гъаькъ.

¹⁴ Вагъаллāзу рагъухъаллāна мокъона нисолло:

– Илена сийод йовал нуцѡс?

Гьоллохъана нисойо:

– Гьѡ^Нссидихъасна гъичІегонна окко йагъāкъа, гьѡ^Нссидикъана гаьччо аьйиб гулāкъа, мизол ниццала харжликъа рази бахъна бече.

¹⁵ Масигъ о^Нкьаллахъа гувабацѡна бече-йаъ, халкъилал пикро бахъца зукъойо Ягъя

Масигъ зогъаллѲона. ¹⁶ Ягъя къацѲѲолал жаваб нилѲийо:

– До мизос мунагъла лъйд йа^Нцолца, амма о^Нкъос дѲгъана йилѲа къудратаб СукѲо. До гей гъолцола гъалалъцолас къохъа йа^Нкал мустагъикъаб гаъччо сукѲо. Гъогцо мизос мунагъла йа^Нцолас Илагъиябли ругълидна цѲойидна. ¹⁷ Гъогцола каъ аъ^Нко гей, нахоъос хъибо мацонна гъинила баъкъиъ гулца, нахо гъо^Нсна йедаъцала цѲоъна гунна Гъолцо йекѲелца.

¹⁸ Рохеллис Хабар нисона вагъаллѲзу тели баддѲнна насигъатла Ягъя аъдамлѲл йовагъийо.

¹⁹ Гъерод ханли гъинила истѲис ахъо Гъеродиада йо^Нкъойолъина, бади гъокцос чороклъина Ягъя мотѲолиъ йакъеллъо, ²⁰ Гъероди Ягъя тѲусагъийаъ голло, ханли йовагъийа бадло кешлъилѲкъа къодо вагъли кешлъина телилъийо.

Исана лъйд ацолца

²¹ КъацѲѲо гаълъда-гагъгийо аъламна мокъона лъйд мунагъла йа^Нцолцалаъ, Исана лъйъна э^Ндокна доъа бѲслаъ, гъа^Нса йе^Нйагъейо. ²² Илбалила суратбакъа Илагъияб

Ругъ мокъойо гьолцодой. Бета гъа^нсаъкъа гьокІ тухъийо:

— Ми гей дил ацчас дие Оъжо. Дукъа До рази гей!

Исала умумаллис кьибил

²³ Иса Аллагълил хъуллукъ бовал уь^нхольийаъ, гьолцос зукъойо лъанайиглъийо лИ. Гьолцола умумаллис вагъаддийо кьибил гейло нисос зукъойо: гьолцос або Усуп, гьолцосна або Эли, бета ²⁴ Маттат, Леви, Малки, Яннай, Усуп, ²⁵ Матитя, Амос, Нагъум, Гъесли, Наггай, ²⁶ Магъат, Маттати, Шимъи, Йосех, Йода, ²⁷ Йогъанан, Реса, Зеруббабел, Шеалтиэл, Нер, ²⁸ Малки, Адди, Къасам, Алмодам, Эр, ²⁹ Ешуа, Элизер, Йорим, Маттат, Леви, ³⁰ Шимъон, Ягъуда, Усуп, Ионан, Элякъим, ³¹ Мелеа, Менна, Маттата, Натан, Давуд, ³² Йишай, Йобед, Боаз, Шалмон, Нагъшон, ³³ Аминадаб, Админ, Арам, Гъецрон, Перец, Ягъуда, ³⁴ Якъуб, Исгъакъ, Ирбагъин, Терагъ, Нагъор, ³⁵ Серуг, Реу, Пелег, Эбер, Шелагъ, ³⁶ Къейнан, Арпакшад, Шем, Нуьгъ, Ламек, ³⁷ Метушелагъ, Гъенок, Яред, Магъалалезл, Къейнан, ³⁸ Энош, Шит, Адам, Аллагъ.

4 кѡам

Илбис Иса кѡосси овал муьхотухъийо

¹ Илагъияб Ругълид оцІийо Иса Иордан-
лиъис кІаъй уь^Нхона гѡйо, бета Ругъли Гъу-
ли о^Нкѡолло боьчІча авлахълиъ. ² Вагълиъ
йагъойо Иса оь^Нкѡонайиг водо. Илбисли
гѡлщос гѡаьлна бикъелло. Вагълосинаб за-
маллиъ сикІаъ лукІма мейэш. Оь^Нкѡонайиг
водо йе^Нкъель, Гъули нукойо. ³ Вагъальлъо
мехлаъ илбисли нисос Гѡлщохъа:

– Ми Аллагълис Оьжо зогъда, вагъалІо
къалхъа ниса баьбалал йуь^НхолІо.

⁴ Иса гѡоглІол жаваб нилІийо:

– Тіекликъа чахна гей: «Сид баьбалакъа
боваъас инсалли гъинис оьмро».

⁵ Бета илбисли маькъана о^Нкѡонна, сид
лагъзатлиъ дуниялликъа гаьгъийа къацІцІа
пачалихъла йегабалло Гѡлщол. ⁶ Бета гѡок-
лІо нисос:

– Вагъадло къацІцІола пачалихъла̑с их-
тиярна рецна до Дул нилІал, судлІо нисода
гѡольлъос ихтияр дѡхъа нилІна гей, до дил
атІтІийал вагъло ницца. ⁷ Ми дил сужда
богъда, вагъли къацІцІо дибо йахъца.

⁸ Иса жаваб нилІийо:

– Тікликъа чахна гей: «Сид Аллагълилл-
лаъ сужда бовākъа, БетІергъаллиллаъ ибадат
бовākъа».

⁹ Бета илбисли Гъули Иерусалимлиъ эже-
на Аллагълила билІола кьохъкъана гонна,
Гъолцохъа нисос:

– Ми Аллагълис Оъжо зогъда, вагъалІоъ-
ла лІийо огиці! ¹⁰ Тікликъа чахна гаъъад:
«Аллагъли малаиклакъа амро бовас ми цІу-
ми овалІо нисона». ¹¹ Бета: «Малаиклаъ каъ
охна эзас къалил дибо хаъба мехелечІе».

¹² Иса жаваб бōйо:

– «Ми БетІергъан, дибола Аллагълил
гъаълбики йовākъа» – лІо нисона чахна
Тікликъа.

¹³ Гъолцол къаціціо гъаълбики йогъна
лъикъоль, илбис гъо^Нс санаъатаб мех мо-
къоцал боъийо Гъолцодойс.

*Иса аварагли Галилеялиъ
ваъза-насигъатла йовагъал уь^Нхолъийо*

¹⁴ Иса о^Нкъойо Галилеялиъ Илагъияб
Ругъна Гъиниъ бахъна. Гъолцос ца^Н нāназу
со^Нгъой гагъгийā мицаъ йе^Нкъейо. ¹⁵ Сина-
гоглаъ э^Нкъена Гъолцо ваъза-насигъатла
йовагъийо, къаціціола Гъолцол рец-бакъ
бōс зукъойо.

Назаретлиъ Иса авараг къабул ойэш

¹⁶ Бета Иса тарбийа-лъай нилІийа Назарет шагъарбаъ э^Нкъейо, гъинила аьдатликъа шамат водиъ синагоглиъна э^Ндокийо. Гьоллол ТІек хьовал минбарликъа къодокійо. ¹⁷ Ишай авараглис ТІек нилІийо Гьолцохъа. Вагъаддийо калима гаьгъийо мицаъ ТІекна йе^Нгъена, хьойо Гьолцо:

¹⁸⁻¹⁹ – «Дйъ БетІергъаллис Ругъ гей, гьолцодил ихтияр нилІийо Рохеллис Хабар мискиллāхъа мейал, асирлъилаъ гаьгъийā тиса бāгъоналІо, боцдийāл канлъи йо^НкъоналІо, азаб-акъубалиъ гаьгъийā гиса мегъналІо. Аллагълила раьгъматлис мех мокъоналІо нисал э^Нгъна гей До».

²⁰ Бета Гьули ТІекна йи^Нхьона, хьулухъчийахъана нилІна, къе эчейо. Синагоглиъ гаьгъийā къацІцІолас гъаьй йе^Нхейо Гьолцо-къа. ²¹ Иса гьоллохъа нисал уь^Нхотохъийо:

– Жейса миже вагъалІо калималихъа энекзи бахъцалаъ, чахийо жо тІубази йахъийо.

²² Гьолцола каламли гьоллол букъо асар бойо. Исала сикІаькъā гугъцала вагъальлъо баркатаб каламли къацІцІā аьжаиб бовагъийо. Бета гьолло нисойо:

– Усупис оьжод гей Гьули?

²³ Иса нисойо гьоллохъа:

– Гъай-гъай миже Дѣхъа кицина бакъона нисас: «Ми дохтур зогъда, гъакъкъа Мизу сагъ ахълѦо. Илол Капернаумлиъ йахъийо шинаб жо тухъийо, же вагъалѦо Дибола абола ракъликъана йова!» – лѦона нисас миже Дѣхъа.

²⁴ Амма Гьогцо гьоглохъа нисойо:

– Гъакъкъаб жо гей, гьо^нсна авараг гъинила абола ракъликъа бикѦзи оваъас.

²⁵ Гъакъкъаб жо нисос До мизохъа: Иляс авараглила замаллиъ лъана лѦина илъна боцо бахъийо мицакъа водо гуйчѦе къацѦ-цѦо дуниялликъа йукъо ракъи йо^нкъона.

²⁶ Израиллиъна тели кьоролла зувакъодана, Сидонлидой гъи^нца гаъгъийа Царепатила сид кьоролайдойаъ э^нйэш Аллагъли Иляс.

²⁷ Элиша авараглила замаллиъ Израиллиъна барас унтилаъ кѦовабакѦова тели аьдамла бѦахъдана, Шамлиъис гьо^нс НаъманлѦо нисо-цас сукѦовѦаъ а^нцолеш гьольльѦо унтилаъас.

²⁸ Вагъли тухъийоназу, синагоглиъ гаъгъи-йѦа аьдамла гъалаг бѦахъийо. ²⁹ Баъгъбаъна гьолло Гьули шагъарбаъаш гисана эжена бачилѦ тѦотѦаллѦо нисона, гъидес шагъар бѦйо бизола раъьалликъа акъос зукъойо. ³⁰ Амма Иса халкъилаъас алѦос ѡчона ѡыйо.

*Капернаумлиъ Иса аварагли
йегабаллā караматла*

1. Чикейо зиннал гиса боцІийо.

³¹ Бета Галилеялила КапернаумлІо нисо-
цала шагъарбаъна э^Нкъена, гьоллол шамат
водлāъ Аллагълис калам биджи бовал
уь^Нхолъийо. ³² Гьолцола ваъзалāкъа аьдам-
ла аьжаиб бахъна зувакьойо. Гьолцо нисо-
цас жо нисос зукьойо Гьиниъ гьаьлкІолъи
гаьгъийаъцой.

³³ Синагоглиъ зукьона гей зинналлā охийо
гьо^Нс сукІо.

³⁴ – ЭццакІа! Сийод дул илоькъā йатІна,
Назаретлиъис Иса! – лІо нисона йукьо
илІелāл уь^Нхолъийо гьули сукІо. – Иле па-
сад бовалди о^Нкъона Ми! Дил икъеш Ми
Аллагълис Илагъияб СукІо ахъцаслъи!

³⁵ Иса гьокІ йоъиллийо гьольльос:

– ГьокІ йоъла, больо Ми гьолцола ма-
гьоъос!

Синагоглиъ алІлІода гьули сукІона къе
икъена, гьоьшшона зарал бойчІе гьолцола
магьоъос зиннал гисакийо. ³⁶ КъацІцІā гьай-
ран бахъийо. Гьоллōл сидхъа гьо^Нсо бикъ-
лабашал муьхобалъийо:

– Сийо йаъжед гъули, гъинила къуватлидна къудратлидна амро богъцас зинналлал; гьольльогъа муьгъаттā гьоллōлна инсаллила магъоьос гисабакцас, – лō нисона.

³⁷ Нāназу сō^Нгъой гаьгъийā мицāь митемекъейо Исас хабар.

2. Петерлис йукъо ийо кIокIō йахъилло

³⁸ Бета аьгъиьна, синагоглиьисна гисакна, Иса Симонлō нисоцала сукIодой билIогъа э^Нкъеш. Симонис йукъо ийо йаьчI-йиххала унтилаь йилIа кIокIона йи^Нхьос. Гьоло йахълаллō нисона гъарзи йōс Гьолцохъа. ³⁹ КIокIовадой гъи^Нцана э^Нкъена, йаьжена нисона, гьольльоьос унти больолца. Вагъаллиьисзу йаьгъиьна, гьоллол кен-о^Нх гулал йуь^Нхольча гьоло.

3. КIовакIовāна бāхъилло, зинналлана аьдамлāъаш йовацIийо

⁴⁰ Бохъ тIикейа анталаь тели кIовакIовā аьдамлана бāкъона мокъойо Гьолцодой. Исана шибаблил кō йе^Нхенна гьоллōл бāхъилло. ⁴¹ Лади аьдамлāъаш зинналла йовацIийо.

– Ми Аллагълис Оџо гей! – лѠо нисона илѠелабас зувакѠойо гѠоллѠл ѠоѠвачошлаѠ.

Амма жу Масигъ гаѠгѠийѠлѠи зиннал-
лѠл икѠель, Иса гѠоллос гѠокѠа ѠоваѠиллис
зукѠойо.

⁴² Бета хиса водо хишейѠназу гисакна
ГѠули боѠчѠѠа авлахѠлиѠ э^нкѠейо. Хал-
кѠила ГѠули и^нзийо. И^нхѠона муѠгѠаттѠ,
гѠидедойс нѠна э^нкѠѠкъалѠо нисона гѠарди-
зи бѠхѠийо. ⁴³ Амма Иса гѠоллохѠа нисойо:

– Аллагълис ПарчагѠлѠи Ѡо^нкѠоцалас Ро-
хеллис Хабар нисал До бадло шагѠарбѠѠна
э^нкъал нуцѠос, вагѠальльѠл э^нѠо гей До.

⁴⁴ ВагѠлѠ ЯгѠудиялила синагоглѠѠ э^нкѠе-
на, ГѠолцо ваѠза-насигѠатла ѠовагѠийо.

5 къаѠм

Иса авараглис ѠѠ^нйддѠш асгѠабла

¹ Аллагълис калам тухѠал батѠийѠ аѠдам-
лѠ сѠ^нгѠой къацѠобакна гаѠгѠийа мехлаѠ,
ГѠули зукѠойо ГеннисаретлѠо нисоцала ра-
лъадбадой. ² РалъадбаѠ къона гама бегас
Исал. БисѠхѠла, гамалиѠис гисана гугѠна,
гѠидеш бисѠ Ѡовахцас кѠйла низабас зува-
кѠойо гѠулиѠ. ³ Иса Симонила гамалкъа
къодокийо.

⁹ Вагълā нисаъасди, гъулина гъолцогъой кѣацІо гаьгъийāна котакалда гъийабачІена зувакъойо тели бохийо биса бегаль. ¹⁰ Вагълāзу, Симонил гъалмагълъилаъ гаьгъийā Зебедайис оьждаъ, Якъубна Иоанна, гъийабачІейо. Бета Иса Симонхъа нисойо:

– ГъицІāкѣа! Желагъа муьгъаттā ми аьдамла бисацой бовахца*.

¹¹ Гамāна мицакъана кѣисабана, гаьльгъа кѣацІо жона йечаннегъна, гъоллōл Исагъой кѣацІо мекъейо.

*Барас унтилаъ кІокІойо
сукІо сагъ ахъилло*

¹² Гъуна Исал, сид шагъарбаъ о^Нкъоль, кѣацІо магъокѣа барас унти чІалІейо гъо^Нс кІокІойо сукІо эгас. Иса эгаль, гъули сукІо Гъоцодой аь^Нйда мотІо лІийода кѣена экна гъардизи ахъал уь^Нхольча:

– Йā БетІерчІахъаяв! Дул адда, до Дұхъа а^Нцонна сагъ огъна ахъца!

¹³ КІокІовал кōна йе^Нхенна Иса нисойо:

– Дил атІна гей: ми а^Нцо, сагъна ахъ!

* 5:10 Гъольльос маъна: «Аьдамла Аллагъллильда муьвахолча».

Нисослаъзу чІалІейо жона магъокъа кьодос ѳекна, гьули сукІо а^Нцона сагъ ахъийо.

¹⁴ – Гьо^Нс сидихъана хабар мейчІе, э^Нкъена бегала дибо магъо кашишлил, аьдамлāl ми ахъийолъи икъальгъа Мусала къанонликъа кьурбан муха, – лІо нисона лъази ѳойо Иса гьогцохъа.

¹⁵ Амма Исас хабар халкъилаъ гьех митемекъейо. Гьолцохъа энекзи бахъална, унтилаъас сагъ бахъална тели аьдамла мовакъос зувакъойо. ¹⁶ ГьулилІо нисода, аьдамла гаьчІела мицаъ э^Нкъена тІаьатлиъ ахъца зукъойо.

Магъо хьохъойо сукІо ахъилло

¹⁷ Гьо^Нс водолалъ Иса ваъза-насигъат бōслаъ, Гьолцохъа энекзи бахъийа аьдамлāъ э^Ндо зувакъойо Галилеялила шибаб аьлІаъашна, Ягъудиялиъисна, Иерусалимлиъисна мокъовā фарисейлана динияб аьлимлана. БетІергъаллис кьудратлъи зукъойо Гьолцоъ кІовакІова бāхълал. ¹⁸ Гьуна гьо^Нс аьдамлā лІо^Нвакъана гонна акъойо магъо хьохъойо сукІо. КІокІō сукІо Исадой аь^Нйдā о^Нкъолална голална гъаьракат багъос зукъойо гьолло. ¹⁹ Амма тели халкъ бахъийахъа,

эзал гъино йи^Нхъэш. Къамакъас кІарама-
тІина йолъонна, лІо^Нвакъа голгъа Исадой
аь^Нйда алІлІодā лІийо э^Нйо. ²⁰ Гъули сукІо
акъона мокъовā сукІобās божи бегаль, Иса
нисойо:

– Аьдам, ми мунагълāъас а^Нцойо!

²¹ Диниябла аьлимлана фарисейлана сид-
хъа-гъо^Нсо бикълабашал муьхобалъийо:

– СукІо сукІод ахъал нуцІос вагъди ва-
гъллийо инжитаб-гъаькъираб жо йекІцас?
Аллагълыхъāъ инсаллис мунагъла чурзи йо-
вагъна йāхъаъас, – лІо нисойо гъогло.

²² Гъоглола йакІиъ гаьгъийо жона йикъе-
на, Иса нисолца:

– Суд мизола йакІиъ вагъллийа пикрова
йāхъийо? ²³ Сийод нисал пигъаяб гей: «Ми
мунагълāъас а^НцойолІод» йаги «Аьгъиъ-
на э^Нкъе-гогълІод»? ²⁴ Амма мизол йикъе,
Аьдамлила Оьждисна ихтияр гей аьдамлаш
мунагъла чурзи йовагълал... – Иса кІокІо-
вахъа нисойо: – До дұхъа нисос, аьгъиъна
лІо^Нна бежена билІогъа э^Нкъе!

²⁵ Вагъллиъисзу аьгъиъна, жу акъойо
лІо^Нна бокчина, Аллагъллил рецна богъгъа,
гъинила билІогъа э^Нкъейо. ²⁶ Гъайран-гъик-
мат бахъийā гъолло къацІцІола Аллагъллил

рец бѡйо. ЙилѦа гыйабачѦейахъа гьолло
йекѦийо:

– Гьикматаб жо йегѦйо илол жейса, –
лѦо нисона.

Иса аварагли Левий асгъаблъилаъ охца

²⁷ Гьольльогъа муьгъаттѦ Иса билѦоъос
гисакийо. Гьинолис гъаькъ бокѦолцала би-
лѦодой Гьолцол къѦэ эчена эгѦйо Левий ца^н
гаьгыйо гьо^нс гъаькъ бокѦолцас сукѦо.

– Дйгъой муьгъалѦ тос, – лѦо нисос гьол-
цохъа Иса.

²⁸ КъацѦѦо жона гаьльльѦчо йечаннегъ-
на, аьгъиъна Гьолцогъой муьгъалѦ э^нкъейо
Левий. ²⁹ Гьинила билѦоъ мокъоль, Левий
йукъо гьоболлъи йѡйо Исал. Гьулиъ зукъо-
йо гъаькъ бокѦолцасана, гьулазу гьолло-
гъой къацѦо гагъийѦ баддѡл аьдамлана.

³⁰ ФарисейлѦана гьоглола диниябла аьлим-
лѦана Исала асгъаблѦхъа морлѦона нисолло:

– Суд миже гъаькъ бокѦолцала сукѦобѦ-
гъойна, мунагълѦс бовацѦийѦ аьдамлѦгъойна
къацѦо бес-хулѦос?

³¹ Иса гьоллол жаваб богъна нисос:

– КѦовакѦоваллѦъ, сахаб сукѦобѦл дох-
турлис комак батѦаъас. ³² До гогъна гей

муѣмилла гаѣчѣл, муна̄пикъла ийабалѣал,
гьолло тавба бовал балѣло.

Кѣаллис суал

³³ Гьогло нисолло Исахъа:

– Ягъяла асгъаблѣна фарисейлѣла мутаѣ-
лимлѣна дѣсдѣс как-кѣалла йовагъцала мех-
лаъ, гьоддѣл Дибѣ асгъабла суд бес-хулѣона
бѣхъца? – лѣо нисона.

³⁴ Иса гьоллохъа нисойѣ:

– Къимако шеблаъ гаѣгъийа мехлаъ,
гьолцо бейтелликъа ийабалѣейа аѣдамлѣхъа,
бес-хулѣчѣ кѣал йохна бечелѣо нисона
йахъцади мизохъа? ³⁵ Къимако гьоллодойс
агъойѣ водбо йо^н вакъас, вагъалло водлѣаъ
кѣал йохна гьоллѣнна бѣхъас.

³⁶ Бета Иса гьоллол вагъаддийѣ хабар
мѣйѣ:

– Лѣона ицѣцѣо лѣицѣона йаѣхенна келла
лѣицѣокъа гъечѣ гуцѣаъас. Ицѣцѣо лѣицѣо-
на йугъѣс, келла лѣицѣокъа ицѣцѣо гъечѣ
гуцѣийѣолѣина кѣухъаъас. ³⁷ Лѣона гитѣаъас
ицѣцѣо гъино йугъал йо^н кѣова тѣикѣилаъ.
Бетана ицѣцѣо гъинона кѣѣ мекъас, йаѣхена
тѣикѣина йугъас. ³⁸ Ицѣцѣо гъино гитѣал ну-
цѣѣс ицѣцѣа тѣикѣилаъ. ³⁹ Келло гъино хулѣо-

на муьгъаттā, лъōнна кьодо ицІцІо гъино
хулІал батІаъас, судлІо нисода келлозу
гъино кІетІо гейлІо нисос.

6 къаьм

Шамат водо

¹ Шамат водиь хъибола майдаллāкъкъā
мекъал нуцІойо Исана Гъолцос асгъаблана.
Асгъаблā хъибос кьо^нвā кōъна йуьвашинна
мугъла йуь^нвахъча зувакъойо. ² Садло фа-
рисейлā гъодлохъа нисолло:

– Шамат водлāъ йовал йахъаъцас жо суд
миже йōс? – лІо.

³ Иса гъоллол жаваб нилІийо:

– Хъойэшди миже, жуна къацІо гаьгъи-
йāна нувабакона гъихбалъоль, Давуди йōва
жойлас? ⁴ Аллагълила билІоъна э^ндокна
Давуди бокчина гей Аллагълил бакъойо,
кашишлāйаъ муьхъал бахъаъцас баьба.
Гъинина муьхъна гей, къацІо гаьгъийāнна
нилІна гей.

⁵ Бетана нисойо гъоглохъа:

– Шамат водис ихтияр Аьдамлила Оьж-
дихъа гей!

Шамат водиъ кѡ хъохъойо сукІо ахъилло

⁶ БалІосола шамат водиъ Иса ваъза-наси-
гъатлил синагоглиъ э^Нкъал нуцІойо. Гъулиъ
зукъона гей кІетІакъас кѡ хъохъойо гъо^Нс
сукІо. ⁷ Диниябла аьлимлана, фарисейлана
Гъолцохъа гуцІобахъна бечена зукъойо сагъ
оваллāлІона, шамат водиъ вагъли кІокІо
ахъинналІо нисона Исакъа аьйиб мокъо-
лалъгъа. ⁸ Амма гъоглола йакІиъ гаьгъийо
жона йикъена, Иса кѡ хъохъова сукІохъа
нисойо:

– Аьгъиъна алІлІодā эче! – лІо.

Гъуги аьгъиъна алІлІодā э^Нкъейо. ⁹ Бета
Иса гъоллохъа нисойо:

– До мизохъа гъо^Нс жо нисолал: шамат
водиъ сийод йовал йахъца – кІетІолъид
йаги кешлъид? Аьдам ахълалди йаги угъо-
лалди нуцІос?

¹⁰ Гъогло къацІцІолахъана говацІона, Иса
гъолцо сукІохъа нисойо:

– Кѡ йа^НкъойцІола, – лІо.

Иса нисогъа йойо гъолцо сукІо. Хъохъо-
йо кѡ сагъ йахъийо. ¹¹ Гъоггѡл йилІа гъалаг
бāхъийо, Исал сийоди йовал нуцІослІо ни-
сона сидхъа-гъо^Нсо дандибази йовал муьхо-
балъийо.

АцІона кѡна чапар гѡакІийо

¹² Вагѡалло водлѡъ Иса гѡари-довѡалил сид мѡѡкъана э^Нкъена нише-хишей Аллагѡлил тІаѡат богѡна эчейо. ¹³ Хискѡа Иса Гѡинис асгѡаблана ийалІена, гѡоллоѡ э^Ндос ацІона кѡна сукІона гѡакІна, гѡоллокѡа чапарлалІо нисона цѡ^Нда гувалло. Гѡоллѡнна зувакѡйо: ¹⁴ ПетерлІо* нисона тІокІцѡ^Н гѡгѡийо Симон, гѡолцос ис Андрей; Якѡуб, Иоанн, Филипп, Бартоломей; ¹⁵ Маттей, Тома, Алфайлис ѡѡѡ Якѡуб, Зелот** цѡ^Н гѡгѡийо Симон, ¹⁶ Якѡубис ѡѡѡ Якѡуда ва бета Исал хиянат ахѡийо Якѡуда Искаріот***.

*Майдалликѡа Иса
букѡ ваѡза-насигѡат бѡйо*

¹⁷ Гѡинила асгѡаблѡгѡй кѡацІо Иса, мѡѡкъаш лІийона гогѡна, авлахѡлиѡ эчеш. Гѡулиѡ мокѡос Гѡолцос тели асгѡаблана,

* 6:14 Петер – шедлІо нисойо маѡна гей.

** 6:15 Зелот – Римлил данде бегѡцас зукѡѡѡ кѡѡкѡалис сукІо.

*** 6:16 Искаріот (ИшкІерийот) – вагѡальѡс маѡна зогѡал бахѡца «КІерийот шагѡарлис сукІо» – лІо нисойо.

къацІцІо Ягъудиялиъисна, Иерусалимли-
 ъисна, гъулāзу ралъадбадой шеблаъ гаъ-
 гыйā Тирна Сидонна шагъарбāъаш букъо
 аьламна. ¹⁸ Гъулиъ мокъойо Исала ваъ-
 за-насигъатлихъа энекси бахъална, гъулāзу
 унтилаъас бāхълаллакъа йакІо йо^Нкъовāна,
 чикейа зинналлā азаб ниццаса аьдамлана;
 гьоллōл Иса сагъ бовагъийо. ¹⁹ КъацІцІола
 халкъилал йатІна зукъойо Исаль кō йе^Нхе-
 лал, судлō нисода Гьолцоъкъā гугъцала
 букъа къудратлихъа къацІцІā бāхъца зу-
 вакъойо.

²⁰ Бета асгъаблāхъа гъаьйна йе^Нхенна
 Иса нисос:

– Гъардарабла гей миже
 мискин-пакъирла,
 Аллагълис Парчагълъи мизол
 йи^Нхьоль.

²¹ Гъардарабла гей миже, же
 нуко-а^Нхъабā,
 Аллагъли мизос о^Нха йовацІлас.

Гъардарабла гей миже, же бийабацаса,
 бета миже лъо^Нвабās.

²² Гъардарабла гей миже, аьдамлāl
 бātІеэса,
 гьогло атабāкІийа, мизокъа цІокъдабāйа,
 мизос чикейа цā^Нда гейлō нисона

гиса тІуватІас мизос цā^Нда,

Аьдамлила Оьждиддāла.

²³ Рази бāхъ, рази бāхъна богбāцІ миже,
судлІо нисода гъа^Нсаъ мизол
букъо шапаъат гей.

Вагъаллāзу гьоглола наслолāла
аболāна авараглāл йōйо.

²⁴ Амма балагъ-азаб мизол
бечедлъилаъ гаьгъийāл,
кІетІо оьмро же мизол нилІийо.

²⁵ Балагъ-азаб мизол,
же о^Нх йовацІна гаьгъийāл,
бета миже нувабакас.

Балагъ-азаб мизол, же льо^Нвабāйал,
бета миже бийабана макъо йагъас.

²⁶ Балагъ-азаб мизол,
кІетІā аьдамла гейлІо нисона
сикІалъ къацІцІола бāгъовāл.

Гьоллола умумаллина вагъаллā
йилІа рец-бакъ бовāгъийо
аьйдлā гьересиавараглāл.

Рокъилас амро

²⁷ Дїхъа энекзи бахъцала мизохъа нисо-
цас гей: мизос тушмалла бāтІ, миже бāтІаъ-
цалāл кІетІослъи йова. ²⁸ Мизол наъъана

богъцалал баркат гулала, миже нуькучІ бо-
вагъийā доъъалиъ бāгъа. ²⁹ Дул гогāкъа
баъкъеллал, бадона гогā гуцІола; дūхъас
чохъа-гужгат йагъовал, къодос мухунна йа-
гъона нилІа. ³⁰ Шибабли гъарзи йōвал гъарзи
йōйо жо нилІа, нилІийахъасна къāъ йокІā-
къа. ³¹ Бадло дул йовакъōйо жо ми гьоллон-
на йова. ³² Миже бāццалал мизол бātІийās
нййо кирид бахъал? Мунагълāд бовацІи-
йāлна бāцца жувōл бāццаса аьдамла. ³³ Ми-
зол кІетІослъи йōвал къāъ йоцІона йōва
кІетІослъилас нййо кирид бахъал? Мунагълāд
бовацІийāна вагълизу жо йōс. ³⁴ Къāъ
нилІаллакъа кул бахъна боцІи сукІол къар-
залаъ нилІийа сукІол нййо кирид бахъал?
Мунагълāд бовацІийāна сидил гьо^Нсо ницца
йоцІол, къāъ къодос камийойчІе, йо^Нкъал-
лакъа йакІона йо^Нкъонна. ³⁵ Амма мизол
мизосзу тушмалла бātІ ва садакъā йовагъа;
йоцІол нилІийакъа къāъ йо^Нкъаллакъа кул
бовāкъа; бета мизол тели кири бахъца, бета
миже Къоддāла Аллагълис къовалъилаъ
бāхъца. Баркалла нилІаъцалāнна, кешлъи
йōвална цІоб гулцас гаьльльō Гьуги. ³⁶ Ми-
зос Абольийозу гургъел-раьгъмо гаьгъийа
бāхъ мижена.

Гъицаса какзи бовѣкѣа

³⁷ Миже сукІокѣа аѣйиб бовѣкѣа, Аллагъ-ли мизокѣана боваѣас; миже аѣдам какзи овѣкѣа, мижена какзи боваѣас; миже кѣодос тилІбак, мизокѣасна тилІбакас. ³⁸ Мижена нилІа – мизонна нилІас. ЙилІа лахлІо-кѣуѣкѣона гѣоѣдо богѣна боцІийо моѣгѣоре ницца мизол. Нйѣа моѣгѣорейад мизол масадана, вагѣаллийа моѣгѣорейад мизонна масас.

³⁹ Вагѣаддийона мисал бакѣойо Иса гѣоллол:

– Боцдийа сукІохѣа бадисо боцдийо сукІо эжеллина ахѣцади? Гѣоллол кѣонана хѣарандийаѣ бейакассаѣди?

⁴⁰ Гѣинила муалимлигѣа лѣай кѣоддѣас ахѣаѣас мутаѣалим. Амма жузу, кѣацІцІо жо йикѣенна, камиллѣилаѣ о^н кѣода, шибаб мутаѣалим муалимлѣийо ахѣца.

⁴¹ Суд дибола гѣаѣѣ гаѣгѣийо михѣо бегайчІе истІила гѣаѣѣ гаѣгѣийо цІих йегас?

⁴² Йана дѣухѣа дибола истІихѣа нигѣад нисона йахѣца: Верейа ис, дибола гѣаѣѣаш цІих йагѣоллаѣче дйѣд. Дибола гѣаѣѣаш михѣо бегѣѣас. Йе кѣона мотІо гаѣгѣийо инсан, гѣакѣкѣа ми дибола гѣаѣѣаш михѣо

больола, бета йагъал йахъца истѣла гъаъ-
ъаш цѣих.

⁴³ Кѣтѣа хохкъа нѣйоди пихъ гуцаъас,
бахъезшла хохкъа къодо кѣтѣо пихъна
гуцаъас. ⁴⁴ Шибаб хоххо бикъеш пихълихъа
гуцѣобахъна, судлѣо нисода тѣитѣакъа ле-
гъи йахъаъас, зазликъас кѣодо бокѣолаъас.
⁴⁵ Кѣтѣа сукѣо гъинила йакѣила кѣтѣа гъа-
масбаъас кѣтѣослѣи гиса йагъос. Йакѣо чикѣ-
йа сукѣо гъинила йакѣила чикѣйа гъамасбаъас
кешлѣи гиса йагъос, судлѣо нисода сикѣа
нисос йакѣиъ гагъгъийо жо дѣслѣиль.

Къона бигъа

⁴⁶ – Йа Бетѣрчѣахъаяв, йа Бетѣрчѣахъа-
яв! – лѣо нисона суд Дѣхъа илѣелабас, До
нисогъана йойчѣе. ⁴⁷ Дѣгъой гугъцаса, Дѣхъа
энекси бахъцаса, Дие йаъже тѣубази йогъ-
цаса – лѣоль мелъейад бѣхъцасна нисал
До мизохъа: ⁴⁸ гъули э^нлъейо ахъца билѣо
йогъцала сукѣоль. Гъолцо э^нддѣс маъчена
моѣтѣона шедкъа къодо бигъа гулло. Водбо
тели гувагъльо, э^нхе билѣокъа йогицѣийо,
гъольлъохъа гъули лахлѣонна йахъезш, би-
лѣо ахо къучѣликъа йо^нкъонна йоль. ⁴⁹ Дѣхъа
энекси ахъдана, До нисогъа йоваъцас сукѣо

э^Нлѣйю ахъца мицаъ бигъа гулечѣ билю
йѡва сукѡлъ; э^Нхе йогицѣйоназу гьолцос
билю йекна йугъос. Билѡс гьѡшшона
гьихлъаъас.

7 къаьм

Иса нусилбетѣрлис нукар сагъ ѡйо

¹Энекзи бахъйя халкъилал вагъло ваъза
богъна лъикъоль, Иса Капернаумлиъ э^Нкъе-
йо. ²Гъулиъ гьѡ^Нс рагъухъаллѣла нусилбе-
тѣрлис йилѣа аццас нукар зукъона гей ахо
кѡкѡвахъа угъал гикъа ѡ^Нкъона. ³Иса
ѡ^Нкъовас тухъльо, кѡкѡйо нукар ахълал
нусилбетѣрли Ягъудиялис букъѣ гъаьким-
ла Гъули окѣал мѣйо. ⁴Исадойна мокъона,
гьолло къодос болъечѣ гъардизи бахъна
нисойо:

– Гъули Ми комак бовал э^Нхецас сукѡ
гей. ⁵Гьолцол илос агъло бацца, гьолцо
илол синагоглана йовагъййо.

⁶Иса гьоллогъой къацѡ э^Нкъейо. Гъини-
ла билѡдой мокъалдайлил, нусилбетѣрли
гьодлол данде гъинис гъалмагъла мѣйо,
Гьогцохъа нисал:

– Йѣ Бетѣрчѣахъаяв, букъо миллат бо-
вѣкъа, Ми диела билѡъ э^Ндокал э^Нхецас

сукІо до гаъѡа. ⁷ Вагъалтьльобза дона Дудой говал э^Нхекас сукІо гаъѡа, судлІо нисода Дудой гъицакна ахъийо сукІо гаълѡаьалъ. Амма Ми нукар кІокІо ахъцала гъаьлкІо-лъилас гъо^Нс йаьже ниса. ⁸ Дона гейлІо дигъа къоддѡ гаьгъийас амро тІубази богъцас сукІо. Вагълазу диела ихтиялликъа гаьгъийѡ рагъухъаллаъас сидцойсолахъа э^НкъелІо нисода, гъули э^Нкъеш; бацосолахъа гогълІо нисода, гъули гѡс; лагълихъа вагъадди жо йовалІо нисода, гъолцо йѡс.

⁹ Вагъли тухълъо, Иса аьжаиб ахъийо. Гъингъой муьгъалІ гугъцала халкъилахъана гоцІохъна Гъолцо нисойо:

– До мизохъа нисос, Израиллиъна вагъаддийо букъо божилъина иманна Дил михъеш.

¹⁰ НусилбетІерли мейѡ аьдамла къаь билІогъа мокъольол, гъуги кІокІо нукар сагъ ахъна и^Нхъос.

*Наин шагъарбаъла гъо^Нс къоролайс
оьжо угъоваъас ахъилло*

¹¹ ГъакольечІе Иса э^Нкъейо НаинлІо нисойо шагъарбаъ. Гъолцогъой къацІо зувакъойо асгъаблана тели аьламна. ¹² Гъуна шагъарбалла кавлидой Иса о^Нкъалдайлил,

угьона гисдā акъоцас и^Нхъос ийос гъо^Нс гаьгъийо оьжо; гъоло ийона кьоролай зу-
къона гей. Гьольльогъой шагъарбаъаш эзиан
халкъна зукъойо оьжо и^Нхъолал мекъецаc.
¹³ Гъоло йегаль, гьольльокъа йакІона йу-
гьона, Къоддāла Иса нисойо:

– Йийāкъа! – лІо.

¹⁴ Бета гъицана э^Нкъена, Гъолцо лІо^Нваль
кō йе^Нхелло. Гьуги оьжо эжецаc аьдамла
беченувацІийо. Иса нисойо:

– Оьжо! До дұхъа нисос: аьгъиьлІо!

¹⁵ Угъойо аьгъиьийо, бета къēна эчена икъ-
лашал уь^Нхолъийо. Иса гьули оьжо ийохъа
нилІийо. ¹⁶ КъацІцІолас гъицІода йейакийо,
Аллагълил рецна богъна, аьдамлā нисос
зукъойо:

– Укъо авараг ахъна гей илоъ э^Ндо, Ал-
лагъ комаклил о^Нкъонна гей гъинила агъ-
лолал, – лІо нисона.

¹⁷ Гьольльос хабар мекъейо къацІцІо
Ягъудиялиъна сō^Нгъой гаьгъийа мицāъна.

*Иса аварагли Ягъя авараглила суаллил
жаваб нилІца*

¹⁸ МейолІо Ягъяхъа гъинила асгъаблā ва-
гъальльос къацІцІо хабар. ¹⁹ Къона асгъаб-
на илІена, Ягъя гьоллōл мēш Къоддāла

Исадой, о^Нкъал нуцІойо мид гей йаги ба-
цохъад гувабацІона иле бецал нуцІослІо
нисолал.

²⁰ Исадой мокъона аболā нисолло:

– Ягъя аварагли иле мейо нисолал:
«О^Нкъал нуцІойо мид гей йаги бацохъад
гувабацІона бецал нуцІос?»

(²¹ Вагъалло мех мокъоцал Гьолцо тели
аьдамла сагъ бовагъийо унти-шокъльила-
ъас, чикейа зиналлāъас; тели боцдийāл кан-
лъийана йо^Нвакълло.) ²² Бета Иса гьоглол
жаваб нилІийо:

– Мекъена Ягъяхъа ниса мизол йегāйна
тухъийона жо: боцдобалъийāл къāйна кан-
лъи йегаслІо, лахъдийā мекъе-гүслІо, барас
унтилаъ кІовакІовā мацослІо, аь^Нгъалāл жо
тухъаьцалāл тухъцалІо, бувагъовā бāхъилца-
лІо, гьардухъалла-пакъирлā Рохеллис Хабар
мешлІо. ²³ Дикъа шак ахъеэс сукІо талигъаб
гейлІона ниса.

Иса Ягъя аварагликъас хабар мейш

²⁴ Асгъабла къāъ боьвачоль, Иса халкъи-
лахъа Ягъяс вагъдā нисолал уь^Нхолъийо:

– Сийо йегāлди миже боьчІча авлахъ-
лиъ мекъе-гүс зукъойо? ЗалІи лахлІолцас

чала бегалди? ²⁵ СукІо эгалди мекъеш зукъо-
йо? КІетІо лъицІо лъичІейо аьдам эгалди?
Амма бечедаблана кьухъийо лъицІо лъи-
чІейā аьдамлана бāхъца ханлила хъалалиъ.
²⁶ Гъа^Н, сийо йегалди мекъеш зукъойо?
Авараг эгалди? Й^НлІо нисос До мизохъа,
авараглигъана укъо гей гъули Ягъя. ²⁷ ТІек-
лāкъа гьолцос чахна гей: «Гъуна, ми о^Нкъо-
лъол, Дул гъино йа^Нцолал, Дие чапар До
аь^Нйдā э^Нгъна». ²⁸ До мизохъа нисос: ийолā
бовагъийаъ э^Ндо Ягъя авараглигъа укъо
сукІо гаъа, амма Аллагълила Парчагълиъ
бишшун итІинона гьолцогъа укъо гей.

²⁹ Бета Ягъяхъа энекси бахъийā къацІцІола
аьдамлāна, вагълāзу гъаькъ бокІолцалāна
Ягъя мāцолцалаъцой жувōлна мāцонна,
Аллагъ ритІухъаб ойо. ³⁰ Амма фарисейлā-
на диниябла аьлимлāна Аллагъли гьидел
бōйо амро – Ягъя лъйд мунагъла йāцолло-
лъи – къабул йойэш.

³¹ Иса нисойо:

– Вагъаллийа тайпалас аьдамла лъōлъ-
ди мейальелал, лъōлъ мейальейāд бāхъца?

³² Гьоллōл мелъейа гей кьоваль, майдалли-
къа кьēна бечена сидхъа-гъо^Нсо бикълаба-
шецала:

«Иле мизол шашатІо баькъелло,
 Миже лъисокъа богбачІеэш;
 Иле йакІо йугъоцас кечІла ийалІейо,
 Миже бийабайэш».

³³ О^Нкъойо Ягъя авараг: йа баьба муь-
 хъаьчаш, йа гъино хулІаьцас. Миже нисо-
 йо шайтІаллā охийо сукІо гейлІо нисона.
³⁴ О^Нкъойо Аьдамлис Оьжо эсцасна хулІо-
 цасна. Миже нисос, гъуна эсахона хувагина,
 гъулāзу гъаькъ бокІолцалāсна, мунагълāд бо-
 вацІийāсна гъалмагъ гейлІо нисона. ³⁵ Амма
 Аллагълис А^Нкъло ритІухъаб богъцалā
 аьдамлā Гьоло гъаькъкъаб бикъелца.

Мунагълāъас йа^Нцолло аьдам

³⁶ Сид фарисейли Иса эсал окІийо. Фари-
 сейлила билІоъ э^Ндокна Иса эсал шеблакъа
 къе эчейо. ³⁷ Гъуна вагъальльо шагъарбаъаш
 гьо^Нс мунагълāс йоцІийо аьдам, Иса фари-
 сейлила билІоъ гаьгъийо икъель, кІетІо
 маьгъ гаьгъийо йе^Нлълис къиматаб къутина
 бакъона йо^Нкъос. ³⁸ Гьолцогъа муьгъаттā
 къена йечена, йийāнна йийана, микъад Исас
 хаьбāна йи^Набанна, муьчІад гьоллōл йуь^Н-
 валъилло. Бета хаьбалāлна баьдана, гьол-
 лоль кІетІо маьгъ гаьгъийо йе^Нлъ йе^Нхелло.

³⁹ Вагъли йегаль, Иса эсал окІийа фари-
сейли гъинис гъинхъа нисос: вагъди сукІо
авараг зукъойокъода, Гьолцол йикъеш гāъ,
нййа аьдамли Гъинил кō йе^Нхеллона. Му-
нагълāс йоцІийо аьдаммāъ гьоло гей. ⁴⁰ Иса-
на гьолцол жаваб нилІийо:

– Симон! Гьо^Нс дұхъа нисал жо гей Дие.

– Ниса Муалим, – лІо къāъ нисойо Си-
мони.

⁴¹ – ЙоцІол окко ниццала сид сукІос зу-
къона гей къона нагълъулав: сидцойсола
гьолцол нилІал нуцІос зукъона лъиначІитІ
динар, бацосола – лъинайиг динар. ⁴² Нагълъ-
ъи йоцІал гьоллос рес гаьччолъи йегāлъ,
къонхъасна окко къāъ йокІна гаьъа. Гъа^Н же
ниса: лъōлди гьули йилІа атІал?

⁴³ Симони жаваб нилІийо:

– Тели окко къāъ нилІал нуцІовал йилІа
атІал, – лІо нисона.

Иса нисойо:

– БитІун гей.

⁴⁴ Бета гьольлъо аьдамлихъана говацІо-
на, Иса Симонхъа нисойо:

– Йегасди дул вагъдо аьдам? До дибола
билІоъ э^Ндокийо, амма ми Дие хаьбā низа-
бāl лъи нилІеэш, гьольлъо гъинила микъад
Дие хаьбāна низабана къāьмкъала муьчІад

йуѣ^нвалѣлло. ⁴⁵ Ми Дил гѣакѣкѣана баѣ-
лѣэш, гѣолѣлѣолѣо нисода До о^нкѣонас
хаѣбалѣл баѣдана атѣкечѣе гей. ⁴⁶ Ми Диела
кѣаѣмкѣа ѣе^нлѣ ѣе^нхелеэш, гѣолѣлѣолѣо ни-
сода Диела хаѣбалѣлѣ ѣе^нхелло бишшун кѣе-
тѣо маѣгѣ гаѣгѣийо ѣе^нлѣ. ⁴⁷ Вагѣалѣлѣобза
До дѣухѣа нисос: гѣолѣлѣол ѣилѣа алѣлѣо,
гѣолѣлѣола телидѣала мунагѣлѣакѣас кѣодос
тилѣкийо. Йоѣкѣкѣа мунагѣла чурзи йовагѣи-
йѣл йоѣкѣкѣа аѣѣа.

⁴⁸ Гѣолѣлѣо аѣдамлѣхѣана Иса нисойо:
– Дѣбола мунагѣлѣакѣа кѣодос тилѣки-
йо, – лѣо.

⁴⁹ Гѣулиѣ гаѣгѣийѣас пѣкро бахѣийо:
– Сукѣо сукѣод Гѣуди аѣдамлѣаш мунагѣ-
лана чурзи йовагѣна йѣхѣѣас?

⁵⁰ Иса гѣоглѣо аѣдамлѣхѣа нисойо:
– Дѣбола йакѣила божи-ималли ми тѣса
йуѣ^нхолло. Гѣа^нже ѣе^нкѣе ми рекѣелна
бахѣна.

8 кѣаѣм

Исал хѣуллухѣ богѣѣѣа ийѣл

¹ Гѣолѣлѣогѣа муѣгѣаттѣ Исана Гѣолѣѣос
аѣѣона кѣона асгѣабна, Аллагѣлис Парчагѣ-
лѣи кѣодо йо^нкѣоѣала Рохеллис Хабаллана

йе^Нйагына, шагъарбѣйна аьлѣйна мейакъеш
зукъойо. ² Гьолцогъой къацѣо зувакъойо ун-
тилаъас бѣхъиллѣ, шайтѣан-илбислиъис мѣ-
цоллѣ ийѣлна, вагълѣзу гъинила магъоъос
гъехзу алѣна зиннал боцѣийо Магдаленалѣо
нисоцас Мариянна, ³ Гьеродила билѣоъ гаъ-
гъийо Хузалѣо нисоцала хъуллухъчияс ахъо
Иоаннана, вагълѣзу Сусаннана, телидѣс бад-
дѣл гъидехъалкъѣ бахъийо Исал давлалид
комак бовал батѣийѣ ийѣнна.

И^Нжелагийакъас хабар

⁴ Гьо^Нс водолалъ гьолцодой нѣназу ша-
гъарбѣѣаш тели аьлам мокъона къацѣо-
бакийѣ мехлаъ, Иса гьоллол вагъаддийо
хабар мѣйо:

⁵ – Мицалъ гъинис и^Нзо чѣалѣал э^Нкъейо-
лѣо гьо^Нс и^Нжелаги. И^Нзо чѣалѣецалаъ, гьол-
цола кѣъос лади мугъла гъинолкѣѣ йейѣ-
кийолѣо. Хаъбалѣлѣ йовациллѣ гьоллѣл,
йогбацѣна мигънѣ йо^Нвазна йуъ^Нвахъийо-
лѣо. ⁶ Гьо^Нсо мугъла шедкъѣ йейѣкийолѣо,
гъулиъ гувацѣодана, лъи оьлечѣе хемухаъзу
хъовахъойолѣо. ⁷ Баддѣл мугъла чѣагъ-заз-
лѣъ э^Ндо йейѣкийолѣо, йилѣа йукълъицала
чѣагъ-зазлина гувацѣовѣ мугъла ахо гуцѣал

йе^НйэшлО. ⁸Амма бади чІалІейО и^Нзо ре-
гьел гаьгьийа мицаь йахьийолО. Гьō^Н-гьō^Нс-
чІитІ мугь гаьгьийā кьō^Нвā гувацІойолО
гьоллокьа.

Вагьлина нисона Иса илІейолО:

– Тухьал аь^Нгьā гаьгьийāl, тухьала! – лО.

Гьольльос маьна сийод?

⁹ – Гьольльо хабарлис сийо маьнад ба-
хьал нуцОс, -- лО нисолло асгьаблā Исахьа.

¹⁰ Гьолцо жаваб нилІийО:

– Аллагьлила Парчагьлис балъголъийа
йийакьал гьаьлкІолъи нилІна гей мизол,
амма бадлол мисал бакьона нисал нуцОс,
вагьальльобза гьоглол гувабацІодана йегā-
ьас, энекзи бахьдана биджи йахьаьас.

*И^Нжелагийакьас мейо хабар
биджи бōйолъи*

¹¹ Гьуна гьоклО мисаллис маьна: мицаль
чІалІекас и^Нзо гей Аллагьлис йаьже. ¹² Гьи-
нолкъа йейакийā и^Нзодас мугьлалъийа бāхь-
ца йаьжхьа энекзи бāхьдана, бета илбисли
гьоглола йакІиьис жувōл боьважинна хьосар
бāхьечІе бецальгьа, йаьже йагьал йе^Нгьцаса.
¹³ Шедкъа йейакийā и^Нзодас мугьлалъийа

бāхъца энекзи бахъна разилъилаъ Аллагъ-
лис йаъже къабул йогъцаса, зама-замаллиъ
жувѡл бовважчаша, амма гъаъл бикъелцас
загъматaб водбо къодо йо^Н вакъоль, хемуха
гаъччā гъоллѡл атā боввачош. ¹⁴ Чагъ-зазлиъ
йалѡ кези йахъийо мугълалъийа бāхъца
Аллагълис йаъже тухъдана, тIалаб-агъаз-
лигъой, бечедлъилагъой, дунияल्लीла тIа-
ъам-лазатлигъой мекъена, лIуъхонна йаъжис
къо^Н ва гуцIал мейэш аьдамла. ¹⁵ Регъел гаъ-
гъийо мицакъа йе^Н хейо и^Н зольийо бāхъца,
кIетIа хирияб йакIиъ йаъжена цIуми йогъна
сабруна богъна, къо^Н ва гуцIал мегъцаса
аьдамла.

Гухъилла сантелийакъас хабар

¹⁶ Гухъилла сантелийакъа къодо лъона шаг
гулаъас, йаги йоькчина сантели тахлилI
лIийо гулаъас. Гъули гулца канаргъолкъа
э^Ндобакцалāл канлъи йахъальгъа. ¹⁷ Судлѡ
нисода йу^Н цойо шинаб жо йи^Н хъос, балъ-
гояб шинаб жона гиса йагъас бета загъирна
йахъна. ¹⁸ Пал гъаъсил, гуцIобахъ нигъа
миже энекзи бахъцалахъа! Судлѡ нисода
гаъгъийāл къодо бадина йо^Н къас; гаъччāхъас
гъинхъа гаъгъийолѡ гицIийона йагъас.

Иса авараглицой мокъос ийона иснана

¹⁹ Исадой мокъойо Гьолцос ийона иснана, амма аьламлила телильилахъа гьоллохъа Гьолцодой гьино йагъона йахъаъас.
²⁰ Дибо ийона иснана Ми эгӀал атӀна гисдӀа бечена гейлӀо нисос Исахъа. ²¹ Гьолцо жаваб нилӀийо гьоллол:

– Дие ийона иснана гей Аллагълила йаьжхъа энекзи бахъцасна гьули тӀубази йогъцасна аьдамла.

Йукъо залӀо даьгъкӀийолъи

²² Гьо^нс водолалъ Иса Гьинила асгъаблагъой къацӀо гамалкъа къодокийо, бета ралъадбала тикъадӀала рахълиьдӀа безалӀо нисона гьоллохъа амро бӀойо. ГьоллӀол мекъеш зукъойо. ²³ Вагъла мекъешлаъ, Иса уьчахена гей. Йукъа залӀхъа ралъад багъарзи бахъийолӀо, бета лъи жапӀлӀона э^ндо йо^нкъойолӀо. Гьоглол гьинкъи зукъойо. ²⁴ Гьицана мекъена асгъабла Иса лъуьълӀолло.

– ЙӀа НасигъатсукӀо! ЙӀа НасигъатсукӀо! Иле гъанкъизи бӀахъца! – лӀо нисона илелабӀайо.

ЛъуьълӀона Гьолцо залӀхъа амро бӀойо йикъечӀе йечелӀо нисона, йилӀа жапӀлӀоцас.

лъйхъа йеченуцІлО нисойо. Бета дуниялна гъулиъ сасси бахъна гей.

²⁵ – Нѧд мизос божи-иман? – лО нисолло гьоллохъа Иса.

ЙилІа гьийабачІена бихзи бахъийѧ гьоллОл сидхъа-гьО^Нсо бикълабашена нисойо:

– Нийо сукІод Гъули залІинна ралъадбала соййѧлна амро богъна бахъцас, гьоллОнна Гьолцол мутІиъ йѧхъна нисогъа йогъцаса?

Иса сид сукІоѡос зиннала йовацІийо

²⁶ Гамалкъа мекъена гьоддОл мокъойо Галилеялидой аѡ^Нйдѧ гаьгъийа гераселлѧла* улкалиъ. ²⁷ Иса гамалкъас лІийокльо, Гьолцол гьидкъо э^Нкъейо шагъарбаъаш гьО^Нс сукІо. Гъули зукъона гей зинналлѧохийо сукІо. Гъехбехъхъа къодо лъицІона лъицІаъас зукъона гей, гъулѧзу билІогъа эчечІе шунѧл гъѧлтІизи йовагъцала онохбѧъ эйачес зукъона гей. ²⁸ Иса эгѧйоназу, гъули илІелѧл уѡ^Нхолъийо, бета Гьолцола хаьбалѧдой аѡ^Нйдѧ къѧна экна гьогцо сукІо йукъо гьокІна йагъона нисойо:

* 8:26 Гераселла – Галилеялила ралъадбадой оѡмро богъцас зукъойо гьО^Нс халкъ.

– Кьоддāла Аллагълис Оѡжо Иса, сийод Дул дѣкъа йатІна! Гъарзи йōс Дѣхъа, нилІакъа дил азаб!

(²⁹ Зинналлихъа Иса гъолцоѡс болъолІо нисона амро бōйо.) Зинналлā тели мехлаъ азаб-акъуба ницца зукъона гей гъолцо сукІол; гъуги цІуми огъна нāди оѡчодал рачІодāдна сабалийāдна и^Нцос зукъона гей. Амма гъолцо йи^Нцō жо йуькъ-йаькъинна муьгъаттā, зиннали боьчІчІа авлахълиь оцца зукъона гей.

³⁰ – Дибѡ цā^Н сийод гей? – лІо нисолца гъолцохъа Иса.

– «Гъаз» цā^Н гей дие, – лІо нисона къāь жаваб ницца, судлІо нисода тели зинналла зувакъона гей гъолцоѡ.

³¹ Зинналлā Исахъа гъарзи йōйо жувōл аьракъбаъ тІуватІакъалІо нисона. ³² Вагъальлъо мехлаъ бизокъа зукъона гей бесцас булІлас букъо рекед. Зинналлā Гъолцохъа гъарзи йогъна гей вагъагло булІлаъ жувōл йе^Нкъал изно нилІалІо нисона. Гъолцо изно нилІна гей. ³³ Гъогцо сукІоѡсна гисабакна зинналла булІлаъ э^Ндо йе^НйакъейолІо, бета булІлас рекед бачилІ богицІна ралъадбаъ гъанкъизи бахъна гей.

³⁴ Вагъли къацІо жо йегā векā чІалликъа аьлІаъна шагъарбаъна мекъена, йахъийа жойлас аьдамлāхъа хабарла йе^Нйагъна гей.
³⁵ Тели аьдамла мокъос вагъальльо мицаъ. Исадой гъица мокъоль, Гьолцола хаьбалāдой къе эчена зогъца гьоллол гьуги зинналлā гъаг огъна зукъойо сукІо. Гьолцола магъокъа лъицІона йи^Нхъоль, гьули кІетІо а^Нкъло-лъайликъана эгаль, аьдамлāш гъицІода йейакца. ³⁶ Гьулиъ зукъовā аьдамла мейолІо зинналлā охийо сукІо сагъ овас хабар нисал. ³⁷ Гераселлāъна, гьулāзу сō^Нгъой гаьгъийа халкъила жувōл йиллā гъийаба-чІель, Гьолцохъа гъарзи йōйолІо гъидедойс э^НкъелІо нисона. Вагъаллиъисзу гамалкъа къодокна къаъ э^Нкъейо.

³⁸ Зинналāъас ацова сукІона Исахъа гъарзи йōйо Гъингъой жуна къацІо о^НкъалІо нисона. Амма Гьолцо гьули къацІо о^Нкъезш. Гьолцохъа нисона гей:

³⁹ — БилІогъана э^Нкъена мейа Аллагъли дул йōва жойлас хабар.

Э^Нкъена къацІо шагъарбаъ, Иса гъинил йōва жойлас хабар мейолІо.

*Гъе^Н гугъна бецаѣцас аьдам сагъ йѡйю,
бета Яирис кид йугъоваѣас йахъилло*

⁴⁰ Къаѣ Галилеялиѣ о^Нкъоль, халкъила Исал гьидкъольи йѡйю, судлѡ нисода Гьолцохъа гувабацѡна бечена зувакьойо къацѡцѡ. ⁴¹ Гьуна, синагоглиѣ гъаѣкимлъилаѣ гаѣгьийо Яирлѡ нисойо сукѡ гьицакийо Гьолцодой. Исала хаѣбалаѣдой аѣ^Нйда къѣна экна, гъарзи йѡйю гьиндой билѡгъа тослѡ нисона. ⁴² Судлѡ нисода гьолцо Яирис зукьона гей гьо^Нс гаѣгьийо ацѡна къон лѡикъа йо^Нкъойо кид; гьоло йугъос зукьона гей.

Иса, э^Нкъешлаѣ, халкъила алѡ охна зукьойо. ⁴³ Ацѡна къона лѡи магъоѡс гъе^Н гугъна бечечѣ азаблиѣ гаѣгьийо лѡѡхъана сагъ йогъна йахъеѣшла гьо^Нс ийо, ⁴⁴ муѣгъаттѡкъа гигъна, Исала лѡицѡла моѣкъа кѡ йе^Нхеллолѡ, вагъаллиѣисзу гугъцас гьена бечейолѡ.

⁴⁵ Иса нисойо:

– Лѡод Дѡль кѡ йе^Нхелло?

Къацѡцѡла инкар бѡль, Петри нисойо:

– Йѡ Насигъатсукѡ! Халкъила Ми алѡ охна къази огъцас гей.

⁴⁶ Амма Иса нисойо:

– Лѡоди Дил кѡ йе^Нхелло. Дѡѣис къуват-ругъ мекъецас бикъейо Дил.

⁴⁷ Гъини йойо жо бальго гъихлъаъцас йегаль, гъоло аьдам къикъилІона Исадой гъица йе^Нкъейо. Гъолцола хаьбаладой къёна йекна, халкъилал тухъинна нисойо су гъини Гъолцол кō йе^Нхеллона, ва нигъа жу кō йе^Н-хенна муьгъаттā сагъ йахъийона. ⁴⁸ Исана гъольльохъа нисойо:

– Дие кид, дибола божила йахъилло ми. Гъа^Нже йе^Нкъе рекъелна мина.

⁴⁹ Иса гъоглІохъа икълашешлаъ, синагог-лила гъаькимлила билІоьос гисакна сид сукІо нисос:

– Дибо кид йугъойо, ми аьдада Муалим-лис раьгъат бугъолакъа.

⁵⁰ Вагъли Исал тухъльо, Гъолцо киббала абохъа нисос:

– ГъицІакъа, ми бож, дибо кид сагъ йахъца.

⁵¹ БилІогъа мокъоль, Петерна, Иоаннана, Якъубна, гъулазу киббас ийо-абона гъих-бальоцал, баддōл гъо^НссукІона билІоь э^Ндо мейэш. ⁵² Гъольльо киббадда́ла къацІцІа би-йабас зувакъойо гъидеш гъейодана зувакІна. Амма Иса нисойо:

– Бийабāкъа! Гъоло йугъона гаьъа, йуь-чахена гей.

⁵³ Аьдамла Гьолцокъа лъо^нвабас зукъойо, гього йугъойолъи йикъель. ⁵⁴ Иса киббас кона йохна, гьольлъохъа илѐйо:

– Къова, йаьгъиь!

⁵⁵ Киббал ругъ мокъойо, вагъаллиъисзу гьоло йаьгъиьийо, Исана гьольлъол кен нилѐалѐо нисойо. ⁵⁶ Ажаиб бѣхъна гьихбалъойо киббас ийо-або. Гьолцона вагълиъ йахъийо жо гьо^нсидихъана нисѣкъалѐо нисона гьоллохъа лъази йойо.

9 къаьм

*Ацѐона къона асгъаб
ваъза-насигъатлил мейо*

¹ Ацѐона къона асгъабна илѐена, гьоллол нилѐийо къацѐцѐѣ зинналлѣкъа ихтиярна кѐовакѐова бѣхълал къудратна. ² Мейо Иса гьоллѐл Аллагълис Парчагълъи йо^нкъоцалас хабар нисална кѐовакѐова бѣхъланна. ³ Гьоллохъа нисойо гьоьшшона гьиногъид йезѣкъалѐо: йа кѐобала, йа хуржалла, йа баьба, йа окко, гьулѣзу къѐ-къона мухунна къацѐо йезѣкъалѐо. ⁴ Нийа билѐоъ мекъедана, гьольлъо аьлѣѣаш, йаги шагъарбаѣаш къѣъ мекъеца, вагъальлъо билѐоъ лахбалѐечлѐе бечелѐо. ⁵ Амма лъоди миже къабул

боваѣда, гъулиѣис боѡвачошлаѡ, шагъарбала кавлидой мокъоль, мизола гъалальцолаѡцо пах йольола, гъоллол аѡламатлъилаѡ йахъальгъа.

⁶ Мекъена Гъолло мѡ-мокъовѡ аѡлѡѡ нѡназу Рохеллис Хабарна мѡйо, кѡвакѡва аѡдамлана бѡхъилло.

Гъерод гъаѡгъельна гъихлъойо

⁷ Гъерод ханлилна тухъийо къаѡѡѡ ка-раматлис хабар. Гъули гъаѡгъельна гъихлъойо, судлѡ нисода садло нисос зукъойо угъоваѡас ахъна Ягъя о^нкъоналѡ. ⁸ Бадло-сола нисос зукъойо Иляс авараг о^нкъоналѡ, гъо^нсо-гъо^нсола – аѡ^нйдаш гъо^нс авараг угъоваѡас ахъналѡ. ⁹ Гъероди нисойо:

– Ягъяс до къаѡм йуѡѡиллина зукъойо. Сукѡд Гъули, вагъло хабар гъинис дил тухъилѡас?

Гъули эгѡл атѡна икъе-аѡкъеш зукъойо Гъерод.

*Лъина гъазайликъа о^нкъова
сукѡс бешна о^нха йоваѡллийо*

¹⁰ Чапарла къѡѡ мокъоль, Исахъа йе^нйа-гъийо гъиде йѡ-йѡва жойлас хабалла. Бета

бадло аьдамлāдойс гьоллōлна бежеллина, Гьули э^Нкьейо БетсаидалIo нисоцала ша-гьарлилѣдā. ¹¹Амма халкьилал э^Нкьейас тухъльо, Гьолцогьой муьгьалI гьоллōнна мекьейо. Иса гьоллōл кьабул богьна Ал-лагьлила Парчагьлис хабарна мейо, бета сагь бовал нуцIовā аьдамлана бāхьилло.

¹²Водо нисдāкийо. АцIона кьона асгьаб-ла гьицана мекьена Гьолцохъа нисойо:

– Халкь меццабакIа, гьицайцIo гаьгьийā аьлIāьна хьуннāьна гьидел буватIанна бе-санна маьче михьолас, судлIo нисода иле гьолIoь аьдам-сукIo гаьчча боьчIчIo авлахъ-лиь гей.

¹³Амма Иса гьоллохъа нисойо:

– Миже нилIаьче гьоллол бесал кен!

Гьогло нисойо:

– Лъина баьбана кьона бисанāь бадикен-о^Нх гаьъа илохъа, кьацIцIoлал оьлло кен йохал мекьеда бахъас иле.

¹⁴Гьулиь зукьойо лъина гьазайликъа о^Нкьойо або. Амма Иса нисойо Гьинила асгьаблāхъа:

– Миже гьоллōл, лъй-лъинайиг хьогьна мухъликъа кьѣ бечела!

¹⁵Гьогцо нисогъа кьацIцIā гьоллōл кьѣ бечелло. ¹⁶Иса лъина баьбана кьона бисана

бокчина, гъа^Нсаѣдѣна говацІона, кенлил доѣа бѣйо, бета бувакІинна асгѣаблѣхѣа халкѣилал битІал нилІийо. ¹⁷ КѣацІцІѣ о^Нха йоваццал бесийо. Муѣгѣаттѣ гѣихлѣойо роиллѣас ацІона кѣона кедна боцІийо.

*Петерис Иса Масигѣ гаѣгѣийакѣа йакІо
йо^Нкѣос, Иса аварагли жу угѣоцаласна
кѣѣ чІаго ахѣцаласна нисос*

¹⁸ Гѣо^Нс водолалѣ аѣдам-сукІо гаѣчча мицаѣ тІѣѣатлиѣ гаѣгѣийа мехлаѣ, Гѣинила асгѣаблѣхѣа Гѣолцо нисолло:

– Халкѣила До сукІолѣилаѣад бикІзи ѳс?

¹⁹ Гѣолло жаѣаб нилІийо:

– Садло Ягѣя авараг, бадло Илѣс авараг, гѣо^Нсола бадѣлѣола авараглѣѣас гѣо^Нсцойс угѣойо авараг аѣгѣиѣна гейлІо нисос.

²⁰ Иса гѣоллохѣа кѣѣна нисолло:

– Миже сукІолѣилаѣад До бикІзи ѳс?

Петерли жаѣаб нилІийо:

– Аллагѣлис Масигѣ.

²¹ Амма Гѣолцо асгѣаблѣхѣа лѣѣзи йѣйо ѣагѣальлѣѣос гѣо^Нссидихѣана гѣокІ йагѣѣкѣалІо нисона.

²² – Аѣдамлила Оѣждил тели азаб-акѣуба бегѣл нуцІос: букѣѣ кашишлѣана, гѣѣѣкимлѣана, ѣагѣлѣѣзу диниябла аѣлимлѣана гѣинкѣѣас

инкар бѡс, бета жу икъеш, лъанасла водиѣ уговѡвѡс ахъца, – лѡ нисойо Гьолцо.

²³ Бетана Иса къацѣцѡлахъа нисойо:

– Дѣгъой говал атѣийо сукѡ зогъда, гъинкъас кѡна ѣагъала, шибаб водиѣ гъинис хъанчна бохала, Дѣгъойна говала. ²⁴ Судлѡ нисода гъинис ругъ цѣуми бовал батѣийо сукѡ, гьольльѡ ругълиѣис маѣгърум ахъца. Дил оѡло ругъ нилѣийа сукѡс, ругъ хъосар бахъца. ²⁵ Гъинизу жуна угъонна, ѣана гъинилзу гъини зарална богъна, вагъалѡ къацѣцѡ дунѣялликъа ханлъилаѣ аѣдам ахъналѡна инсаллил сѣйона хайир гейди? ²⁶ Дона дѣе ѣаѣжена бикѣзи ѣойѣш сукѡ, Аѣдам-лила Оѣждина бикѣзи оваѣс, Гъинилана, Аболана, мукъадабла малаиклѣлана къудратликъа Гъули о^нкъоль. ²⁷ Гъаѣкъкъаб жо гейлѡ нисос мизохъа: вагъалѡѡ бечейѣла гьо^нсолал хел мокъаѣс Аллагълис Парчагълъи ѣегайчѣе.

Иса авараг бадѣзу ахъийо

²⁸ Вагълѣ нисона муѣгъаттѣ белѣналъийо водо ѣе^нкъель, Петерна, Иоаннана, Якъубна къацѡ мокъона тѣаѣат-ибадат бовал Иса э^нкъейо маѣкъа. ²⁹ Гъуна вагълиѣ доѣѣа-гъари

бѡслаъ, Гьолцола мотІолис куц хужойо, магьокъас лѣицІона бабалолѣна гъаьлдо-
лѣийо. ³⁰ Гьуна вагьлиъ кьона або Гьолцо-
хъа икьлашеш зукьойо. Гьоллѡл зувакьойо
Мусана Илясна. ³¹ Гьоггѡл мовакьойо букъа
рец-нурликъа. Гьогло нисойо Иерусалимлиъ
о^нкьоль, Иса Аллагьлис амрона тІубази
богьна гьолІо дунияликъас э^нкьешлІо. ³² Пе-
терна кьацІо гаьгьийа̄на йуькьезшла милѣаъ
зувакьойо, амма лъуьѣбалІоль, Иса букъа
рец-нурликъа эгѣйо, эцокъа эчейо кьона су-
кІона эгѣйо. ³³ Гьоггѡл кьонана сукІоба бо-
вачошлаъ, гьинил нисоцас йикьечІе Петери
Исахъа нисойо:

– Йа̄ НасигьатсукІо! Илол гьолІоъ ахо
гей. Лъана кьай бовал: гьо^нс Дул, гьо^нс
Мусал, гьо^нс Илясил!

³⁴ Гьолцохъа вагьли нисослаъ, гъа^нс-мус-
на йо^нкьона, гьоллол гьидоци йахьийо.
Вагьальлъо гъа^нса-мусаъ гьоггѡл э^ндобак-
лъо, асгъаблѣс йилѣа гьицІода йейакийо.
³⁵ Бета гъа^нса-мусаъкьа̄ гьодлол гьо^нс гьокІ
тухьийо:

– Гьули гей до гъакІийо Дие оьжо. Гьол-
цохъа миже энекзи бѣхъ!

³⁶ Вагьли гьокІ тухьийаъ, Иса гьо^нсцо
гьихлъойо.

Гьоглос гьокІа йоваыйо, гьидел йегайо
жо асгьаблā вагьагло водлāъ гьо^Нс сидихъа-
на нисезш.

Иса зинналā охийо гьо^Нс оъжо сагъ ойо

³⁷ Бета хиса маъкъаш лийо мокьоль,
Исал данде тели алам мекьейо. ³⁸ Гьуна
вагълиъ, халкъилаъ э^Ндо гагъгийо гьо^Нс
сукІо илІелайо:

– Йā Муалим! Гьарзи йōс Дұхъа, диела
гьо^Нс гагъгийа оъждихъа гоцІохъ. ³⁹ Гьуна за-
ма-замаллиъ зиннали охца гьули: гелокъас
гьолцо хъаьлІеш, илІелас, муьшо мокьонна
сикІаъ поьп чІалІеллис. Тели азаб-акъобана
нилІна гъаьлалъ эццакІца зиннали гьули.
⁴⁰ Диболa асгьаблāхъа гьарзи йойо зиннал
боцІалІо нисона, амма гьоллохъа боцІна
бахъезш.

⁴¹ Иса жаваб нилІна нисойо:

– Йā иман гаьччо мекъаб агьло! Ниток-
цалди До мизогъой ахъал, нитокцалди миже
гьекези бовал?

Бета гьолцо сукІохъа нисойо:

– Акъа гьолІоъ дибо оъжо, – лІо.

⁴² Акъона гōслāъна, зиннал оъждикъа бо-
гицІийо, къēна экинна гьолцол вагъго унти

мокъолло. Иса зинналлихъа оълилалло нисойо, бета сагъ огъна оъжо абохъа ниллийо. ⁴³ Аллагълис гъаьлкЮльи йегасдилло нисона къацІцІа гъикмат бахъийо.

*Иса жу угъоцаласна къаь ахъцаласна
бетана нисойо*

Йова муъжизатли къацІцІа гъайран бо-
вагъна гаьгъийа мехлаъ, Гьолцо асгъабла-
хъа нисойо:

⁴⁴ – Вагъаддѳл Дие йаьжбо миже йакІкъа
йоваха: Аьдамлис Оъжо гъаколъечІе аьдам-
ла̄ла каъ ницца.

⁴⁵ Амма асгъабла̄л нисойо жойлас маъна
биджи бахъеш. Гьулина нисона зукъойо
гьоллол йикъаьалъгъа. Гьольлъос нисолал
гьоллолна гъийабачІейо.

МутІиъ бахъал нуцІоцалас малъи

⁴⁶ Гьо^Нс водолалъ бахъийолло асгъабла̄ъ
э^Ндо даьъба, сукЮд гъидеъ э^Ндо биссун
укъо гейло нисона. ⁴⁷ Гьоллола йакІиъ гаь-
гъийо пикрона бикъена, Иса окчина гьо^Нс
итІино къова голца Гъиндой шеблаъ. ⁴⁸ Бета
гьоллохъа нисос:

– Диллабза вагъди кьова охийо сукІо Дона охийо сукІо ахъца. До кьабул ѳва До мизодой э^Нйо Аллагъна кьабул ѳс. Вагъальльобза мизоъ э^Ндос бишшун итІино бишшун укьо ахъца.

⁴⁹ Вагъальльѳл Иоанни нисойо:

– Йѳ НасигъатсукІо! Илол и^Нхьойо Дибѳ цѳна йагъона аьдамлѳаш зинналла йоваццас гьѳ^Нс сукІо. Иле гьукъзи йѳйо гьѳлцол, судлѳо нисода илогъѳ муьгъалІ говаьцас сукІо гаьльльѳ.

⁵⁰ Иса гьѳлцѳхъа нисойо:

– Гьукъзи йѳвѳкъа, мизол данде эчеш сукІо мизос рахъ бохийо сукІо ахъца.

*Самариялила сид аьлІа
Исал гьѳѳѳлъи йѳйэш*

⁵¹ Жу гьа^Нсаъ э^Нкъал нуцІѳйо водѳѳ кьѳдо йѳ^Нвакъальѳѳ, Иса Иерусалимлиъ э^Нкъал гьѳѳкмо бѳйо.

⁵² Жу ѳ^Нкъѳлѳѳл гьаьдурлъилал Гьинис асгъабла мѳйо. Мекъена Самариялила сид аьлІаъ бечейѳ гьѳллѳл, Иса ѳ^Нкъѳлѳѳл гьаьдурлъина йѳгъна. ⁵³ Амма гьулиъ Иса кьабул ѳйэш, Гьули Иерусалимлиъ э^Нкъѳцас икъѳѳ. ⁵⁴ Вагъли йикъѳѳ, асгъаблѳ Якъубина Иоаннина нисойо:

– Йа БетІерчІахъаяв! Дул йадда иле нисал, Иляс авараглицой, гьолло аьдамлал гъа^Нсаькъа цІойис балагъ мокъонна бувагьолалІо.

⁵⁵ Амма, кІаьйна уь^Нхона, гьоллос гьокІа йоваьиллийо:

⁵⁶ – Мизол бийакъаьас миже нйа Ругьлис гаьгьийа̀на. Аьдамлис Оьжо дуниялликъа о^Нкъона гей аьдамла хьосар бовал, бувагьолал гаьа Гьули дуниялликъа ахъна.

Бета гьулиьис Исана асгьаблана балІо аьлІаь мекъейо.

Иса авараглигъой муьгьалІ мекъейо

⁵⁷ Гьид мекъешлаь, сид сукІо Исахъа нисойо:

– До гѳс Дугъой, Ми нѳ э^Нкъедана.

⁵⁸ Иса гьолцохъа нисойо:

– Сорѳс йецаь кьѳьчІова гей, гъа^Нсаьла мигьнѳс сй^Нѳо гей, амма Аьдамлила Оьждис кьѳьм гулал маьче гаьа.

⁵⁹ Иса бацохъана нисойо:

– Тос Дйгъой.

Гьолцо жаваб нилІийо:

– Йа БетІерчІахъаяв! Гьакъкъа дил изно нилІа дие угъойо або и^Нхьолал.

⁶⁰ Амма Иса гьолцохъа нисойо:

– Бувагъовā аьдамлā гьидес бувагъовā мийахъолала, ми э^Нкье Аллагълила Парчагълис хабар мейал.

⁶¹ Бацосола Гьолцохъа нисолло:

– До Дүгъой къацІо говал, БетІерчІахъаяв! Амма агъло-хъизаллихъа ахо бечелІо нисал изно нилā дил.

⁶² Гьолцохъана Иса нисойо:

– Маьче болІослаъ боьосбас мигъна йохна, муьгъаттā говацІоцас сукІо Аллагълила Парчагълиъ кьухъаьас.

10 къаьм

*Иса алІнайиг асгъаб халкъилал
ваъза-насигъатлил э^Нйо*

¹ Гьольльогъа муьгъаттā Кьоддāла Иса бетана гьакІийо алІнайиг асгъаб. Кьō-кьона хьогъна гьоллōл мейо жу э^Нкьал нуцІоцала шибаб шагъарбāъна аьлāъна. ² Гьоллохъана нисойо:

– Мицаль тели муькьо йахъна гей, йокІолцас аьдамла йоькькьа гей, вагъальльобза муькьовāла БетІергъаллихъа гьарзи йова Гьинис муькьо йуь^Нвал буьгъдабагийя мейалІо нисона. ³ Гьа^Нже мекье! Гьуна До

миже мѣш, бацІлѣъ э^н до лІилейѡлцой. ⁴Къа-
цІо йейазѣкъа йа окколас боъѡ, йа хур-
жалла, йа гьалальцова; гьид кези ахъийал
гьѡ^нссидинна саламна нилІѣкъа*. ⁵Нййа
билІѡъ мекъедана, гьакъкъа аь^нйддѣ ниса
«Ассаламу алайкумІѡ (рекъел мизолІѡ)»
нисона. ⁶Гьулиъ э^н до саламатаб сукІѡ зогъ-
да, мизос салам гьолцо бохас, зогъаъда ми-
зодой къѣъ мокъас. ⁷Гьольльѡ билІѡъ бече
миже бес-хулІона, билІѡла бетІергьалли
йѡйѡ гьоболльина къабул йогъна. Загъ-
мат-гьилликъа шапакъат михъос. Гьѡ^нс би-
лІѡъос балІѡ билІѡъ боъвачона мекъѣкъа.
⁸Нѣди шагъарбаъ миже мокъоль къабул
богъда, гьулиъ бече, бесал нилІийѡ кенна
йуь^нхъа. ⁹Гьулиъ гаьгъийѣ кІовакІовѣна
бѣхъла, Аллагълис Парчагъльи гьицакна
гейлІона ниса гьоллохъа. ¹⁰Амма нѣди ша-
гъарбаъ мокъоль миже къабул боваъда,
гьулиъис къатІлиъ гисабакна боъвачошлаъ
ниса: ¹¹«Мизола шагъарбаъ илла хаьбалѣ-
къа йечейѡ пахна иле мизокъа пахлІолца.
Амма йикъе мизолзу Аллагълис Парчагъ-
льи гьицакийѡльи».

* 10:4 Заман аьдада бугьолѣкъалІѡ нисойѡ маъна гей
вагъальльѡс.

¹² Гьуна мизохъа нисос: вагъли къиямасаб водо кьодо йо^Нкъоль, Содомлила* халкъилал пигъалъи йахъца гьольлъо шагъарбала аьдамлалгъа. ¹³ Балагъ мокъос дукъа, Хоразин! Балагъ мокъос дукъа, Бетсаида! Судло нисода мизоллъийа караматла Тирлилана Сидонлилана** аьдамлал йегабанна зувакьойокъода, къена бечена – цюцюйо мухунна лъичлена, къаьмкъа йаллона чаллена***, гьолло гъехзу тавбана богъна, Аллагълильдә муьвахаш гъаь. ¹⁴ Амма къиямасаб водиь Тирлинна Сидонлинна пигъалъи йахъца мизоллагъа. ¹⁵ Мина, Капернаум, гъа^Нсаьад бежеш? Журжагълиь тIутIас ми!

¹⁶ Мизохъа энекси бахъийа Дихъана энекси бахъца, миже атә бовахийа Дона атә охца; атә До охийа, До э^Нйо Аллагъна атә охца.

* 10:12 Содом – аьдамлаш мунагъла телибалълъо, Аллагълис симо бигъна бугьолло шагъар.

** 10:13 Хоразин, Бетсаида – Галилея улкалаь гагъийа шагъарба; Тир, Сидон – ралъадбадой гагъийа мажуслас йукъа капурабла шагъарба.

*** 10:13 Тавба бовас аьламат.

АлІнайиг асгъаб къаъ о^Нкъос

¹⁷ Къаъ мокъойо гъоггѳл алІнайиг асгъаб-ла, йилІа разина бāхъна Исахъа нисойо:

– Йā БетІерчІахъаяв, зинналлана мутІиъ йāхъца илол Дибо цā^Н йагъоль.

¹⁸ Гъолцона гъоллохъа нисос:

– Дил кайлІѳцой гъа^Нсаъас бекцас илбис бегāйо. ¹⁹ Гъуна, бекелāна, аькъараблана йовацлална, къацІцІѳ тушмаллāла къуват-ликъа гъаьлкІѳлѳина До мизол нилІна гей; мизол гъогло зарал боваъас. ²⁰ Амма зин-налла мизол мутІиъ йахъналІона, гъольльѳ-къа миже рази бахъāкъа. Миже рази бāхъ мизос цā^Нда гъа^Нсаъ чāхийакъа.

²¹ Вагъаллъѳ мехлаъ Жу Илагъияб Ругъ-лис оцІийа Иса рази ахъна нисойо:

– Дул рец гей, Дие Або, зоб-ракълис БетІергъан, Ми цІѳдораблāкъасна аькъи-лаблāкъасна балъго йогъна, къовал вагъди къацІцІѳ жо загъир йойо. Й^Н, Дие Або, вагъальльѳѳ гей Дибола цІѳблис аьтІилъи!

²² КъацІцІѳ жо Дил Диела Або нилІна гей. Аболлāъ, гъѳ^Нсидинна икъаъас Оъжо. Оъж-дилнāъ, Оъждил Або икъелал атІийалнāъ, гъѳ^Нсидинна икъаъас Або.

²³ Бадлоъос жужна багъона асгъаблāхъа нисойо:

– Гьардарабла гей вагъди къацІцІо жо йегацаса мизос гъаьйда, ²⁴ судлІо нисода До мизохъа нисал, тели авараглāнна падишагълāнна йатІна зукъойо мизол йегāйо жо йегāl, амма йегайэш. Мизол тухъийо жона тухъал йатІна зукъойо, амма тухъеэш.

Гургъараб Самариялила сукІокъас хабар

²⁵ Гъуна вагълиъис сид диниябли аьлимчийа Гъули икъелал атІна суал нилІийо:

– Йā Муалим! Абадияб билІос бутІа дил михъал нуцІода, сийод до йовал нуцІос?

²⁶ Иса суаллид къаь жаваб нилІийо:

– Къанонлиъ нигъад нисона гей? Сийод дул чахна йи^Нхъос вагъальлъос?

²⁷ Гъолцона жаваб нилІийо:

– «Дул дибозу БетІергъан Аллагъ дибола къацІцІо йакІидна, дибола къацІцІо ругълидна, дибола къацІцІо къуватлидна, дибола къацІцІо а^Нкъло-пикроладна атІ», бета: «Дибо гъицасна мицойзу атІ».

²⁸ Иса нисойо гъогцохъа:

– Ми битІун жаваб нилІийо. Гъуна вагълā уь^Нхо-аь^Нхе, дул абадияб оьмро михъас.

²⁹ Амма гьолцо жу битІараб ахъал икъе-аькъена къаьна нисолло:

– СукІод «дие гьицас» ахъца?

³⁰ Иса вагълиъисзу гьолцол жаваб нилійо:

– Гьо^Нс пуланаб сукІо Иерусалимлиъис лийода Іерихонлиъ э^Нкъеш зукьона. Гьид гьули къачагълал и^Нхьона гей. Гьоллол, гьогцохъас льицІона йагьона, угъал о^Нкъова гъаьллъилакъа аькъеланна аькъенна, гаьльлъаьчо гьулина эчаннегъна, боьвачона гей. ³¹ Гелокъас вагъальлъо гьид лийода э^Нкъеца с гьо^Нс кашиш гьолцо сукІокъа къодо о^Нкъона гей, амма гьуги эгаль гьинолила балІосола раьаллиькъаь оьчона гей. ³² Вагълă къодо о^Нкъона гей левитлăс* гьо^Нс сукІона, амма гьулина вагъаллăзу гьинолила балІосола раьаллиькъаь оьчона гей. ³³ Гьо^Нс пуланаб Самариялиъис сукІо э^Нкъешлаь, гьолцо аьдамликъа къодо о^НкъойолІо. Гьули эгаль, гьогцокъа йакІо йугьона гей. ³⁴ Гьицакна гьогцос лаьхъла, зайтуллила йе^Нлълидна гьинолидна низабанна низабана, шовашона гей. Бета гьинила а^Нукъа къайкъена гонна,

* 10:32 Левит – Аллагълила билІоь кашишлала хьул-лукълил комак богъцас аьдам.

петерлиъна эжена, гьогцол бовал нуцІойо тимар богъна гей. ³⁵ Бета хиса гисакалдайлил петерлила бетІергъаллихъа къона динарна нилІна нисона гей: «Вагъацо сукІол бовал нуцІойо тимар бова, гьольльогъа тели окко йугъода, до къаъ о^Нкъоль дул нилІал».

³⁶ Къачагълал и^Нхъойо сукІол дибола пикролаъ лъаниъ э^Ндос сукІосод гъи^Нцас зогъал?

³⁷ — Гьолцокъа йакІона йугъона комак бѳйосо, — лѳо нисона жаваб нилІийо диниябли аьлимли.

Исана нисойо гьолцохъа:

— Э^Нкъена мина вагъаллā йова.

Иса авараг Мартадойна Марияндойна

³⁸ Гьоддѳл вагълиъис мекъешлаъ, Иса о^Нкъос сид аьлІаъ. Гьо^Нс пуланаб Марта-лѳо нисоцала аьдамли Иса гьоболлъилаъ окІца. ³⁹ Гьольльѳос зукъона гей Мариянлѳо нисона ца^Н гаьгъийо иси. Исала хаьбалагъа къѳна йечена, иси Гьогцола хабарлихъа энекзи йахъца зукъойо. ⁴⁰ Марталѳо нисода, Гьогцол йукъо гьоболлъи йовал йикъе-йаькъеш зукъойо. Исадой гъицана гигъна, Марта нисос:

– Йā БетІерчІахъаяв! Дул букъо ургъел-на зогъаъас, до иси гъо^Нсцо йечаннегъна йикъе-йаъкъейас. Дил комак бовал йаъгъиъ-лѠ ниса исихъа.

⁴¹ Иса гъольлъол жаваб нилІийо

– Марта! Марта! Ми тели жойлас ургъел бохца. ⁴² Амма йовал нуцІойо жо гъо^Нс гей. Гъуна Марияни кІетІо аъмал къодос гъа^НкІ-на гей, вагъло гъольлъохъас гъо^Нссидина багъаъас.

11 къаъм

Иса асгъаблāl доъа бовал малъзи бōс

¹ Гъо^Нс пуланаб мицаъ Иса тІаъатлиъ гаъгъийаъ, Гъолцос гъари-доъа больолъ, сидцойсола асгъабли Гъолцохъа нисолца:

– Йā БетІерчІахъаяв! Ягъя гъинила ас-гъаблāl малъзи бōваъцой, Ми илолна доъа-гъари бовал малъзи бова.

² Гъогцо гъоллохъа нисос:

– Доъа богъцалаъ вагъдā ниса:

«Йā Або, Дибо цā^Н аьдамлā илагъияб бикІзи йовала,

Дибо Парчагъльи йо^Нкъала;

³ Шибаб водиъ баццас баъба илол нилІа;

⁴ Илла мунагълакъас кьодос тилѠки, судлѠ нисода илена кьаѠѠѠола илол кешлъи йѠвакъас кьодос тилѠбакца.

Ми илос гъаьл бикъелална уь^Нхольаъкъа».

⁵ Бетана Иса гьоллохъа нисос:

– Мизола сидцойсолас ахъас гьо^Нс гьалмагъ. ЙалѠохъовадда гьогцодой билѠогъа э^Нкъена ми нисас: «Йа гьалмагъ, боѠѠолъана баьба нилѠа ми дил, ⁶судлѠ нисода сапарлиъис гьо^Нс гьалмагъ о^Нкъона гей дидой, гьолцодой аь^Нйда гулал кен гаъа дие». ⁷НилѠалди дул гьогцо билѠоь э^Ндолакъа вагъаддийо жаваб: «Дие раьгъат бугъолакъа: а^Нцна гъешена гей, кьована буьчабахена гей дидой мокѠолаъ, до аьгъиъна ахъаъас дул баьба нилѠал». ⁸Мизохъа до нисос: нагагъ гьули аьгъиъна гьалмагълис къимат богъна баьба нилѠаъда, кьодос олъечѠе гьарзи йѠвахъа, аьгъиъна гьокцо дул оьлло баьба нилѠца.

⁹Вагъальльобза До мизохъа нисоцас гей: Гьарзи йова миже – мизол нилѠас, йи^Нза миже – йи^Нхъас, а^Нц кьоьпѠѠола – мизол йе^Нгъас. ¹⁰СудлѠ нисода шибабли гьарзи йѠвал ницца, йи^Нзийал йи^Нхъос, а^Нц кьоьпѠѠоллал йе^Нгъеш. ¹¹Мизоь э^Ндо гейд гьо^Нс-дана або оьжди биса бокѠльо, гьольльѠола

мицаъ гьолцохъа бекела ниццас? ¹² Йаги цІемуцІ гьарзи бѡль, эггу гьолцол аькъараб нилІалди? ¹³ Пал гьаьсил, лъакъейā гаьль-дана, кьовал кІетІо шинаб жо мизол нилІал йаццалаъ, гьарзи йѡвал ла телид нилІал гьа^Нсаъла Або Илагьияб Ругьліс йо^Нкьойо кІетІо шинаб жо!

Исад йаги зинналлās ханди?

¹⁴ Гьакъкъас сид сукІола магьоѡс Иса боцІийо аьдам йаьжегаччо огьцас гьо^Нс зиннал. Зиннал болъона муьгьаттā гьули сукІо икълашал уь^Нхолъийо, гьольльокъа халкъна гьайран бахъийо. ¹⁵ Амма халкъилаъ э^Ндо гаьгьийā садло нисос зукьойо, Гьолцо инсаллиъис зинналла йоваццалІо зинналлās хан Беэлзебуллила комаклид. ¹⁶ Иса икъелал атІна, бадло аьдамлā гьолцохъас тІалаб йѡс зукьойо гьа^Нсаъас аьламат бегалалІо нисона. ¹⁷ Гьоллола йакІиъ гаьгьийо жона йикъена, Иса нисойо гьоллохъа:

– Улкалиъ сидхъа-гьо^Нсо аьдамла бейагъда, гьули йоьчІольча; хьизан кьондā битІда, гьолона бугьос. ¹⁸ Нагагь илбислās Парчагьльи кьондā йитІда, нигьад гьоллос ханлъи

гъихлъал? Мижейаъ нисос До зинналла аьдамлаъаш Беэлзебуллила комаклид йоваццалю. ¹⁹ Нагагъ До гьоллѳл Беэлзебуллила комаклид йовацца зовагъда, мизола къова лъѳла комаклидди йовацца? Вагъаль-лъобза мизол гьоллѳл къадилялаъ бѳхъца. ²⁰ Амма До зинналла Аллагълила гъаьлкѳлъилад йуьвагъонна йовацѳлъо, гъай-гъай Аллагълис Парчагълъи мизокъана йо^нкъойо. ²¹ Кѳъ ярагъна жуна сид залимабли сукѳо гъинис билѳо цѳуми йѳс зогъда, гьолцола боцѳи-ризкъилал гъинкъи гаъа. ²² Гьолцогъа къуватаб сукѳо къодо огицѳда, гъули уьволаш, гьольлъокъа йакѳо йо^нкъойо йарагъна гьолцохъас йагъос, бета боцѳи-ризкъина битѳца. ²³ Дѳгъой къацѳо гаьччо сукѳо Дил данде эчейо ахъца. Дѳгъой къацѳѳо боцѳи бокѳолаъцала бокѳоллона цацакѳзи бѳс.

Зиннал гъинила билѳѳ мекъеш

²⁴ Инсаллиъис гисакна муьгъаттѳ, гъинил раьгъат-гъаьлки мизна чикейо зиннал лъи гаьччо авлахълаъ клѳьйлѳш. Гьолона ми-хъечѳе гьольлъо нисос: «Жу гисакийа билѳѳ къѳъ мекъеда, ахо гейлѳо». ²⁵ Къѳъ мокъоль, гьольлъол билѳо лъаьлѳена, ахо къачѳази

йогъна, йи^Нхъос. ²⁶ Бета гьольльо зиннали гьингъана лъакъейā алІна зиннал бакъоллис. Гьоллōл гьулиъ э^Ндо йечеш. Аь^Нйдā зукъоваълагъана лъакъейа азаблиъ ахъца гьули сукІо гьольльогъа муьгъаттā.

²⁷ Иса вагълā нисослаъ, ийоддāла аьдам-ли халкъилаъ э^Ндолакъā, лъōнназу тухъинна, нисос:

– Гьардараб гей Ми ойо,
Дул нене нилІийо, Дибо Ийо!

²⁸ Амма Гьолцо жаваб нилІийо:

– Гьардарабла гей Аллагълис калам тухъийāна, гьольльокъа муьхомахейāна!

Юнус авараглис аьламат

²⁹ Тели халкъ къацІобаклъо, Иса нисойо:

– ЙилІа пасадаб гей же замаллис уммат! Гьолло аьламат мизца. Юнус авараглис аьламаттāъ, тІокІаб бадο аьламат гьоллōл бегāъас.

³⁰ Ниневиялила* халкъилал Аллагъли аьламатлилаъ э^Нйо Юнус аварагцой, вагъалІо

* 11:30 Ниневия – Юнус аварагли ваъза-насигъат бōлъ, тавба бōйо мунагълās боцІна зукъойо шагъар.

умматлил аьламатлъилал Аьдамлис Оьжо ахъца. ³¹ Къиямасаб водиъ вагъалӀо умматлигъой гъисаб-суаллил йаьгъиьца къилмалильдӕ гаьгъийо йукъо пача*. ГьоглӀо гьоддӀол ритӀухъабла боваъас, судлӀо нисода дунияллила раъалликъас гийо гього Сулайман авараглила йаьжлӕхъа энекзи йахъал. Гьуна гьолӀоъ гей Сулайман авараглигъана къоддӕс! ³² Ниневиялис халкъна баьгъбаьча къиямасаб водиъ гъисаб-суаллил вагъалӀо же замаллила умматлигъой. Гьоглона гьоддӀол ритӀухъабла боваъас, судлӀо нисода Юнус авараглила ваъзалахъа жувӀол энекзи бахъна муьгъаттӕ, гьидена тавба бӀоль. Гьуна гьолӀоъ гей Юнусгъана къоддӕс!

Гухъилла сантелийакъас хабар

³³ БилӀоъ гухъилло сантели лъона йегӕъцала мицаъ гулассаъ, йаги гьули къодо хавтӀа-шаг гунна къаьхъашшаъ; э^ндо гугъцалӕл канлъи йахъальгъа, канаргъолкъа къодо гулца гьули сантели. ³⁴ Инсаллила магъос чирахъ йахъца гъаьй. Дибго гъаьй йа^нцӀо

* 11:31 Сабаъ улкалис Билкъис пача.

зогъда, канлѣи ѱ^Нкъос дибола къацІцІо магъоѡ. Дибо гъаѣй дугълІо зогъда, дибо магъона колІлІо бахъийо. ³⁵ Пал гъаѣсил, го-цІохъ, дибо гаѣгъийо канлѣи дахход гей? ³⁶ Дибо къацІцІо магъо канлѣилас боцІна зогъда, гъо^Нсна боцдийо лагана зогъаѣда, бета ми ахъца бабала лампала дул канлѣи ѣикъеллийаѣлѣийо.

*Фарисейлана диниябла аѣлимлана
какзи бовагъца*

³⁷ Исас ваѣза больоль, сид фарисейли Гъули эсал окІийо. БилІоѡ о^Нкъоль, Иса супралдой гъица къѣ эчейо. ³⁸ Фарисей гъай-ран ахъна гъихлъойо, Иса кѡда низабайчІе эсал къѣ эчель. ³⁹ Къоддѡла Иса гъолцохъа нисойо:

– Же миже, фарисейлѡ, жигар багъос цІараѡ къодтуцІо низѡл, амма миже э^Ндос чикейѡ гей; миже э^Ндо хъантІлъиласна сѣ-масна бовацІна. ⁴⁰ А^Нкъло гаѣччѡ миже! Лъод гиса гаѣгъийо жо ѣахъинна, Гъолцозу гаѣ-ѡад э^Ндо гаѣгъийона ѣахъинна? ⁴¹ Мизоѡ э^Ндо гаѣгъийо жо миже нилІцакъодѡ сада-къацей, мизос къацІцІо жо ѣа^Нцас гаѣ. ⁴² Балагъ-азаб мизол, фарисейла, судлІо

нисода миже закаѣатлил нилІца самлисна, садаблисна*, баддѡнна кенлиѣ тувакІцала бохѣсна ацІонас бутІа, амма ритІухѣльи-ласна Аллагѣлиѣ рокѣиласна миже тІалаб боваѣас; гѣулина йовал нуцІос, вагѣдисона йойчІе йечаннейал йахѣаѣас. ⁴³ Балагѣ-азаб мизол, фарисейла, судлІо нисода мизол йац-ца мизола синагоглѣѣ бадлогѣа аѣ^Нйдѣ бѣхѣал, гѣулазу аѣдамла кѣацІобакІийа мицаѣ мизол рец-салам бовал. ⁴⁴ Балагѣ-азаб мизол, судлІо нисода миже гей йегабѣѣѣас шунѣлѣийа; кѣодолакѣѣ мекѣе-гугѣцала аѣдамлѣл гѣоггѡл йегабѣѣас.

⁴⁵ Вагѣальлѣѡ мехлаѣ гѣо^Нс диниябли аѣлимли нисос Гѡлцохѣа:

– Йѣ Муалим! Вагѣаллийо йаѣжбона нийасона, Ми илена нуькучІчІѣѣ бовагѣѣа.

⁴⁶ Амма Гѡлцо нисос:

– Мизокѣана – диниябла аѣлимлѣкѣана – мокѣос балагѣ-азаб, судлІо нисода миже аѣдамлѣла михѣѣкѣа гулца йежена йахѣаѣѣас йаѣкѣ, мизоллІо нисода гѣольлѣол зокѣона мехелал батІаѣас. ⁴⁷ Балагѣ-азаб мизол, судлІо нисода мизола умумаллила аболѣ бийакѣейа авараглѣла шунѣкѣа кѣодо

* 11:42 Садаб (рута) – бохас цѣ^Н.

мазарла* йовагъльо. ⁴⁸ Вагъальльос миже нуъъла гей. Миже йегалца мизола умумалли йойо жо битIараб гагъгийолъи. Гьогло аварагла бийакъейо, мижелIо нисода умумалли бийакъейā авараглаIа шунакъа мазарла йовагъца. ⁴⁹ Вагъальльобза Аллагълила А^Нкълола нисона гей: «До гьоглодой авараглана чапарлана мейагъал, амма гьоллоллIо нисода гьо^Нсо бийакъас, гьо^Нсо бовацIас». ⁵⁰⁻⁵¹ Дуниял бижжи бахънас Гъабиллийкъā муьхолъна Аллагълила билIоъ кьурбан мухоцала мицаъ алIо икъейо Закария аварагликъа мокъоцал къе мейо гье^Нйас гъаькъ боцIоллис гьодло умматлид. Гьуна До нисос мизохъа: вагъадло умматлихъас тIалаб бовас бийакъейāс къе мекъейо гье^Нйас гъаькъ. ⁵² Балагъ-азаб мизол, диниябла аьлимлāл, судлIо нисода миже йоькчина гей лъайлис йига, амма мижена э^Ндобакеш, э^Ндобакал батIийāна мейэш.

⁵³⁻⁵⁴ Вагълā ваъзана богъна гисакна къāъ э^Нкъецалаъ, диниябла аьлимлāна, фарисейлāна, Гьолцокъа симабахъона кьодо гъуваъцой Гьули кьорлиъ охальгъа, бетана лади

* 11:47 Мазар – ахо къачIази йойо шуна, мавзолей.

жойлас нисолца зукъойо. Гьоллол йатІна зукъойо Иса нигъади нисова йаъжлāкъа охна аьйиб мокъолал.

12 къаьм

Иса асгъаблāl а^Нкълова нийацца

¹ Вагъальлъо мехлаъ гъаза-гъазайлāд аьдамла къацІобакна йукъо къолІолабālъи зукъойо. Сидил гьо^Нсо бовацилло гъаьллъи-лакъа зукъойо гьоллос иш. Иса гъакъкъа Гъинила асгъаблāхъа икълашал уь^Нхолъийо:

– Вере миже цІуми бāхъ фарисейлāла ха-шилакъас, гъай гьоллола къондā моькъоко-лъи йōвакъас. ² Гьо^Нсна йу^Нцойо жо йикъечІе гъихлъаъас, вагълāзу гьо^Нсна балъгояб жона загъир йахъечІе гъихлъаъас. ³ Вагъальлъоб-за нише колІлаъ нисойо жо, качельлъол тухъцаслъи йикъе; э^Нддāла билІоькъā лъō-лади аь^Нгъалагъа нисойо йаъже, къамā-къалкъā нисона лъōнназу тухъцаслъи йикъе. ⁴ Мизохъа, Диела гъалмагълāхъа, нисос: ма-гъо бикъецалāхъа гъийабацІāкъа*, тІокІаб

* 12:4 Мизол хел мокъолцалāхъа гъийабацІāкъалІо нисойо маъна гей.

гьоллохъа мизол гьобшшона йогъна йахъа-
ъас. ⁵Амма нисал мизохъа, лъохъа гьийаба-
цІал нуцІоцасна. Миже гьийабачІе, бийа-
къена муьгъаттā журжагълиъ тІуватІиллина
бāхъийахъа. Гьула мизохъа нисос – гьол-
лохъа гьийабачІе. ⁶Къон ассарийаъ* гаъад
бохал михъос лъина мигъна. Амма гьолло
мигънāсна тІалаб-агъаз бōс, Аллагълил
гьо^Нсна мигънана шоъанна шоъаъаш. ⁷Ми-
зола къаьмкъа гаьгъийо гьули ке^Нйана
хъогъна гей. Пал гъаьсил, миже гьийабацІā-
къа: телила мигънāгъа хириябла гей миже.
⁸Гьуна мизохъа нисос: Аьдамлāдой аь^Нйдā
дие рахъ бохийо сукІос, Аллагълила ма-
лаиклāдой аь^Нйдā Аьдамлила Оьждина рахъ
бохца. ⁹Аьдамлāдой аь^Нйдāкъа Дйкъас инкар
бōйо сукІокъас, Аллагълила малаиклāдой
аь^Нйдā гьолцокъас Дона инкар бōс.

¹⁰Аьдамлила Оьждихъа данде йаьже ни-
сойо сукІокъас Аллагъ къодос тилІкис, амма
Илагъияб Ругъликъа калІ йи^Нхъōйо жо
йекІийакъас къодос тилІкаъас.

¹¹Синагоглиъна бейажена, халлāдойна гъаь-
кимлāдойна аь^Нйдā баьгъбаъинна беченна

* 12:6 Ассарий – Рим шагъарбаъ бадōльо гъаьлтІизи
йогъцас нуьшшо окко.

муьгъаттā, миже гьоллокъас цІуми бāхъаль-
гъа сийоди нисалласна, йаги нійо жаваб
нилІалласна ургъел бохāкъа. ¹² СудлІо ни-
сода Илагъияб Ругъли малъзи йовас вагъак-
лІо саъатбаъ мизол нисал нуцІоцас жо.

Аьнтаб бечедаб сукІокъас хабар

¹³ Сидцойсола халкъилаъ алІолакъā ни-
сойо Гьолцохъа:

– Йā Муалим! Ниса диела истІихъа ирс-
лис дил мехецас бутІа нилІалІо нисона!

¹⁴ Иса гьолцохъа нисойо:

– Йе аьдам, мизос даъьба-диван больо-
лална ирс битІанна голло сукІод гей До?

¹⁵ Бета Гьолцо къацІцІолахъа нисойо:

– Вере миже хъантІлъилакъас цІуми бāхъ,
судлІо нисода дуниялликъа тѣли бахъийа
боцІи-ризкъилакъа бараб гаъьа аьдамлис
оьмро.

¹⁶ Вагълāна нисона, Гьолцо мейо гьо^Нс
хабар.

– Гьо^Нс бечедабли сукІола мицаль йахъ-
на гей йокІонна гъаьл мокъойхъезш тели
муькъо. ¹⁷ Гьинис гьинил пикро богъна гей:
«Сийод до йовал, муькъо гулал оьлло
маьче гаъьāъ?» ¹⁸ НисойолІо: «Гьуна до

вагъдā йовал: келлā баъкълана кейашена
гьоллогъа йукъāна ицІцІāна баъкъла йова-
гъал, бета бахъийо хъибона гаъгъийо бече-
лъина э^Ндо йуъ^Нхолал. ¹⁹ Бета до диела
ругълихъа нисал: „Йā дие ругъ! Гъуна дул
лади лІййаъ оьлло кен-о^Нхна бечелъина гей.
Раъгъат бокча: беш, хулā, кеп бокча гъа^Нже
ми“». ²⁰ Вагълиъис Аллагъли нисона гей
гьолцохъа: «Йā аьнтаб инсан! Жейса нише
дибо ругъ багъас. Лъōлди гъихлъос ми йо-
кІолло бечелъи?» ²¹ Вагъаллийо бахъца дун-
ялликъа бечелъи йокІолло сукІос къисмат.
Аллагълидой аъ^Нйдā гъули бечедаб гаъъа.

Иса асгъаблāхъа ургъел бохāкълō нисос

²² Бета Иса Гъинила асгъаблāхъа нисойо:

– Вагъалъльобза мизохъа нисос: сийоле
йакІил йуъ^Нхъал йатІаллāлІона о^Нхасна,
сийоле магъокъа лъицІал йатІаллāлІона
лъицІосна ургъел бохāкълā. ²³ Судлō нисода
кенлигъа аъ^Нйдāш гей ругъ, лъицІогъа аъ^Нй-
дāш гей магъо.

²⁴ Гъаьдлāхъа гуцІобахъ миже: гьолло
йа муькьо йи^Нзаъас, йа йуъ^Нваъаш, йа гьол-
лос амбар-баъкъна гаъъа, амма Аллагъли
гьоллōл йегъабакІца. Амма мигънāгъа ласо

хирияблад зогъал миже! ²⁵ Лади миже бикъе-баъкъедана лъѡхъана бахъалди мизос оъмро гъо^нс водо бихалокІна? ²⁶ ИтІино жо йогъна йахъаъцаса миже, йукъо йовал суд бикъе-баъкъеш?

²⁷ Мицаль гаъгъийа цІикла-диъилāхъа гу-цІобахъ: гъолло йа йѡъхош йоваъас, йа гъечІе йоваъас. Амма гъуна мизохъа До нисос: гъинила машгъурлъилаъ гъакъкъана Сулайман аварагли лъичІеэш вагъалло ди-ъилā лъичІейа лъицІогъа къухъийо лъицІо. ²⁸ Йā миже, йакІиъ даъгъаб божи гаъгъийо уммат! Жейса мицаль гаъгъийа, хиса цІѡъ гулцала диъи-бохална Аллагъли вагъаллийо къухъийо лъицІо лъичІеллъо, ла кІетІо лъи-цІод мизол лъичІелал.

²⁹ Вагъальлъобза мижена, сийоле йуъ^н-хъаллІона келлисна, сийоле хулІаллІона хулІоцала жойласна, ургъел бовāкъа. ³⁰ Ду-ниялликъа гаъгъийа аьламלי вагъли жо йи^нз-ца. Амма мизола Абол йикъеш мизол вагъли йаццаслъи. ³¹ Миже аьмал бова Аллагълила Парчагълиъ кези бахъал, бади гъихлъѡ ши-наб Гъолцо мизол къодона ницца.

³² Миже гъийабацІāкъа, итІино рехъен! СудлІо нисода илла Абос мизол Парчагълъи нилІал хийал гей. ³³ Мизосзу боцІи-ризкъина

мисона садакъа йовагъа. Йаъхаъчаш-йоъ^Н-шойбацІаъцас боъьована йовагъа, гъа^Нсаъ гаъгъийо бугъаъцас, къокъаъцас хазинана бокІола. Гьоло хазина гъа^Нсаъ йа гигълагийа муцаъас, йа сидала муъхъаъаш. ³⁴ Мизос хазина гаълълъаъчо мизос йакІона йахъца.

*Нитоназу гъабдурса бецал
нуцІоцалас насигъат*

³⁵ Нитоназу тицІийа о^Нхакъа йе^Нйахенна къачІази бахъна бече, гувахъинна кана йечабаннейа. ³⁶ Бейтелликъа э^Нкъейо билІос бетІергъан о^Нкъаллахъа гувабацІона бечейа нукарлалъийа бахъ мижена – Гьогцо о^Нкъона, къоьпІлІоллоназу а^Нц йе^Нгъальгъа. ³⁷ Гъардарабла гей бетІергъан о^Нкъоцал буъчабаъхечІе мийахъовā лагъла. Гъаькъкъаб жо нисос мизохъа: гьолцо бетІергъалли вагъаллийа нукарлал оьло лагълас лъицІона лъичІеш, истІолийагъа къена беченна гьоллōл хъуллукъна бос. ³⁸ Гъардарабла гей нито о^Нкъодана: йалІохъоваддā, йаги хиссакъа вагъаллā о^Нкъаллахъа гувабацІона бечейа лагъла. ³⁹ Амма мизол йикъеш: билІола бетІергъаллил гигълагийа о^Нкъоцас мех бикъешкъодā, гьолцо гигълагийад йо^Нсо йоъ^НтІоллаъаш

гѣъ. ⁴⁰ Мижена гѣъдурлѣилаъ бече нитоназу, судлѣо нисода Аѣдамлис Оѣжо мизол икѣаѣцала мехлаъ о^н кѣас.

Божѣ бовал бахѣцасна хиянатабна

⁴¹ Вагѣальлѣо мехлаъ Петери Исахѣа нисойо:

– Йѣ Бетѣрчѣахѣаяв! Илолди Ми вагѣло мисал бакѣос, йаги кѣаѣцѣо халкѣилалнади?

⁴² Кѣоддѣла Иса жаваб нилѣийо:

– Гѣо^нс пуланабли сукѣол, кѣаѣцѣѣа лагѣлѣс тѣалабна бовалѣо гѣоллол боглаъ кен-о^нхна нилѣалѣо нисона эчаннейо лагѣ, бетѣргѣан о^нкѣоцал ахо уѣ^нхо-аѣ^нхена огѣдацас и^нхѣода, гѣули а^нкѣлояб лагѣ ахѣца.

⁴³ Бетѣргѣалли гѣини нисогѣа йогѣна и^нхѣойо лагѣ гѣардараб гей. ⁴⁴ Гѣаѣкѣкѣаб жоцой нисос мизохѣа: бетѣргѣалли гѣолцохѣа нилѣас кѣаѣцѣо гѣинила билѣо-а^нхас ханлѣи.

⁴⁵ Амма нагагѣ вагѣлѣ эчаннейѣа лагѣли, гѣинис бетѣргѣан гѣех-мех о^нкѣаѣаслѣо нисона лагѣлана гѣарабашлана бѣѣкѣелал уѣ^нхольда, гѣулѣзу эс-хулѣовакѣа водбона йе^нйагѣда, цихназуна ахѣда, ⁴⁶ гѣолцол бетѣргѣан о^нкѣаллѣо йакѣкѣа гаѣчѣешла водѣиъ, гѣолцол бикѣаѣцала мехлаъ о^нкѣас;

бета гъули алІлЮдā а̀хелас, капураблāл бōйо тамбигь бовас. ⁴⁷ Гъинкѡа тІаддаб иш бовал нуцІоцаслѡи йикъедана, бетІергъалли нисогъана йоваѡаль, ахона уь^Нхо-аь^Нхаѡаль, лагълил тели чурукъ ѡе^Нхас. ⁴⁸ Гъинил йикъече ѡахѡийа такъсирлѡилал ѡоькѡкѡа чурукъ ѡе^Нхас. Лѡѡхъасназу, тели нилІийахъас дѡс тІалаб ѡовас, букѡо божи бōвахъас дѡс нисолас.

ЦІона кѡндā бийатІийолѡина

⁴⁹ ЦІона ѡо^Нкѡолал гогъна гей До дуниялликѡа. Дил вагъгā йилІа ѡатІна гей же цІоѡс бибидаро бахъал! ⁵⁰ До ѡукѡо э^Нхе ѡагъал нуцІос. Букѡа ургъелликѡа гей До нитоле вагъли ѡахъаллāлІона. ⁵¹ Мизол гицца зогъас До дуниялликѡа рекъел бовал гогъналІона? ГаѡѡалІо нисос мизохъа, кѡндā бийатІал гогъна. ⁵² Вагъалѡльѡобза желагъа муьгъаттā гѡо^Нс хъизаллиѡ лѡин сукІос кѡндā бийатІийолѡи ѡахъца: лѡана кѡнил данде эцас, кѡона лѡанил данде эцас. ⁵³ Кѡндā бийатІна або ѡждил данде, ѡѡо абол данде, ѡѡо киббал данде, кид ѡѡол данде, ѡукѡо ѡѡо гъинила ѡжди́ла ахъхъал данде, ахѡо ѡукѡа ѡѡол данде бейацас.

*«Же заман нійо гаьгьийона
суд мизол бикъаъас?»*

⁵⁴ Иса халкъилал хитІаб богъна нисойо:
– Бохъ тІикаџодѧкъа гъа^Нс цІодололъда,
вагъаллиъисзу миже нисос водис гъа^Нс
гейлІо нисона. Вагълѧ нисогъана йахъца.
⁵⁵ Къилмалиџдѧкъа залІо йикъеда, боьгьи
бахъцалІо нисос. Вагълѧ боьгьина бахъца.
⁵⁶ Къондѧ моькьовѧш миже! Гъа^Нса-мицас
гъаъл батІа йовал бикъеш мизол, суд вагъ-
до заман нійо гаьгьийона бикъаъас? ⁵⁷ Суд
миже мизос мизокъа пикро богъна нисаъас –
сийо битІараб гаьгьийона? ⁵⁸ Масала, дүль
даъба богъцас сукІона мина къадидой ди-
валлил мекъес зогъда, гъокцодой мекъешлаъ
миже бѧхъал йаьгъ багъа. Бетана гъокцо
сукІо ми къадидой хъахъалІолца; къади ми
нилІас э^Ндо гувалцала сукІохъа, гъогцо ми
тІусагъийаъ тІотІас. ⁵⁹ Нисос дүхъа, гисака-
ъас ми тІусагъийаъас, муь-муьгъаттѧ гъих-
лъойо окко нилІеэш.

13 къаьм

Тавба бовал нуцІоцалас аьгьи

¹ Вагъальлъо мехлаъ мовакьовѧ гъо^Нсо
аьдамлѧ Исахъа нисойо Пилати Галилея-

лиѣис аѣдамлана бийакъена гѣоллос гѣ^н
 Аллагълила билѣоѣ кѣурбаллил мухова
 боцѣилала гѣ^нѣагѣой лѣицѣхѣчѣиллолѣо
 нисона. ² Иса гѣоллохѣа вагѣальлѣол жаваб
 богъна нисойо:

– Мизол гицца зогѣас вагѣаллѣл аѣдам-
 ла вагѣлѣ бувагѣоль, Галилеялила бадло
 аѣдамлѣгѣа мунагѣ-гѣаѣкѣ тели гаѣгѣийѣ
 гейлѣона? ³ Гаѣѣалѣо нисос До мизохѣа:
 амма кѣацѣцѣола мижена тавба боваѣда,
 вагѣлѣ мижена бувагѣас. ⁴ Йаги гѣого Си-
 лоамлис* хѣала бекна лѣийо мийахѣовѣ
 ацѣона белѣна сукѣо Иерусалимлила аѣдам-
 лѣгѣа мунагѣ-гѣаѣкѣла тели зуваѣовѣлѣо-
 над мизол гицца? ⁵ Зукѣеѣшлѣо нисос До
 мизохѣа: амма тавба боваѣда, кѣацѣцѣѣ
 мижена вагѣлѣ бувагѣас.

Пихѣ нилѣѣѣцала легѣилала хѣхис хабар

⁶ Бета Иса вагѣаддийо хабар мѣйо:

– Гѣо^нс сукѣола венахийѣѣ zukѣона гей
 легѣилас хѣхѣо. Гѣули о^нкѣойолѣо легѣи
 йокѣолал, амма гѣолцол хѣхѣѣа легѣи йи^н-
 хѣона гаѣѣа. ⁷ Нисона гей венахи богѣцала

* 13:4 Иерусалимливѣ гаѣгѣийо хѣала.

сукІохъа: «Гъуна до лъана лїи гōйо, амма гъо^Нсна легъи гуцІона йикъезш вагъалІо хоъхкъа. БуъчІна болъола гъоло, нагъакъда маъче бохиллечІе». ⁸ Амма гъолцо нисона гей: «Йā БетІерчІахъаяв! Беччаннейа желІ-бассāза. До сō^Нгъой баъхал, гъольлъол йа^Н-ко гулал. ⁹ Бета гизилалдана йахъассаъад гъольлъо хоъхкъа легъи. Нагагъ йахъаъда, буъчІна болъолал».

*Шамат водиъ михъā гъоддо
аъдам йахъилло*

¹⁰ Шамат водлāъ Иса ваъза-насигъат бōс зукъона гей сид синагоглиъ. ¹¹ Гъулиъ зукъона гей ацІон белІен лїиъ кьодос болъаъ-цала унтилаъ кІокІойо, гъоддо, билъахъа къаъм йохна йахъаъцас гъо^Нс аъдам. ¹² Гъоло йегаль, Иса гъиндойдāна илІена нисос:

– Йе аъдам! Ми дибола узролаъас хъо-сар йахъийо!

¹³ Гъольлъоль кō йе^Нхелло. Вагъаллиъис-зу михъāъ йа^НкъойцІойо, бета гъоло Аллагъ-лил рец бовал йуъ^Нхолъийо. ¹⁴ Иса шамат водиъ вагъло аъдам йахъиллъо, Гъолцокъа симахъова синагоглила гъаъкимли халкъи-лахъа вагъдā нисойо:

– Илъна водо гей анкъилаъ батІтІийо гъаьлтІи бовал бахъцас. Шамат водиъ гуйчІе, вагъагло водлāъ гугъ миже сагъ бовагъал.

¹⁵ Гъолцол жаваб богъна Къоддāла Иса нисойо:

– Йā къондā моькъош аьдамла! Гейд мизоъ э^Ндо гъо^Нсдана сукІо сийаъас макна мизосзу о^Нс йаги а^Ну шамат водиъ лъи хулал бежеллаъцас? ¹⁶ Вагъдо, Ирбагъинила умматлис кид, ацІона белІна лІи илбисли йи^Нцона йохна зукъойо, шамат водиъ гъоло йа^Нкал йахъаъасди?

¹⁷ Иса вагълā нисоль, Гъолцол данде бечейā аьдамла ниц-ламус бāхъийо. Амма къацІцІо халкъ Гъолцо йовагъийа къацІцā гъикматаб жойлакъа рази бахъийо.

Генилала кІаькІалкъаш хабар

¹⁸ Бета Иса нисолло:

– Аллагълис Парчагълъи лъинилъ йе^Нлъейод гей? Лъинилъди До гъули йе^Нлъелал йахъца? ¹⁹ Гъули йе^Нлъейо гей генилала*

* 13:19 Инжил ТІекликъа чахна гей «Горчицалила кІаькІалкъаш хабар» – лІо нисона. Амма иллаъ мицаъ гъоло хоьхо гуцІаъас, гъоло нійо гаьгъийона би-къаъас. Вагъальлъобза гъольлъола мицаъ нилІийо «Генилала кІаькІалкъаш хабар» – лІо нисона.

кІаькІалилъ. Инсалли вагъло кІаькІа бок-
чина аьгъбаъ мижейо, гьолълъоькъа̄ букъо
хоъхо бахъийо. Мигънāна хоъхила аь^Нлейā-
къа гъидел сй^Нбо йовагъийо.

Хашилакъас хабар

²⁰ Бетана къāьна нисойо:

– Лъинильди До Аллагълис Парчагълъи
йе^Нлъелал йахъца? ²¹ Гъули йе^Нлъейо гей ха-
шилалъ: ийо лъана билей гъаьтІтІала йоь^Н-
тобаъ жу гунна муьгъаттā, къацІцІо йййа
йййакъалалъ. .

Хъуссā кавла

²² Шагъарбāъана аьлІāъана халкъилал
ваъза-насигъатна богъна Иса э^Нкъес зукъо-
йо Иерусалимлиъдā.

²³ Сидцойсола Гъолцохъа нисолло:

– Йā БетІерчІахъаяв! Йоькъкъа аьдамла
тиса муьвахошлІо нисоцас хабар битІараб-
ди гей?

Гъолцо жаваб нилІийо:

²⁴ – Хъусса а^Нциькъā э^Ндобакал гъаза бова
миже, судлІо нисода, мизохъа нисос, телидāс
бикъебакъеш э^Ндобакал, амма э^Ндобакна
бахъаъас. ²⁵ БетІергъалли аьгъиъна гъинис
кав гъешена муьгъаттā, гисдā гъихбалъовā

миже кьѡѳІІІолдабана илІелаб̄ас: «Й̄а Бе-
тІерчІахъаяв! Илол а^Нц ѳе^НгьалІо!» Гьолцо
жаваб нилІас мизол: «Миже н̄ас б̄ахъцасна
сукІо гаьгьий̄ана Дил бийакъаъас», – лІо
нисона. ²⁶ Бета миже нисал муьхобалъаш:
«Иле Дугъой къацІо бес-хулІойо, гьул̄азу
илла шагъарб̄ала къатІл̄аъ Ми илол ваъ-
за-насигъатла йовагьийо». ²⁷ Гьолцо бета
мизохъа нисас: «Дил миже н̄ас б̄ахъцасна
бийакъаъас, больо дидойс ат̄а къацІцІ̄а ме-
къаб жо йогъцаса аьдамла!» ²⁸ Бета мизол
гьулиъ, Аллагълила Парчагълиъ, бегаб̄ас
Ирбагъинна, Исакъна, Якъубна, бадд̄ол ава-
раглана. МижелІо нисода гиса тІуватІл̄ьо
бийабацасна сил̄а къисбалІолцасна б̄ахъас.
²⁹ Аллагълила Парчагълиъ гьидела мицаъ
бес-хулІал къе̄ бецал мокъас магърибли-
ъисна машрикълиъисна, гьул̄азу бихъхъаъ-
д̄алана о^Нкъкъаъд̄алана мицаъас аьдамла.
³⁰ Гьуна, гьо^Нсо аь^Нйд̄а гаьгьий̄а муьгъатт̄а
бейакца, муьгъалІ гаьгьий̄а сад аь^Нйдаб̄акча.

Иса м̄еш Иерусалимлис хабар

³¹ Вагъалъл̄ьо водиъ Исадой мокъова
гьо^Нсо фарисейл̄а нисойо:

– Гисакна э^Нкъе дибола гьид, Гьеродил
Ми икъал атІна гей.

³² Исана гьоллохъа нисойо:

– Мекъанна мекъена гьолцо соралхъа ниса: гьуна До зинналлā бовахийāна, унти-узрола азаб ниццасана аьдамла бāхъилца жейсана хисана, бета лъанасла водиъ До богъцас иш лъикъолца. ³³ Амма авараг Иерусалимлиъ о^Нкъезш угъаъас, вагъальльобза жейсана, хисана, хисалалъна До гьид ахъал нуцIос. ³⁴ Вай Иерусалим, Иерусалим! Аварагла бийакъецасна дūдой Аллагъли мейагъийа расулла къалāд бийакъецасна шагъар! Лāхди Дил йатIна зукъойо гуьди чIучIули-йацей дибо аьдамла Диела гъабālI бāгъал, амма мизол гьули йатIезш. ³⁵ Гьуна же мизос Аллагълис билIо йоьчIчIо гъихлъас. До нисос мизохъа: «БетIергъаллила Къудратликъа э^Нгъна о^Нкъоцалал баркат гулала», – лIо миже нисойо заман мокъезш, До мизол эгāъас.

14 къаьм

*Шамат водиъ лъйла унтилаъ
кIокIō сукIо ахъилло*

¹ Гьо^Нс шамат водиъ фарисейлила сид укъа гъаькимлила билIоъ Иса эсал о^Нкъоль, Гьолцо сийоле йоваллālIона гувабацIона бечена зувакъойо гьулиъ гаьгъийā аьдамла.

² Гьолцодой аь^Нйда о^Нкьойо о^Нхаь лъи йечена кІокІо сукІо. ³ Вагълиъис Иса диниябла аьлимла̄хъана фарисейла̄хъана нисолло: «Шамат водиъ кІовакІовā аьдамла сагъ бовал ба̄хъцад йаги ба̄хъа̄сди?» ⁴ Гьоггōл гьокІа йова̄инна гьихбалъойо. Иса кōна йе^Нхенна гьули сукІо ахъилло бета билІо-гъа э^Нйо. ⁵ Иса гьоллохъана нисойо:

– Мизос лъойсна а^Ну йаги о^Нс лъи гаьгъийа тагъризлиъ бекда, шамат водо гейлІо нисода, гиса багъа̄сди миже гьоло?

⁶ Гьоллохъа къа̄ь гьо̄шшона нисона йахъеш.

МутІиъ бахъал нуцІоцалас дарс

⁷ Гьолцогъой бесал бовакІийа аьдамла̄ супралгъа сō^Н гьидел сана̄атаб кІетІо ма̄че бохал аь^Нйдаба̄кчаш бегабалъ, Иса гьоллол гьо^Нс хабар мейо.

⁸ – Бейтеллиъ ийалІель, къушеллидой шеблаъ къе̄ беца̄къа. Гьулиъ къе̄ бецал илІейа̄ь дугъана кьиматаб сукІо зогъца. ⁹ Мийа̄ь, илІейо бадисо сукІо о^Нкьоль, кьодо о^Нкьова бетІергъалли дұхъа нисас: «НилІа гьоцо сукІол ма̄че», – лІо. Ницна ахъна, аьгъиъна биссун муьгъаттāла мицаъ къе̄ эцал нуцІас. ¹⁰ О^Нкьосла̄зу, ми бишшун муьгъаттā

къе эче. БетІергьаллил ми эгѣйназу, дудойна гогьна нисас: «Гьалмагъ, аьгьийна аь^Нйда кІетІа мицаъ къе эче», – лІо. Гьольльогъа муьгъаттѣ бейтелликъа гаьгьийѣ э^Ндо дибо къадро-къиматна къоддѣкас. ¹¹СудлІо нисода гьинизу жу къоддѣкІийо сукІо Аллагьлидой аь^Нйда лІийода ахъца, жу лІийода эгацас сукІо къоддѣкца.

¹²Бета Иса билІола бетІергьаллихъа нисойо:

– Вагъаддийо бес-хулІолъи йолъ, бовакІийа сукІобѣ мина къѣ окІаллакъа кулна богьна, гьоллокъѣ гьо^Нсдана пайда гаьгьийо жо йахъаслІона, дибо вацѣана, иснана, аьгарлъина, бечедабла мадугьаллана бовакІѣкъа. ¹³Вагъаллийо бес-хулІолъи йолъ, ми бовакІа гьардухъаллана, азизабла аьдамлана, гьулазу лаьхъдийѣ, боцдийѣ сукІобана. ¹⁴Талигъаб гей ми гьоглохъа дул йоцІона йахъѣаль. Жейса дуняялликъа гьоглол йойо жо хиса къиямасаб водиъ муьмилла бувагьоваъас баьгьбаьлѣлъо дул гьули йи^Нхъас.

Бесал бовакІийѣкъас хабар

¹⁵Вагъли тухълъо, гьулиъ гаьгьийа сидцойсола Гьолцохъа нисойо:

– Гьардараб гей Аллагьлила Парчагьлиъ къеѣна эчена баьба муьхъчаш сукІо.

¹⁶ Исана гьолцохъа къаъ нисойо:

– Нишел тели аьдамла бесал илІал гьоьк-
мо бахъийо гьо^Нс пуланаб сукІос. ¹⁷ Бесалцо
бог мокьоль, гьолцо э^НйолІо гьинис лагъ
бовакІийа аьдамла бесал илІал. Э^Нкъена
лагъли гьоглохъа нисойолІо: «Гугъ миже,
къацІцІо кен-о^Нх лъикъона». ¹⁸ КъацІцІола
гьо^Нс сикІо йогъна нисойо жувѡл нигъана
гувал бахъаьаслІо; ми илокъа къодос тилІ-
килІо. Сиди нисойолІо: «Гьини гьо^Нс маьче
бохна гей, гьоло маьче бегѡл э^Нкъал нуцІос,
гьарзи йѡс дѹхъа, ми дѣкъа къодос тилІки».
¹⁹ Бацосола нисойолІо: «Гьини ацІона о^Нс
бохна гей, вагьаллѡл лІийа^Нгъна йийакъе-
лал йѡтІна гей, гьарзи йѡс дѹхъа, ми дѣ-
къа къодос тилІки». ²⁰ Лъанасла нисойолІо:
«Гьини жейса ахъо йо^Нкъона гей, вагьаль-
льобза жу говал ахъаьас». ²¹ Лагъ къаъ
билІогъа о^Нкъоль, мейолІо гьинила бетІер-
гьаллихъа къацІцІо йахъийа жойлас хабар.
Гьольльогъа муьгъаттѡ симо бййа гьолцо
нисона гей лагълихъа: «Хехлъи ахъна э^Нкъе-
на къатІлѡна хъаьчІлѡна и^Нхъойо шинаб
гьардухъаллана, гьулѡзу азизаблана, боцди-
йѡна, лавъхъдийѡна аьдамла бѡкъолла гьо-
лѡъ». ²² Э^Нйацос о^Нкъоль, лагъли нисойолІо:
«Дибо амро тІубази бѡйо, бетІерчІахъаяв!

Амма жена маъче гъихлъона гей». ²³ БетІер-гъалли нисойолІо лагълихъа: «Гъинолкъана калагъойна мийахъовā аьдамла бакъоллина гогъ. Дие билІо аьдамлаш йоцІала. ²⁴ Амма нисос мизохъа: до ийабалІена гуйэшлā диела билІоъос кен-о^Нх йуь^Нхъаъаш».

*Иса авараглигъой муьгъалІ
мекъейās къимат*

1. БилІо йогъцалакъас хабар

²⁵ Тели аьлам зукъойо Исагъой къацІо мекъекас. Гьоллохъана гоцІохъна Гьолцо нисойо:

²⁶ – Гъинила ийо-абоъ, кьова-хъизаллиъ, иснāъ, вагълāзу гъинила оьмролалъдā рокъукъльи гаьччо сукІо Дйдой о^Нкъода, гъули сукІо Дие асгъаблъилаъ ахъаъас. ²⁷ Гъинис хъанчна бохна, Дйгъой говаъцасна сукІо Дие асгъаб ахъаъас. ²⁸ СукІод мизоъ э^Ндо гей, билІо йовал хийал гаьгъийо сукІо, гъакъкъа къēна эчена гъисаб боваъцас: оьлалди гъаьжа-къай, окко-месед билІо йогъна гикъа йо^Н-къолал. ²⁹ Гьольльол бигъана гунна гъули билІо йогъна лъикъаъда, бета гьолщокъа аьдамла лъо^Нвабās, ³⁰ билІо йовал уь^Нхольна гъули йогъна гикъа йо^Нкъонна йахъеэшлІо нисона.

2. Рагълиъ э^Нкъал атІийа ханликъас хабар

³¹ Йана бацо ханлил данде эгъал аьгъиъи-
йо хан къѣна эчена ургъизи ахъал нуцІаъасди:
хъона гъазай рагъухъан гаьгъийо тушмалли-
ла аскарлил данде ацІона гъазай рагъухъан
гаьгъийо аскарна жуна эгъна ахъалдилІо ни-
сона. ³² Эгъна ахъаъцаслъи икъель, тушман
цІиходā гаьгъийаъзу, гъолцо ханли рекъел
бовальгъа йатІийо жо нисолал мейас гъи-
нис чапарла. ³³ Вагълā мизоъ э^Ндо гаьгъийо
шинабли къацІцІо жойлакъас инкар боваъ-
да, гъоллōл Дие асгъабла бāхъаъас.

3. Гемо йольова ци^Нйакъас хабар

³⁴ Ца^Н кІетІо жо гей. Амма гъольлъос гемо
йугъода, къāъ гемона йо^Нкъонна йахъаъаль,
гъольлъоъкъā пайда гаъа гъо^Нссидилна.
³⁵ Йā гъули мицал йуъ^Нхаъаш, йа мицаль
гулцала йа^Нкол йуъ^Нхаъаш. Гъули къѣ чІа-
лІеш. Аь^Нгъā гаьгъийāл тухъала гъули!

15 къаьм

ЛъикІлъилас лъана хабар

¹ Исахъа энекзи бахъал мокъос зукъойо
гъаькъ бокІолцаса сукІобана мунагъ-гъаькъ

гаьгый̄а баддѡл тели аьдамлана. ² Фарисей-
л̄ана диниябла аьлимл̄ана Исакьа мордаба-
на нисос зукьойо:

– Вагьди сукІо мунагьл̄ад бовацІийа
аьдамлагьой гьудуллына йогьна гьолло-
гьой э^Нш-хулІос, – лІо нисона.

1. Боьийа бикькьас хабар

³ Иса вагьаддийо хабар мейо гьоллол:

⁴ – Гьо^НсчІитІ боцІилаъас гьо^Нс боьльо,
аьчІенайигна аьчІена боцІина гаьльль̄а^{чо}
авлахълиъна бечаннегьна, боьийо бикь ми-
зал э^Нкьаъцас сукІо гейди мизоъ э^Ндо? ⁵ Бикь
михьона муьгьатт̄а, разина ахьна гилакьа
гунна бежеш гьолцо гьоло билІогьа. ⁶ Бета
билІогьа о^Нкьона муьгьатт̄а, гьалмагьлана
мадугьаллана ийалІена гьоллохъа нисос:
«Диела рохеллиъ мижена аькал б̄ахъ, дие
боьийо бикь зогьна гей». ⁷ Вагьальль̄обза
До мизохъа нисос: гьинкьа мунагь-гьаькь
гаьччо аьчІенайигна аьчІена муьмин-сукІол-
гьа гьо^Нс муна̄пикъ Аллагьлильд̄а уь^Нхода,
гьа^Нсаьл̄ас йакІо йил̄а рази йахъца.

2. Йоьийа окколакъас хабар

⁸ Йаги гьинис ацІона окколаъас гьо^Нсцойс
окко йоьда, гухьинна канлына билІона ахо

лъаьлІена гьуги-гьоттā йи^НзечІе йечаннегь-
цас гьо^Нсдана ийо зогьалди? ⁹Окко зогьльо,
гьинис цІагьāна мадугьаллана ийабалІена
гьольльо нисос: «Диела рохеллиъ мижена
аькал бāхъ, дие йоьийо окко зогьна гей».
¹⁰До мизохъа нисос: вагьлā Аллагьлис ма-
лаикла Аллагьлильдā уь^Нхова мунапикъли-
къа йилІа рази бāхъца.

*3. Оьмролала гьидсо къоссиахъийа
оьждикъас хабар*

¹¹Бетана Иса мейо хабар:

– Сид пуланаб сукІос зукьона гей къона
оьжо. ¹²ИтІинасола оьжди нисона гей або-
хъа: «Або, дибола ирслис гьинил мехецас
бутІа нилІа», – лІо. Або гьоглол ирс битІна
гей. ¹³Лади водлāъас итІиносо оьжо, гьинил
ирслиъ йи^Нхьōйо къацІцІо окко-меседна лъи-
цІо-къайна йоькчина, аьгьийна э^НкъейолІо
нāди цІихо гаьгьийо улкалиъ. О^Нкъāцо гьол-
цо, и^Нхьо-ахъхъа кІаьйлІона, гьинис гаь-
гьийо къацІцІо окко-месед йугьонна гей.

¹⁴Гьолцохъас къацІцІо окко-месед йольо-
ва замаллиъ, вагьальльо улкалиъ йо^Нкъона
гей йукьо ракъи. Гьули оьжона йилІа йа-
зихлъилаъ кези ахъна гей. ¹⁵Ахирна сид

сукІодой гъаьлтІи нисонна э^Нкъель, гьолцо гьули булІлагъа э^Нгъна гей. ¹⁶ Чара бугьоль, булІлал ницчас жона йуь^Нхъал разияб зукъона гей, амма гьулина гьолцол нилІаъас зукъона. ¹⁷ А^Нкълолакъана о^Нкъона гьолцо пикро богъна гей: «Диела абола билІоъ йоькъкъад гей бовахийā гъаьлтІухъалла. Оьнна къодона мекъейодолас баьбана гей. До гьолІоъ нуковахъа угъос. ¹⁸ Аьгъиьна абодой э^Нкъал, бета гьогцохъа нисал: „Або, Аллагълидойна дудойна аь^Нйдā до мунагълāъ кези ахъийо. ¹⁹ До дибо оьжолъилаъ тІокІаб бикІзи овал мустагъикъаб гаьъа, ахъда дудой гъаьлтІилаъ оха“».

²⁰ Аьгъиьна э^Нкъена гей гьули гъинила абодой. Атāкъāзу эгана гей абол гогъцас оьжо. Абос гьолцокъа йилІа йакІо йугъона гей. Гьогцол дандена чІанагъона, або оьждил альона йоцІна баьдана гей. ²¹ Оьжди абохъа нисона гей: «Аллагълидойна дудойна аь^Нйдā до мунагълāъ кези ахъийо, дибо оьжолІо нисал до мустагъикъаб гаьъа». ²² АболІо нисода, гъинила лагълāхъа нисона гей: «Биссун кІетІо лъицІона йакъона гьолщохъа лъичІела, гьолщола зокъиль кІоьй-йана мехела, хаьбалāль гьалалъцована гийахела. ²³ Бакъоллина ахо бегъакІийо бишена

муха, оѣжо о^нкѣовѣлас кѣтѣо бес-хулѣѣи
йовал, ²⁴ судлѣо нисода вагѣди дие оѣжо
угѣоваѣас ахѣна гей, оѣийаѣас зогѣна гей».
Гѣоллѣл котакаб ихтилат-кеп бовал муѣхо-
балѣна гей.

²⁵ Гѣолцо сукѣос укѣосо оѣжо вагѣалѣлѣо
мехлаѣ зукѣона гей мицалѣ. Билѣогѣа гѣс-
лаѣ, гѣолцол тухѣна гей лѣисо-кешлис гѣокѣ.
²⁶ Гѣицадѣна илѣена сидцойсола нукарлихѣа
нисонна гей, сийод вагѣдо ихтилат-кеплѣо.
²⁷ «Дибѣ ис сагѣ-саламатлѣилаѣ о^нкѣовѣлас
абѣ ахѣ бегѣакѣийѣ бишена мухоллина их-
тилат-кеп богѣцас гей», – лѣо нисона жаваб
нилѣийѣ нукарли. ²⁸ Вагѣли тухѣлѣо, укѣа
оѣждис симо бигѣна гей, билѣоѣ э^нкѣал кѣа-
бул ахѣечѣе зукѣона гей. Бета абѣ гисакна
гѣардизи ахѣийолѣо билѣоѣ э^ндо тослѣо нисо-
на. ²⁹ Оѣжди жаваб нилѣийолѣо: «Вагѣдис-
наб лѣийаѣ до дул лагѣцой огѣдѣйѣо, ми ни-
сова жойлакѣас тилѣкеѣш. Вагѣлиѣ э^ндо ми
дил итѣино чикѣена мухоллѣѣш диела гѣал-
магѣлагѣой ихтилат-кеп бовал. ³⁰ Амма дибо
зукѣойѣ бечелѣина хѣагѣбѣагѣой кѣацѣо эс-ху-
лѣона йолѣонна о^нкѣова вагѣацѣо дибола оѣж-
дил ми ахѣ бегѣакѣийѣ бише мухѣона гей».

³¹ Абѣ гѣолцохѣа нисойолѣо: «Оѣжо! Ми
нитоназу дѣгѣой кѣацѣо гей, кѣацѣѣо дие

бечелъина дибо гей. ³² Иле рази бахъна их-тилат-кеп бовал нуцІос, судлІо нисода вагъ-ди дибо ис угъоваъас ахъна гей, оыйаъас зогъна гей».

16 къаьм

Божѣ бугъолло хъуллухъчийа къас хабар

¹ Гъинила асгъаблāхъа Иса бадона хабар мейо:

– Сид бечедаб сукІос зукъона гей гъинила мал-муклис тІалаб богъцас хъуллухъчи. Гъолцокъа аыйиб мокъона гей гъинил йатІ-гъа бечелъи йугъолцалІо нисона. ² Вагъли тухъльо, бечедабли сукІо хъуллухъчийахъа нисона гей: «Сийод кІетІо гаьччо дибо хабар тухъца дил? Бōва гъаьлтІилас гъисаб нилІа, тІокІаб хъуллухълъилаъ ми ахъаъас». ³ Вагълиъис гъолцо сукІо гъинис гъинхъа нисона гей: «Сийоле до йовал? До гъогцо хъуллухълъилаъасна олъолца, маьчена дй-хъа баьхна бахъаъас, окІдāл э^Нкъална до ламус ахъца. ⁴ Гъа^Н, дил йикъеш сийо йовал нуцІоцасна. Гъолцо гъаьлтІилаъас олъол-льо, бадло сукІобā билІовāъ охальгъа гъо^Нс гъилла ургъизи бовал нуцІос».

⁵ Гьолцо сукІо гьинила бетІергьаллис нагълъухъалла гьо^Нссокун гьиндой ийаба-лІена гей. Аь^Нйддāлахъа нисонна гей: «Дие-ла бетІергьаллис ласо нагълъид ми нилІал нуцІос?». ⁶ Гьо^НсчІитІ билІей зетилас ни-лІал нуцІослІо гьокцо нисоль, хьуллухъ-чийа йоькчина нилІна гей нагълъи кьодо чахчаш лІибо, бета: «Къейна эчена хехлъи ахъна лъинайиг чаха», – лІо нисона гей. ⁷ Ба-цосолахъа нисонна гей: «Сийод ми нилІал нуцІос?» – «Гьо^НсчІитІ билІей хъибос», – лІо нисоль. Гьолцохъана нисона гей: «Йоькчи-на дибо лІибона белІнайиг чаха», – лІо.

⁸ Гьогцо бетІергьаллина вещи овагъāгьи-йолІо отІолаги хьуллухъчи сигьирлъилаъ гьинис иш бōлъ. ВагъалІо дунияллис би-лІо къачІази йогъцас аьдамла жувōллъийа аьдамлāъ э^Ндо йилІа сигьирабла гей, ахи-ратлис билІо къачІази йогъцалāгъа.

⁹ Вагъальльобза До мизохъа нисос: дун-ияллила боцІи-ризкъилас пайда бокча гьал-магълъи бовагъна. Дунияллила билІоъ гаьгъийа бечедлъилаъас маьгърум бовагъна муьгъаттā, абадиябли билІоъ гьалмагълā къабул бовагъца вагълā муьхо-махеда. ¹⁰ Йоьккъала жойлас божилъи йōва сукІо-къа, телиласна божилъи йогъна йахъца.

Йоѣкъкъала жойлас божилѣи ѣогъна ѣахъаѣ-
цала сукѣокъа, телиласна божилѣи ѣогъна
ѣахъаѣас. ¹¹Дунѣяллила билѣоѣ гаѣгъѣѣо
гъаѣрамаб боѣѣи-ризкѣи дѣукъа божилѣи
ѣогъна ѣечаннегъна ѣахъаѣда, абадиябли
билѣос унго-унгоѣб хазиналис божилѣи ѣо-
валди дѣукъа. ¹²Сукѣола боѣѣилакъа ѣакѣо
ѣо^нкъонна бечабаннейал бахъаѣцаса миже,
мизосзу нилѣалди мизохъа Аллагъѣли?

¹³Гъо^нссидина лагъѣлихъа къон бетѣергъал-
лил лагъѣѣи ѣогъна ѣахъаѣас. Гъо^нсѣоѣс
гъолѣол атѣас, бадисо атѣечѣе ѣѣодоло эгъас.
ѣаги сидѣойлал гъолѣо хъуллухъ ѣакѣо нилѣ-
на бовас, баѣосолал бойѣѣе эѣас. Вагъаллѣ
хъуллухъ богъна бахъаѣас мизохъа Аллагъѣ-
лилна дунѣяллила боѣѣи-ризкѣиалална.

Къанонна Аллагъѣлис Парчагъѣѣина

¹⁴ѣсахъа энекзи бахъѣѣѣа окко-месед хи-
риябла фарисейлѣал вагъѣло хабар тухъѣѣо,
Гъогѣокъа лъо^нвабѣал муъхобалъѣѣо. ¹⁵ѣса
гъоллохъа нисѣѣо:

— Аѣдамлѣдой аѣ^нѣдѣа миже ваѣѣѣаѣѣой
муъхо-махеш, амма Аллагъѣлил ѣѣкъеш
мизола ѣакѣѣѣ гаѣгъѣѣѣо жо. Аѣдамлѣѣ
э^ндо къѣматаблѣо гиѣѣѣѣѣо жо Аллагъѣлидой

аь^Нйда кѣабигѣаб ѣахѣца. ¹⁶ Ягѣягѣа аь^Нй-
дѣна зукѣойо динлис кѣанонлана аварагла-
на. Гѣули о^Нкѣона муѣгѣаттѣ Аллагѣлила
Парчагѣльилас кѣетѣо хабар мѣш. Шибабли
букѣо гѣаза бѣс гѣулиѣ э^Ндо муѣвахал.
¹⁷ Амма кѣанонлила гѣо^Нс гѣаѣрплис кѣуват
бугѣолѣол, вагѣаддѣол гѣа^Нсана маѣчейана
ѣувагѣона ѣовальѣос.

¹⁸ Гѣинис ахѣона ѣолѣонна, бадѣ ахѣо
ѣо^Нкѣѣсинаб сукѣо гей зина богѣцас сукѣо.
Бетѣергѣаллидойс атѣкийѣо ахѣо ѣо^Нкѣойѣо
сукѣона гей зина-сукѣо.

*Иса аварагли мѣш гѣо^Нс бечѣдабли
сукѣосна Лазарлисна хабар*

¹⁹ — Зукѣона гей бечѣдаб, кѣетѣо лѣицѣона
лѣичѣена, гѣинила бечѣльилас кепна бокчи-
на, ѣѣмро богѣцас гѣо^Нс пуланаб сукѣо. ²⁰ Зу-
кѣона гей вагѣлѣзу Лазарлѣо нисойѣо гѣо^Нс
ѣазихаб, магѣокѣа тѣутѣо ѣахѣна, кѣокѣойѣо
окѣдаги сукѣона. Гѣули ахѣца зукѣона гей
вагѣалѣо бечѣдабли сукѣола кавлидой. ²¹ Бе-
чѣдабли сукѣола истѣолийакѣас кѣѣ ѣекийѣо
кен-о^Нх ѣи^Нхѣалла кулликѣа ѣакѣо зукѣона
гѣолѣѣос. Гѣулаѣзу ѣо^Нкѣона волана гѣолѣѣо-
ла магѣокѣа чѣалѣейѣо жо ѣаь^Нчѣш зукѣона.

²² Окїдаги угьоль, малаиклā гьули Ирбагьин авараглидой акьона гей. Угьоль, шунаъ и^Нхьонна гей бечедаб сукІона. ²³ Журжагьлиъ лъакъейа азаблиъ гаьгьийа бечедабли сукІол, гьаьйда ѳе^Нѳагьенна говацІоль, цїи-ходā Ирбагьин аварагна гьогцодой шеблаъ тахликъа кьē эчена Лазарна бегабас. ²⁴ Бечедабли сукІо ийана-тїикенна нисона гей: «Йā илос або*, Ирбагьин! Гургьизи ахъ ми дїкъа! ВагьалІо цІой до зизацас гей, вагьальльобза лъиъ зокьона гицІинна диела мицакъа кō ѳе^Нхелал э^Нѳа Лазар!»

²⁵ Амма Ирбагьини гьолцохъа нисона гей: «Йā дие оьжо, ми ѳакІкъа ѳо^Нкъола, дунияллила билІоъ дул нилїийо къацІцІо кІетІослѳи, ЛазарлІо нисода гьугиъ азаблиъ зукьойо. Гьа^Нже гьолІоъ Лазар ахо гей, ми азаблиъ гей. ²⁶ Гьулазу гьуди дудой нигъад э^Нѳал илоъ балІо букьо аьракъ гаьгьийаъ. ГьолІоъкъа гьулиъ мекьабакьовāнна мекьал гьино гаьъа, гьулиъис гьоттā гувал батїийāнна гьино гаьъа».

²⁷ Бетана гьогцо бечедабли сукІо гьарзи ѳогьна гей: «Вагьлā зогъда, дие або, ми э^Нѳа Лазар диела абола билІогъа. ²⁸ Гьулиъ

* 16:24 Вагьальльос маъна гей: «Илла умматлис або».

дие лѣинана исна гей, гьоглохѣа цѣодорлѣилаъ бечелѣо нисал э^нѣа, бетана гьоллѣнна бѣхѣца вагѣалѣо азаблила билѣоѣ».

²⁹ Ирбагѣини нисойолѣо: «Гьоглол Мусана баддѣл авараглана гей, гьоглохѣа энекси бахѣала!» ³⁰ Бечедабли сукѣо нисона гей: «Йѣ дие або, Ирбагѣин, гьоггѣл энекси бахѣас! Амма угѣойо сукѣо дунялликѣа кѣѣ о^нкѣоль, кантѣизи бахѣна гьоггѣл Аллагѣлилъдѣ муѣвахаш».

³¹ Вагѣлиѣис Ирбагѣини нисона гей гьолцохѣа: «Мусакѣана бадло авараглѣкѣана боѣважаѣцас аѣдамла, угѣоваѣас ахѣийа сукѣокѣана боѣважаѣаш», – лѣо.

17 кѣѣм

Иса авараглис гьо^нсо а^нкѣлова

¹ Иса гѣинила асгѣаблѣхѣа нисойо:

– Инсан мунагѣлиѣ кези огѣцас жо дунялликѣа йо^нкѣечѣе гѣихлѣѣас, амма букѣо балагѣна азабна гей вагѣлина йакѣона о^нкѣѣ сукѣол. ² Вагѣадло аѣдамлѣ э^ндос гьо^нсдана сукѣо мунагѣлиѣ э^нхелцал, гѣабос кѣалона билѣаль йи^нцона, ралѣадбаѣ тѣотѣийолѣи ахо гей гѣѣ гьолцол.

³ Вере миже цІодорса бече! Динлила истІи дул мунагъаб жо йогъда, гьолцохъа ниса. Тавбана богъна гъули йова жойлакъа пашман ахъда, кьодос тилкі. ⁴ Водиъ алІовахна гьолцо дул кешлъи йогъдана, алІовахна «ТавбалІо» нисода, бетана гьолцокъас кьодос тилкі.

⁵ Чапарлā Кьоддāла Исахъа нисойо:

– Илла йакІлāъ божи теликІа, – лІо.

⁶ Кьоддāла Иса нисос:

– Генилала кІаькІадолас божи йакІиъ бахъна, миже вагъалІо легъилала хоьххъа хемухаъас багъойцІна ралъадбаъ гуцІолІо нисода, мизос амро гьольлъо тІубази бōс.

*Мицальцо гогъцала
лагъликъас хабар*

⁷ Дибо лагъ олІолана йаги боцІилагъас о^н кьоль, эсал хехлъи ахъна къе эчелІо нисосди гьолцохъа? ⁸ Миже нисаъасди лагълихъа: «Хехлъи ахъна кенна йова, до эс угъоцал дил хьуллухъ богъна дїхъа говацІона эче, бета мина эш-хулІо», – лІо. ⁹ Дибо амро тІубази бōлъ, гьолцо лагълил ми баркалла ниццади? ¹⁰ Вагълā мижена тІубази йова мизокъа кьодо гулло шинаб жо. Бета миже нисас: «Илокъа

къодо гулло жо гаьльльо иле тІубазі
йогьцас пайда гаьччā лагъла гей иле», –
лІо нисона.

*АцІона барас унтилаъ кІовакІова
сукІоба бāхъилло*

¹¹ Самариялилана Галилеялилана оьрхъи-
лакьалкъā э^Нкъеш зукьойо Иса Иерусалим-
лиъ. ¹² Гьо^Нс аьлІаъ о^Нкъоль, Гьули эгас
цІихода бечейа барас унтилаъ кІовабакІова
ацІон сукІол. ¹³ Гьолло тухъинна йукьо нисос:
– Йā Иса – НасигьатсукІо! ЙакІо йугьо
илокъа! – лІо.

¹⁴ Гьоллōл бегабалъ, Иса нисос:
– Баьгъбаъна миже кашишлāдой мекъе,
гьогцол миже мацолъи бегабāльгъа.

Вагълā мекъешлаъ, къодо гаьгъийо къацІ-
цІо кита йекийо, гьоллос магьова йā^Нцо-
йо. ¹⁵ Жу ахъиллъо, гьоллоъ э^Ндōс гьо^Нсцойс
къāъ кІаьйна уь^Нхона, йукьо тухъинна Ал-
лагълил рец бовал уь^Нхольийо. ¹⁶ Бета Исала
хаьбалāдой мицнāкъана эчена Гьолцол бар-
калла бōйо. Гьули зукьойо Самариялиъис
сукІо. ¹⁷ Иса гьолцохъа нисойо:

– Миже ацІонана мацеэшди? Гьоггōлсова
аьчІенана нāд мекъейо? ¹⁸ Вагъалцо сукІола

сукІоллāъ, гьоглосола гьо^Нс сидилна йакІкъа
йо^Нкъезшди къā гованна гогъна Аллагълил
рец бовал.

¹⁹ Бета гьолцохъа нисойо:

– Гъа^Нже аьгъиъна э^Нкъе, дибола бо-
жи-ималли ми тиса уь^Нхолло.

*«Аллагълис Парчагълъи
нитод йахъца?»*

²⁰ Фарисейлā Исахъа нисолло:

– Аллагълис Парчагълъи нитод йахъца?

Гьолцо жаваб нилІийо:

– Аллагълис Парчагълъи йегана йо^Нкъа-
ъас. ²¹ Лъона нисаъас гъуна гъули вагъалІоъ
гейлІо, йана гъула гъугиъ гейлІо. Гъуна
Аллагълис Парчагълъи мизоъ э^Ндо гей.

*КІахнас Аьдамлис Оьжо
дуниялликъа о^Нкъоцаслъи*

²² Бетана Гъинила асгъаблāхъа нисойо:

– Аьдамлис Оьжо гьо^Нс вододана эгас-
къодālІо гицІийо заман мокъос мизокъа
къодо. Амма Гъули мизол эгāъас. ²³ Аьдам-
лā мизохъа нисас: Гъуги вагъалІоъ гейлІо,
йаги вагъгиъ гейлІо. Аьдада боцІдабāкъа,

гьоглогьой муьгьалІ мекьākьа. ²⁴ Сиддāла-
ъас бадōцодāлаъ гьа^Нс качекІцас кайлІōцой
гьинис водо йо^Нкьālьо о^Нкьас Аьдамлис
Оьжо. ²⁵ Амма аь^Нйддā дуниялликьа Гьол-
цол тели акьуба бегас, гьулазу вагьалІо
умматли Гьолцокьас инкарна бōс.

²⁶ Аьдамлис Оьжо дуниялликьа о^Нкьал за-
ман мокьоль, Нуьгь авараглила замаллиъ
йахьийаълыйо жо йахьца. ²⁷ Бешна, хулІо-
на, ахьхьа мовакьона, ахьхьа мейакьена –
гьоьшшона йахьаъасцой бāхьца зукьойо
аьдамла Нуьгь гамалкьа кьодокцал. Бета
водо гитІна гūs, кьацІцІā ралъадбаъ гьан-
кьизи бāхьна бувагьос.

²⁸ Вагьаллийозу жо йахьийо ЛутІ ава-
раглила замаллиъна. Бесцасна, хулІоцасна,
йи^Нсо-хуьжоцасна, болІолабацасна, билІова
йовагьцасна зувакьойо аьдамла ЛутІ Содом
шагьарбаъаш гисакийа водиъ. ²⁹ Бета гьа^Н-
саькьā гūва цІойлана чІабатІлилана води
кьацІцІā бувагьолло. ³⁰ Вагьлā йахьца Аьдам-
лис Оьжо дуниялликьа загьир ахьлІо.

³¹ ВагьаклІо водиъ кьамакьа гаьгьийо су-
кІо гьинила льицІо-кьайлигьой муьгьалІ би-
лІогьā э^Нкьākьала, мицаль гаьгьийо билІо-
гьā э^Нкьākьала. ³² ЛутІ авараглила ахьхьал

йахъийо жо йаКѣа йо^Нкъола!* 33 Гъинис ругъ цѣуми бовал икъе-аькъейо гьольльоьос маьгърум ахъца, гъинис ругъ нилѣийа гьоло хъосар бѣс. 34 До мизохъа нисос: вагъагъло водиъ нише билѣоъ сид мукѣолаъ буватѣи-йаъ э^Ндос гьо^Нсцойс эжеш, бадисо гъихлъос. 35 Гъаьтѣтѣо гъаьоцала къон ийоьос гьо^Нсцойс йежеш, къонас гъихлъос. 36 Мицаль гаьгъийа къониъис гьо^Нсцойс эжеш, бадисо гъихлъос.

37 Асгъаблѣ Исахъа нисолло:

– Йа Бетѣрчѣахъаяв! Нѣд гъули йахъца? – лѣо.

Гьолцо жаваб нилѣийо:

– Жаназа гаьлъаьчо цугъа къацѣобакца, – лѣо.

* 17:32 Мунагълѣс боцѣийо Содомлѣо нисоцас шагъар Аллагъли бугъолал аь^Нйдѣ, малаикли Лутѣ авараг-лихъана хъизаллихъана нисона гей Содомлиъис боьвачолѣо, амма гъиногъид боьвачошлаъ муьгъаттѣ гувабацѣакъалѣо нисона лъази йѣйолѣо. Гъа^Нсаькъа йекийа цѣой Содом бекѣелцалаъ, Лутѣ авараглис ахъо муьгъаттѣ гичѣехъийолѣо, вагълиъисзу гьоло ци^Нйала гъеммал йуь^Нхойолѣо.

бовал Гьули гьаколъаъас. ⁸ До мизохъа нисос: тели мех мекъечъе Аллагъли гьоллѳл цѳуми бовагъца. Амма Аьдамлис Оьжо дуниялликъа о^нкъоль, гьолцол дуниялликъа мийахъалди иман гаьгъийа аьдамла?

*Фарисейликъасна гъаькъ
бокѳолцалакъасна хабар*

⁹ Жувѳл валийа гейлѳо нисона баддѳл бикѳзи боваъцала гьо^нсо аьдамлаш Иса вагъаддийо хабар мѳйо.

¹⁰ — Дѳъа бовал Аллагълила билѳоъ э^ндокна гей къона сукѳо: фарисейна гъаькъ бокѳолцас сукѳона. ¹¹ Фарисейли, эчецала мицаъ эцокъана эчена, гъинис гъинил вагъаддийо дѳъа богъна гей: «Йѳ дие Аллагъ! Дул букъо рец гей бадлолъ э^нлъейо ойэшлакъа: хъантѳарабла, мекъабла, хъагъбаябла аьдамлалъ, йаги вагъацо гъаькъ бокѳолцала сукѳоль. ¹² Анкъилаъ э^ндо до кѳахна кѳал йохца, къацѳѳо дил йи^нхъова бечелъилас аѳѳонас бутѳа садакъалал ницца». ¹³ Гъаькъ бокѳолцас сукѳолѳо нисода, атадѳ эчена зукъона гей гъа^нсаьдѳ гъаьй гуѳѳохълал ламус ахъна. Амма гъейона зукѳна гьолцо нисона гей: «Йѳ дие Аллагъ, мунагълаъс оѳѳийа дѳкъа

гургъизи ахъ!» – лѲо. ¹⁴ До нисос мизохъа: гъуги сукѲо фарисейлил данде ласоди а^нцо-на билѲогъа э^нкъейо. Гъинизу жу къоддѡ-кѲийо сукѲо Аллагълидой аь^нйдѡ лѲийодѡ ахъца, жу лѲийодѡ эгацас сукѲо къоддѡкца.

Къовал рец-бакъ бѡйолъи

¹⁵ Къоваль кѡ Ѳе^нхелалѲо нисона Гъолцодой гъардизи бѡхъна мовакъос зувакъойо ийо-або. Вагъли Ѳегѡйа асгъаблѡ ийо-абохъа нисойо къова бакъѡкъалѲо. ¹⁶ Амма гъоллол къова Гъиндой бакъоллѡкъалѲо нисоль, Иса асгъаблѡкъа аькъелѡйо:

– Гувал мейа къова Дидой, гъоллѡл къова бѡкъал ийо-абол калкал бовѡкъа миже. Гъолло къовал Аллагълис Парчагълъи насибаб гей. ¹⁷ Гъаькъкъаб жо гейлѲо нисос До мизохъа: итѲина къовацой Аллагълис Парчагълъи къабул Ѳойѡшла сукѲол гъулиъ гъино гаъа.

Иса аварагна гъаькимна

¹⁸ Гъаькъкъас сид укъа гъаькимли Исахъа нисолло:

– Ъѡ кѲетѲо Муалим! Абадияб билѲос бутѲа михъал нуцѲода, сийод до Ѳовал нуцѲос? – лѲо.

²⁶ Вагъли тухъийā аьдамлā Исахъа нисолло:

– Вагълā зогъда, сукІод бета тиса уь^Нхош? – лІо.

²⁷ Гьолцо жаваб нилІийо:

– Инсаллихъа йахъаьцасна Аллагълихъа йахъца.

²⁸ Гьольльогъа муьгъаттā Петерли нисойо:

– Гьуна иле къацІцІо жо йечаннегъна дугъой гуйо.

²⁹ Исана гьолло къацІцІолахъа нисойо:

– Гъаькъкъаб жо гейлІо нисос До мизо-хъа: Аллагълис Парчагъльи йи^Нхъаллъид гьинис бина-ватанна, ийо-абона, исна-иси-йана, къова-хъизанна бецабаннейа сукІол,
³⁰ ласоди цІикІун вагъалІо оьмролаъна йи^Н-хъос, ахиратлиъна абадияб оьмро михъос.

*Лъахнасна нисос жу угъослІо
бета къаъна ахъцалІо*

³¹ Гьинис ацІона къона асгъаблана атада ийабалІена, Иса гьоллохъа нисойо:

– Гъа^Нже иле Иерусалимлиъ мекъеш. Гьугиъ мокъоназу Аьдамлила Оьждил аь^Нйдда-жу Аллагъли авараглахъа нисойо гьоькмо

тІубази бахъца. ³² Гъули мажусияллила каъ нилІас, гьолло Гъули инжит овас, гьоллōл Гьолцол туьвадабāш. ³³ Гьолло Гъули аькъелца, бета икъеш, лъанасла водиь Гъули аьгъиьца.

³⁴ Амма асгъаблāl нисойо жо биджи йахъеш, гьолло йаьжлāш гьоллохъа маъна богъна бахъеш, лъинис Гьолцо нисоцасна гьоллол йикъеш.

*Иерихон шагъарбадой о^Нкъалдайлил
боцдийа сукІос канлъи йо^Нкъолло*

³⁵ Иерихон шагъарбадой о^Нкъалдайлил, гьо^Нс боцдийо окІдацас сукІо и^Нхъос гьинолгъа къе эчена. ³⁶ Шебалакъбā мекъеца аьдамлāш гьокІ тухълъо, сийод йахъналІо нисолца гьолцо. ³⁷ Гьолцохъа нисойо Назаретлис Иса гейлІо вагъалІоькъбā э^Нкъеца. ³⁸ Вагълиьис боцдийо окІдаги йукъо илІелāйо:

– Йā Давудис оьжо* Иса! ЙакІо йугъо Дибо дйгъа!

³⁹ Исагъа аь^Нйдā гаьгъийā аьдамлā гьолцо сукІос гьокІ йоьиллис зукъойо, амма

* 18:38 Давуд авараглила умматлис оьжо.

гъули йилІазу йукъо гьокІна йагъона илѣ-
лал уь^Нхольийо:

– Йа Давудис оџо! ЙакІо йугъо Дибо
дйгъа! – лІо.

⁴⁰ Вагълиъ Иса эченоцІийо, бета гъуги су-
кІо гъиндой акъоллалІо нисойо. Иса, гъуги
сукІо гъица о^Нкъоль, нисолца:

⁴¹ – Сийод До дул йовал йатІна гей?

Боцдийа нисойо:

– Йа БетІерчІахъаяв! Дил канлъи йегал
йатІна гей.

⁴² Иса гьолцохъа нисос:

– Же гоцІохъ, дул канлъи йегас. Дибола
божи-ималли ми сагъ ойо.

⁴³ Вагъаллиъисзу, канлъина йо^Нкъона, гъу-
ли сукІо Исагъой къацІо Аллагълил рецна
богъна э^Нкъейо. Вагъли йегайа къацІцІола
халкъилана Аллагълил рец бовал муьхо-
балъийо.

19 къаьм

*Иса авараг Закайлидой
гьоболлъилаъ э^Нкъейо*

¹ Иса Иерихон шагъарбаъ э^Ндолакъа
э^Нкъеш зукъойо. ² Вагъальлъо шагъарбаъ
зукъона гей гъаькъ бокІолцала сукІобас

гъаьким – ЗакайлѠ нисоцас бечедаб сукѠ.
 3 Закайлис гъира зукъойо Иса нйѠ сукѠ
 гаьгъийона икъал, гъули эг̃ална ат̃на зу-
 къойо. Амма гъули аь^Ншшо гаьгъийахъа,
 халкъилаъ э^Ндо гаьгъийо Иса гьолцол ни-
 гъана эгайэш. 4 Аь^Нйд̃а ч̃анна йагъона; гъи-
 нолкъа гаьгъийа сид легъилала хоьхкъа
 къодокна гей, судлѠ нисода вагъалъльо
 хоьхдой шеблаъкъ̃а Иса э^Нкъал нуцѠс зу-
 къойо. 5 Иса гьольлъо хоьхдой о^Нкъоль,
 къодд̃ана гоцѠохъна нисос:

– Закай! Къапун л̃ийок, До жейса д̃удой
 гьоболлъилаъ говал нуцѠс!

6 Хехлъилакъа хоьхкъас л̃ийоканна л̃и-
 йокна, рази ахъна Закайли Иса гьоболлъи-
 лаъ къабул ѡйо. 7 Халкъилал вагъли тухъльо,
 мунагълад̃ оц̃ийа сукѠодой гьоболлъилаъ
 э^НкъешлѠ нисона Исакъа мордаб̃ал муьхо-
 балъийо.

8 Вагълиъис аьгъиъна Закайли Къодд̃ала
 Исахъа нисос:

– Й̃а Бет̃ерч̃ахъаяв! Гъуна диела бече-
 лъилас йалл̃Ѡокос бут̃а до мискин-пакъир-
 л̃ал садакъалал нилл̃ал, йаги, лъѡлди до
 зарал богъна зогъда, гьолцолна оь^Нкъовах-
 на йоц̃йухъинна нилл̃ал.

9 Иса гьолцохъа нисос:

– Жейса вагъалѠ билѠол хъосарлъи ѱо^Н-къойо, судлѠ нисода гъулина Ирбагъинила умматлис сукѠ ахъльо. ¹⁰ Аьдамлис Оьжо дуниялликъа о^Нкъона гей къосси бахъийā мийазална гьоллѠл хъосар бовагъална.

Меседлила аѠѠон тумалликъас хабар

¹¹ Энекзи бахъийā аьдамлāл Иса бадона хабар мейо. Иса Иерусалимлиъ о^Нкъальлъегъна зукъойо, халкъилал пикро бахъца зукъойо гъаколъечѠе Аллагълис Парчагълъи загъир йахъцалѠона. ¹² Вагъальлъобза Иса вагъаддийо хабар мейал уь^Нхолъийо:

– Къадро-къимат гаьгъийо кѠетѠ на-сло-тухумлис гъо^Нс пуланаб сукѠ э^Нкъал нуцѠос зукъона гей балѠ пачалихълиъ гъинила улкалиъ ханлъилаъ голилал, бета ханлъилаъна ахъна гъулиъис къāъ билѠогъа говал нуцѠос зукъона гей. ¹³ Гисакал аь^Нйдā гьолцо аѠѠона лагъна илѠена, шибаблихъа гъо^Нссо туман нилѠна гей, жу къāъ о^Нкъольлъол гъинил пайда-хайирлиъ гъаьлтѠизи йовалѠо нисона.

¹⁴ Амма улкалила аьдамлāл гъули атѠаъас зукъона. Гьолцогъой муьгъалѠ мокъой-бахъинна мегъна гей чапарла балѠ улкалиъ, гъидел гъули ханлъилаъ атѠаъаслѠо нисал.

¹⁵ Амма гьолцол гьугиъ ханлъи йи^Нхьона гей, бета гьугиъис къаъ о^Нкъоль, ийабалІена гей гьини окко нилІийа лагъла, лъо ласо пайда-хайир богъна зогъаллалІо нисолал.

¹⁶ О^Нкъона сидцойла лагъли нисойолІо, «Йа БетІерчІахъаяв, ми нилІийа сид тумаллид гьини ацІона туман йахъилло», – лІо.

¹⁷ «Ми кІетІо лагъ гей. ИтІина божилъилал ми дидой аь^Нйда йукъо ритІухълъи йегалло», – лІо нисона, ацІон шагъарбаш наиблъилаъ голлолІо гьули ханли.

¹⁸ О^Нкъона къонасла лагълина нисона гей: «Йа БетІерчІахъаяв! Ми нилІийа сид тумалли лъина туман йойо», – лІо. ¹⁹ Гьули лагъна ханли голца лъин шагъарбаш наиб.

²⁰ О^Нкъона лъанасла лагъли гьули туман ханлихъа къаъна нилІна нисона гей: «Йа БетІерчІахъаяв! Ми о^Нкъоцал гьини чургъаллиъ йоблІна туман цІуми йойо. ²¹ До дұхъа йилІа гьичІейо, судлІо нисода ми йилІа лъакъейо сукІо гаьлълъо. Ми гулеэш жо йокъчиш, йаги йи^Нжеэш жо йокІолца», – лІо нисодал. ²² «Гъай сигъираб лагъ, дибола йаьжлākъа дул тамбигъ бовал мехеш, – лІо нисона гей гьолцохъа ханли. – Дул икъеш зукъона гей до лъакъейо сукІо гаьгъийолъи: гулеэшла мицаъас жо йокъчицас, йи^Нжеэш

жо йокІолцас сукІо гаьгьийолъи. ²³ Суд ми окко хайирлил гъаьлтІизи йойэш, до о^Нкъолъол хайирна бахъна къаь йи^Нхъас гаь дил гъули». ²⁴ Шеблаь гаьгьийа нукарла̄хъа ханли нисона гей, гъогцохъасна йагъона туман нилІа ацІона туман йи^Нхъолла лагълихъалІо.

²⁵ Нукарла̄ нисона гей: «Йа БетІерчІахъаяв! Гъогцохъа гъуга̄зуна ацІона туман геййаь», – лІо. ²⁶ «До мизохъа нисос: тели гаьгьийа шибаблил къодо бадина нилІца, йоькъкъа гаьгьийахъас гаьгьийона йагъос».

²⁷ Бета ханли амро богъна гей: «Гъоггѳл до ханлъилаь голал атІеэса аьдамла, ба̄къанна ба̄къона, гъиндой аь^Нйд̄аькъа̄ бийа̄къа», – лІо нисона.

Иса авараг Иерусалимליъ э^Ндокийо

²⁸ Вагъло хабарна мегъна, Иса э^Нкъейо аь^Нйд̄а Иерусалимлиьд̄а.

²⁹ Зайтун маьдой шеблаь гаьгьийа Бетфагейа, гъула̄зу БетанийалІо нисоцала миц̄адой о^Нкъоль, къона асгъабна илІена, Иса гьоллохъа нисос:

³⁰ – Миже мекъе тикъа йегацала аьлІаь. Гъугиь мицона михъос жегун къодо аьдам

къайкъеш оѡлаб а^ну. Мицоваѡас макна бакѡоллина гугъ гѡолѡѡ. ³¹ Нагагъ мизохѡа суд гѡоло макцалѡ нисолда, миже гѡоллохѡа ниса: «Гѡоло Кѡоддѡла Исал батІна гей», – лѡ.

³² Иса нисогѡа гѡоллѡл мекъейѡ, Гѡогцо нисогѡа мицогѡа оѡлаб а^ну михѡона гей. ³³ А^ну мицоваѡас маккас бегаль, бетІергѡаллѡ гѡоллохѡа нисонна гей, суд гѡоло миже макцалѡ. ³⁴ «Кѡоддѡла Исал батІна гей», – лѡ нисона жаваб нилІна гей.

³⁵ Исадой асгѡабла а^нуна бакѡоллина мокѡойѡ, бета кѡодо гѡидеш лѡицѡона гунна, Гѡулина къайкъеголло. ³⁶ Гѡули къайкъена э^нкъешлаѡ, аѡдамлѡ гѡинолкѡа гѡидеш лѡицѡо къѡ готос зукѡона гей. ³⁷ Зайтун маѡкъаш лІийодѡ мекѡѡцо мокѡоль, гѡидел йегабѡ къацІцѡо караматликѡа йилІа рази бахѡийѡ тели асгѡабла, Аллагѡлил рецна богѡна илІе-лабас зукѡойѡ. ³⁸ Гѡолло илІеш зукѡойѡ:

– Аллагѡли э^нгѡна о^нкъѡва Пачалил баркат гулала!

Кѡоддѡ гѡа^нсаѡлѡл – рекѡелна рецна!

³⁹ Халкъилаѡ э^ндо гаѡгѡийѡ гѡо^нсо фари-сейлѡ Исахѡа нисос:

– Йѡ Насигѡатсукѡ! ГѡокІа йѡваѡилла Дибѡла асгѡаблѡс!

⁴⁰ Амма Иса гьоглол жаваб нилІийо:

– До нисос мизохъа: гьолло гьокІа йова-
ѣилда, кьалā илІелабāс.

Иса авараглис Иерусалимликъа йакІо йугъос

⁴¹ Иерусалим бегāцо о^Нкьоль, гьоглІо-
хъана говацІона, Иса ийāйо шагъарбал зи-
гарина богъна. ⁴² Гьолцо нисойо:

– Вай Иерусалим! Дул жейсадана йикъеш-
кьодā рекъеллил йаццас жо! Амма жейса
гьули дибола гъаьйдāл йегāъас. ⁴³ Дибола
тушмаллā дугъой сō^Н хъарандийа йо^Нва-
тІош, ми о^Нкьондāкъа балІо бохна дукъа
кьодо тушмалла гугъцас водбо йо^Нвакъос.
⁴⁴ Вагъалло водлāъ ми талавур бовас, дибо
аьдамлана гъурзи бовас, кьалкъа гулло кьа-
лона гъихлъезшла гъаьллъилакъа бугъолас
ми, судлІо нисода Аллагъли ми хъосар бо-
вал мокьолло мех дул бикъаъаль.

*Иса Аллагълила билІоъос базаргалла
гиса бовацІийо*

⁴⁵ Бета Аллагълила билІоъна э^Ндокна,
гьулиъ йи^Нсо-хуъжона даран-базай йогъца-
са аьдамла Иса гиса бовацІал уь^Нхолъийо.

⁴⁶ Гьолцо гьоллохъа нисойо:

– Тіекликъа чахна гей: «Дие билІо – как-динлис билІо йахъца». Амма мижелІо нисода гъули къачагълāла къоьчІол йуь^Н-хонна гей.

⁴⁷ Иса водиъ Аллагълила билІоъ аьдамлāл ваъза бōс зукъойо. Амма букъā кашишлāна, диниябла аьлимлāна, гъулāзу гъаькимлāна жигар багъос зукъойо Гъули икбал гъо^Нс санаъат михъолал. ⁴⁸ Гъоллохъа гъоьшшона йогъна йахъаъас зукъона гей, судлІо нисода къацІцІо халкъ Исагъой сō^Н къацІобакна бовачечІе Гъолцохъа энекзи бахъна бечена зукъоль.

20 къаьм

«Лъод Дул ихтияр нилІийо?»

¹ Вагъагло водлāъ Иерусалимлиъ гаьгъийа Аллагълила билІоъ ваъза-насигъат богъна Рохеллис Хабар Иса мегъцалаъ, гъулиъ мокъойо букъā кашишлана, диниябла аьлимлана, гъаькимлана. ² Гъолло Исахъа нисолло:

– Лъо изно нилІнад Ми аьдамлāл вагъло ваъза-насигъатла йовагъца? Лъод Дул вагъальлъол ихтияр нилІна?

³ Иса гьоллохъа нисос:

— Гъа^Нкъкъа мизохъа До гьо^Нс жо нисолал. ⁴ Нисаъче, Ягъя аварагли гъа^Нсаъкъа, йана аьдамлаш ихтияр михьонад лъйд мунагъла чурзи йовагъца зукъойо?

⁵ Гьоллѳл сидхъа-гьо^Нсо бикълабашал муьхобалъийо: гъа^Нсаъкъа изно зукъойолѳо нисода, суд миже Ягъякъа боьважеэшлѳо нисолас Гьолцо. ⁶ Нагагъ иле нисода, аьдамлаш ихтияр зукъойолѳо нисона, къацѳѳо халкъила къала йийакъена бийакъас иле, судлѳо нисода гьоллѳл аьдамла боьважча Ягъя гъаькъаб авараг гаьгъийакъа.

⁷ — Илол нѳкъа изно михьойолъи йикъаъас, — лѳо нисона жаваб нилѳийо гьогло.

⁸ Исана гьоллохъа нисона гей:

— Гъинина лѳо изно нилѳийона нисаъас, — лѳо.

Чикейѳ эллѳкъас хабар

⁹ Бета Гьолцо, мисална бакъона, халкъилал вагъаддийо хабар мейал уь^Нхолъийо:

— Гьо^Нс пуланаб суклѳо гунна гей клѳодас аьгъ. Гьолона эллѳхъа нилѳна, гьули суклѳо э^Нкъена гей цѳихода балѳо мицаъ тели мехлаъ эцал. ¹⁰ Клѳодо бикъоль, гьолцо суклѳо

эллāдой э^Нгъна гей гъо^Нс лагъ гъинил мехе-
 цас кІодас бутІа бокІал. Амма гъолло
 гъули лагъ аькъенна оьчІчІо къаь э^Нгъна
 гей. ¹¹ Гъогцо сукІо бадина лагъ э^Нгъна гей
 эллāдой, амма гъогло гъугина аькъенна,
 инжит огъна, къаь оьчІчІо уь^Нхонна гей.
¹² Лъанас э^Нйна, вагъаллāзу аькъенна,
 лаьхълāсна оцІинна, тІотІна гей. ¹³ Ахирна
 аьгъбала бетІергъалли нисона гей: «Сийод
 до йовал, до дил йилІа аццас оьжо э^Нйал.
 Суд йикъал, гъули эгаль, гъолцокъадана
 намус бāхъал гъоггōл», – лІо. ¹⁴ Амма оьжо
 эгаль, эллā сидхъа гъо^Нсо бикълабашена
 пикро богъна гей: «Вагъди гей ирсилав, гъу-
 ди икъеда, илол ирс михъас». ¹⁵ Аьгъбаъаш
 гисана оцІна, аькъенна икъена тІотІна гей
 эллā гъули оьжо. Гъа^Нже венахийала бетІер-
 гъалли сийод гъоллол йовал? ¹⁶ Э^Нкъанна
 э^Нкъена гъоггōлна бийакъена аьгъ бадлохъа
 нилІас.

Энекзи бахъийā нисона гей:

– Йахъākъала вагъаллийо жо.

Йо^Нсоъ кьухъези кьало

¹⁷ Гъоллохъана говацІона Иса нисойо:

– «Йо^Нсоъ кьухъаьаслІо нисона йо^Нсо-
 хъаллā йечаннейо кьало, ахирна кІетІа бу-

къаъ рекъази йѡс», – лѡ нисона Тѣкликъа чахийа калималис маъна сийо гаъгъийона бикъешди мизол? ¹⁸ Сукѡ ахъдана гьолъльо къалил э^Н хейо сукѡна галигзи ахъца, къодѡкъа йекна йо^Н къова гьолъльо къалина гьули йе^Н хейо аьдамна наъкъучѡа ѡс.

Къайсарлил ниццас гъаькъ

¹⁹ Букъѡа кашишлѡлна диниябла аьлимлѡна Иса къапѡун охна э^Н до голал атѡна зукъойо. Амма халкъилахъа гъийабачѡель, гьоллѡл муьгъаттѡ буьвакъна бечейо. Вагъло гъидекъас хабар мейолъи гьоллол бикъейо. ²⁰ Гьоглол йатѡна зукъойо Иса нисойо нийади йаъжкъа охна ихтияр гаъгъийона диван богъцалана наиблихъа Гьуги нилѡал. Вагъальльол гьогло муьгъалѡ аьдамлана беченна, мейолѡ гъидес сукѡоба жувѡл мацова гаъгъийас хелна богъна. ²¹ Мейа аьдамлѡ Исахъа нисолло:

– Йѡ Муалим! Илол йикъеш Дибѡла сикѡѡкъѡ гѡйо йаъжена каламна нитоназу битѡараб бахъцас. Мотѡолиъ говацѡна иш богъцас аьмална гаъѡа дибо. Гъаькъкъаб жоцой малъзи йѡс битѡараб Аллагълила гъид э^Н къал. ²² Ниса илохъа, илол йикъал йатѡна

гей къайсарлил гъаькъ нилІал бахъцади йаги бахъаьасди?

²³ Гъоллос гъилла-макро биджи бахъна Иса нисос:

²⁴ – Йегалаьче Дил динар. Лъойсди гъоль-лъокъа къодо суратна цана гей?

– Къайсарлис гей, – лІо нисойо гъолло.

²⁵ – Вагълā зогъда къайсарлис къайсарлил нилІа, Аллагълис – Аллагълил нилІа, – лІо нисойо Иса гъоллохъа.

²⁶ Вагълā гъоллохъа йахъеэш гъидел йа-тІийо йаьже Исад халкъ гаьгъийаь нисол-лина. Гъолцола жавабли гъикмат богъна гъокІа йоваьинна гъихбалъойо гъоллōл.

*Къиямасаб водиь бувагъовā
баьгъбаьилцалакъас хабар*

²⁷ Исадой мокъос гъо^Нсо саддукейлалІо нисоцаса, къиямасаб водиь бувагъова баьгъбаьилцалакъа боьважаьцаса, динияб-ла аьдамла. Гъолло Исахъа нисолца:

²⁸ – Йā Муалим! Мусала къанонликъа, масала, гъо^Нс пуланаб сукІо ахъхъал къо-вана бāхъечІе угъона зогъда, гъолцола истІи гъоло ахъо йо^Нкъал нуцІос угъова истІил насло бахъальгъа.

²⁹ Масала, зукъона гей алІна ис. Йо^Нкъова ахъхъал къова ахъечІе угъона гей аь^Нйддаш ис. ³⁰ Гьолцос ахъо йо^Нкъона гей бацосола истІи, гьулина угъона гей къова бāхъечІе. ³¹ Вагъаллā лъанасна ис угъона гей, бета гьо^Нссокун алІнана ис къова бāхъечІе бувагъона гей. ³² Ахир гьоллос ахъона йугъона гей. ³³ Гъаьсил, къиямасаб водиь гьоло алІон истІис ахъо лъойс ахъод йахъца?

³⁴ Гьоллол жаваб богъна Иса нисос:

– Дунияллила билІоь аьдамла бāхъна гей ахъхъа мовакъална, ахъхъа мейакъална. ³⁵ Амма ахиратлиь, къиямасаб водиь баьгъбаьинна муьгъаттā, ахъо-бетІергъалла бāхъаьас. ³⁶ Хел гаьччо абадияб малаиклисльийо оьмро бахъца ахиратлиь аьдамлаш. Ахиратлила билІоь къацІцā бувагъоваьас баьгъбаьиллā бāхъца Аллагъли Гъиндой ийабалІейа Гъинис кьовальийā. ³⁷ Къиямасаб водиь бувагъовā багъбаьилцалІо Мусана нисос. Йе-кІецаала тІитІас чахāчо калималиь нисона гей Мусахъа, БетІергъан «Ибрагъимисна, Иса-къисна, Якъубисна Аллагъ гей», – лІо. ³⁸ Аллагъ – бувагъовāс Аллагъ гаьъа, чІагояблāс Аллагъ гей. Гьолцол къацІцā чІагоябла гей.

³⁹ Гьольльогъа муьгъаттā гьо^Нсо диниябла аьлимлā нисойо:

– Йā илос Муалим! Ми йилā битІун нисойо, – лІо.

⁴⁰ ТІокІаб гьо^НссукІона гьобшшона нисолал кІези ахъеш.

«Давудила умматлис оьжо гаьа Масигь»

⁴¹ Гьолцо кьāйна гьоллохъа нисолло:

– Суд аьдамлā Масигь Давудила умматлис оьжо гейлІо нисос? ⁴² Давуди гьинила забурлиъ* нисона геййāъ: «БетІергъан Аллагъли диела Кьоддāла БетІергъаллихъа нисона: „Диела кІетІакъала рахълиьдā кьē эче, ⁴³ до тушмалла Дибола хаьбалāдой аь^Нйдā мицнāкьа бейачелцал“». ⁴⁴ Вагьлā гьини Давуди Масигьлихъа гьинис Кьоддās БетІергъанлІо нисослаъ, нигъад Масигь Давудила умматлис оьжо ахъца?

*«Гьо^Нсо диниябла аьлимлāкьас
цІуми бāхъ миже!»*

⁴⁵ КъацІцІо халкъ Гьолцохъа энекси бахъна гаьгьийаъ, Гьинила асгъаблāхъа Иса нисойо:

* 20:42 Забур – туркилас ТІек.

⁴⁶ – Вере, йихало лѣицІона лѣичІена ме-
кѣ-гугъцаса, халкъ къацІобакаџо гѣидел
салам бовал баццаса, синагоглаѣъ клетІа
мицаѣъ кѣе бецал баццаса, бес-хулІаџо аѣйда-
бакчаша вагъадло диниябла аѣлимладойс
атада цІуми бахъна бече миже. ⁴⁷ Язихабла
къороллас боцІи-ризкъина гѣолло мухъча,
гѣулазу аѣдамлаѣ йегѣлыгъа йихала доѣѣ-
на йовагъца. Вагъли тели йѣваѣан, гѣоллол
лъакъейѣѣас тамбигъ михъос.

21 къаѣм

Къоролайс садакъа

¹ Аллагълила билІоѣ аѣдамла садакъа
э^ндо гулцала гѣамасбаѣ бечедабла сукІоба
тели окко гулцас Исал йегѣйо. ² Гѣулазу
Гѣолцол йегѣйо капикбас багъа гагъгийо
къона баклис окко гѣамасбаѣ гулцас гѣо^нс
мискинаб къоролайна. ³ Вагълиѣис Иса ни-
сойо:

– Гѣаѣкъкъаб жо гейлІо нисос До мизо-
хъа: вагъалІо мискинабли къоролай сада-
къалал бадлогъа тели окко гѣамасбаѣ
тІутІийо. ⁴ СудлІо нисода бадло садакъа-
лал нилІийо гѣинила маишат-яшавлис тІокІ

йахъийо окко. Язихлъилаъ гаъгъийа ва-
гъалю кьоролай мӯъ-муъгъаттā гъихлъойо
окко садакъалал ниллийо.

*Зайтун мāкъа муъгъалI йахъчала
жойлас хабар мēш*

1. Аллагълис билю йугъос

⁵ Лъосолади нисос зукъона:

– Аллагълис билю жавгъар-якъутлид къа-
члази йогъна гей, гъулāзу садакъалал ни-
ллийа бечелъилахъа йилла йоцIна гей, – лю.

Вагълиъис Иса нисос:

⁶ – Мокъос кьодо мех вагъалюъ, къалкъа
гулло къало гъихлъечIе, къацIцIю илол йе-
гацас жо къаъмлIийода йуъ^Нхойо водбо.

⁷ Асгъаблā Гъолцохъа нисолло:

– Йā Муалим! Нитод вагъло мех мокъос?
Вагъли кьодо йо^Нкъоцала водис аьламат
ниса илохъа.

⁸ Исана жаваб ницца:

– Вере, миже кьосси бовагъиллāкъа, суд-
лю нисода Диела цā^Нйакъа мокъос гъоггōл
До гейлю нисона, ахирзаман гъицакналю
нисона. Гъоллогъой муъгъалI миже мекъā-
къа. ⁹ Рагъ-къаллис тухълъо, миже гъийа-
бацIāкъа, судлю нисода гъули гъакъкъа

аь^Нйддā йахъал нуцІоцас жо гей, амма вагъли жегун дунияллис ахир гаъъа.

¹⁰ Бетана Гьолцо нисос:

– Рагъ лъази богъна гьо^Нс халкъ балІо халкъилакъа, гьо^Нс пачалихъ балІо пачалихъ-ликъа къодо богбацІас. ¹¹ Вагълѳльо сā-сала йилІа маъче лахлІос, батІи-батІияб мицāъ унтийа телибалъца, нуко-а^Нхъабāлъи къодо йо^Нкъос, гъа^Нсаъкъā йукъā гъицІабакъовā аьламатла йо^Нвакъос.

¹² Вагъли къацІцІо йахъал аь^Нйдā миже бовахна бейажеш, гьулāзу азаб ницца. Дйд-дāла миже синагоглāъна бейазас, хъаранди-йаъна тІуватІас, парчагълāдойна наиблāдой-на аь^Нйдā бейачелас. ¹³ Вагъгѳльо мизол рес бахъца дие асгъабла гейлІо нисона нуьълъи йовал. ¹⁴ Амма нійо жаваб нилІна гьолло-дой аь^Нйдā бецаллІо нисона, ургъеллиъ бейа-кāкъа, ¹⁵ судлІо нисода До мизол сикІо-бил нилІал гьо^НссукІона мизол данде бечена бахъаллъеъгъа, йаги гьо^Нссидихъана гьоъ^Нш-шона нисона йахъеэлъгъа. ¹⁶ Ийо-абона, исна-исийана, мизола аьгарлъилана, гъал-магълъилана миже мийасос. Мизос гьо^Нсо бийакъанна бийакъеш. ¹⁷ Дйддала миже къацІ-цІолал батІаъас. ¹⁸ Амма мизола къаьмкъаш ке^Нйана йекаъас. ¹⁹ Мизола сабрула мизосзу ругъла тиса йāгъас.

2. Иерусалим бугъос

²⁰ Йукъа аскарла йо^Н вакъона Иерусалим балIo бохийолъи йегайа мехлаъ, мизол йикъеш вагъло шагъар бугъоцас заман гыйцакийолъи. ²¹ Вагълoлъо Ягъудиялиъ гаъгыйо халкъ маъдакъа бовачала, шагъарбаъ гаъгийа гиса боъвачала, шагъарбаъаш гиса гаъгийа э^Ндо къаъ мекъакъала. ²² СудлIo нисода вагълoлъо мокъос Теклакъа чахийо къацIo жо йахъцас къисаслис мех. ²³ Вай, о^Нх гаъгийанна къова хагъолцаланна йегас къарилъи вагълoлъо замаллиъ, судлIo нисода вагълoлъо халкъилакъа Аллагълис йилIа симо бийахъа йукъа балагъла йо^Н вакъолца. ²⁴ Балъайад бийакъейа тели бахъца, сад асирлъилаъ бейажеш къацIoла мажус халкъиладой. Мажусияллис заман больоцал, мажусиялли хаъбалалI Иерусалим боцлас.

3. КIахнасна Масигъ о^Нкъоцаслъи

²⁵ Бохъ-бицосна ца^Ндасна муъжизатла аьдамлал йегабас, бета ракъликъа халкъ йукъа ралъадбала соййала хъуйлихъа гыйабачIена йилIа букъа ургъеллиъ бейакна бихзи бахъца. ²⁶ Гъинкъилахъана, ракълийкъа

йо^Н вакъоцала балагълāхъана аьдамла бичІ-
лиъис бовалъос, судлІо нисода гъа^Нсаъаса
лахдабалъ. ²⁷ Бета гъа^Нса-мусаъкъā къуватли-
къана букъа къадро-къиматликъана о^Нкъоцас
эгас Аьдамлис Оьжо. ²⁸ Вагъаллōл аьламат-
ла йāхълІо миже, бецоқъана бечена, къаьма
гъоьокъабакІа, судлІо нисода мизол хьо-
сарлъи гъицакна гей.

4. Легъилала хоьхис хабар

²⁹ Иса гьоллол вагъаддийо мисална ба-
кьойо:

– Легъилала хоьххъа, йаги бадло хоьхлā-
хъа гуцІобахъ миже. ³⁰ Гьолло хоьхлā диъи
йаьгъеллъо, мизол йикъеш мех эмедāкийо-
лъи. ³¹ До гьолІоъ нийасовā аьламатла йāхъл-
Іо, мизол йикъе Аллагълис Парчагълъи
гъицакийолъи.

5. «Вере миже буьчабāхечІе бече!»

³² Гъаькъкъаб жо гейлІо нисос До мизо-
хъа: Дуниялликъа вагъдо уммат гаьгъийаъзу
йахъца къацІцІо вагъли жо. ³³ Гъа^Нс-маъче
йоьдана, До нисойо йаьже йахъечІе гъих-
лъаъас.

³⁴ Вере, хувабана, маишатлис тІалаб-агъаз богъна, йакІо боцдолъал ѳе^Н ѳа^Нкъа, судлІо нисода гелокъас гъули водо кьодо ѳо^Н кьос, биса ѳовахцас кьйцой. ³⁵ Вагъли водо кьодо ѳо^Н кьос дуниялликъа гаьгъийа къацІцІо мах-лукъатликъа. ³⁶ Вагъальльобза буьчабāхе-чІе гьадурса бече. Гьольльо балагълиъис миже хьосар бахъальгъа, гьулāзу Аьдамли-ла Оьждидой аь^Н йдā бецальгъа Аллагълил гъари-дoъā ѳовагъа.

³⁷ ЙалІокъей Аллагълила билІоъ Иса ваъза-насигъатла ѳовагъагъийо, нишелаъ Гьули Зайтун маъкъа э^Н къагъийо. ³⁸ Воддиъ хискъа къацІцІо халкъ мокъагъийо Аллагъ-лила билІоъ Гьолцохъа энекси бāхъал.

22 къаьм

*Иса авараг мунагълāд бoвaцІиѳа
сукІобāла каъ ницца*

1. Ягъудиялис къотІина гьoъкмoна

¹ Гьинкъа ПасхалІо нисона ца^Н гулло ѳй-эшла ѳо^Н тобāш баьбā ѳовагъцас ид-водо гьицакца зукъойо. ² Букъā кашишлāна диниябла аьлимлāна вагъалло водлāъна аьмал бoс зукъойо Иса икъал санаъат михъолал,

амма гьоллѳл халкъилахъа гьийабачІена зувакъойо.

³ АцІон кьонийъ э^Ндос Искарот тІокІцѳ^Н гаьгьийо Ягьуда асгьаблила йакІийъ илбис э^Ндокийо. ⁴ Букъѳа кашишлѳдойна Аллагь-лис билІо цІуми йѳва рагьухъаллидойна э^Нкъена, гьолцо асгьабли Иса нигъа гьол-лохъа нилІалсо кьотІи бѳйо. ⁵ Гьоллѳл йилІа рази бахъийо, гьолцол окко нилІал кьотІина бѳйо. ⁶ Гьини вагьли жо тІубази йѳслІо нисона гьолцона йаьже нилІийо. Аьдамла гаьччо кьулаяб маьче мизца зу-къойо гьолцо гьоглохъа Иса нилІал.

2. Пасха ид-водил гьаьдурлъи

⁷ Ййэшла йѳв^Нтобѳш баьбѳ йовагьцасна кьурбаллил лІиле мухоцасна Пасхалис водо кьодо йѳ^Нкьойо. ⁸ Иса Петерлихъана Иоанн-хъана нисойо:

– Мекъена ид-водис кен гьаьдур йовалІо.

⁹ – Нѳд Дул гьули йовал йатІна гей? – лІо нисолло гьолло.

¹⁰ Иса нисойо:

– Шагьарбаъ э^Ндобакѳцо мизол и^Нхьос лъйс билІейна боцІинна э^Нкъецаз гьѳ^Нс су-кІо, гьули э^Нкъейа билІѳъ мижена мекъе.

¹¹ Бета миже билІола бетІергъаллихъа вагъ-
дā ниса: «Муалимли дūхъа нисолло, нāд гей
ид-водиъ Жуна Гъинис асгъаблана нише
бесал къачІази йōйо билІо?» ¹² Гъолцо сукІо
мизол йегалас кьодола билІоъ бекІейа го-
ватойо гъо^Нс йукъо отахи. Вагълиъ йова
миже гъабдурлъи. ¹³ Гъулиъ мокъоль, гъол-
лол Иса нисогъа къацІцІо жо йи^Нхъōйо.
Ид-водис кенна йогъна гъоллōл гувабацІо-
на бечейо.

3. МарчІокІоль бахъийо балъгояб хабар

¹⁴ МарчІокІоль бесалцо мех мокъоль,
Исана чапарлана бесал къē бечейо. Иса
гъоллохъа нисойо:

¹⁵ – Дие букъо гъира гей азаб-акъубалиъ
кези ахъал аъ^Нйдā мизогъой къацІо вагъалІо
ид-водиъ эсал. ¹⁶ СудлІо нисода тІокІаб ми-
зогъой ид-водиъ къацІо эсал Дие рес бахъа-
ъас, Аллагълила Парчагълиъ кІетІо ид-водис
бесийолъи йахъцал.

¹⁷ Бета Иса, гъинолис боцІийо дончана бок-
чина, рец-бакълис доъана богъна, нисойо:

¹⁸ – Гъа^Нъа, бокчина къацІцІола хулІа.
До мизохъа нисос: Аллагълис Парчагълъи
йо^Нкъоцал До желагъа муьгъаттā тІокІаб
кІодас бōйо жа хулІаъас.

¹⁹ Баъбана бокчина, рец-бакълис доъба-на богъна, Гьолцо бувакІинна гьоллол нилІийо:

– Вагъло гей мизол къурбанлъилаъ бече-цас Дие магъо. Дона акІкѡа о^Нкъонна ми-жена вагъдѡ йова.

²⁰ Бета бесна муьгъаттѡ, гъинолис боцІийо дончана бокчина, Иса нисос:

– Вагъдо гей мизоддѡла гиса мегъцас гъе^Н – ицІцІо кьотІилас* гъе^Н. ²¹ Гъуна, гува-бацІона бече! До жейса тушмаллѡхѡа ниц-цас кѡ гей Диела кѡгъой сид истІолийакѡа. ²² Вагълѡ Аьдамлис Оьжо э^Нкъал нуцІос Ал-лагъли аь^Нйдѡжу йегалло гъиногъид, амма гьолцол хилип бахъийѡл балагъ мокъос.

²³ Гьоллѡл муьхобалъийо сидхѡа-гъо^Нсо нисолал: сукІоле гъи^Ндеъ э^Ндо вагъли жо йовал йакІиъ хиял гаьгъийо сукІо гейлѡ нисона.

4. «Бишшун укъо сукІод гей?»

²⁴ Асгъаблѡс бахъна гей даъба: сукІод гъи^Ндеъ э^Ндо бишшун укъо ахъал нуцІослѡ нисона. ²⁵ Иса гьоллохѡа нисойо:

* 22:20 БетІергъаллиъна Гьолцола агълолаъна балѡ бѡйо кьотІи.

– Мажуслāла парчагълā ханлъи йōс, халкъилакъа ханлъи гаьгъийāна бикІзи бōс тІа-лаб-агъаз богъцаса аьдамлалъилаъ. ²⁶ Амма миже гъулā бахъал нуцІаъас. Мизос бишшун укъо эче бишшун итІиноцой, ханлъилаъ жу бикІзи ойо лагъцой ахъ! ²⁷ СукІод гей укъо: раьгъатликъа эскас сукІод, йаги бесцалāл хъуллухъ богъцас сукІод? Гъай-гъай, эскас сукІо гаъад! Гъуна до мизол гъолІоъ хъуллухълил эчена гей.

²⁸ Дил йегабā балагъ-азаблāъ миже Дйгъой къацІо бāхъийо. ²⁹ Диела Або Дил ирслиъ нилІийо Парчагълъи До мизонна ирслиъ йечаннēш. ³⁰ Диела Парчагълиъ Дйгъой истІолийагъа миже бескасна хулІо-касна бāхъца: Гъулāзу тахлāкъана къē бечеш Израиллила наслолас ацІона къона тухумлāл гъоькмова йуьвачІал.

5. «Ми Дйкъас инкар бовас, Симон!»

³¹ – Симон, Симон! Энекзи ахъ! Илбисли гъарзи йōйо, хъибо бох-нахоъос и^нззаъ исийаъийаъцой миже исibaъалІо нисона. ³² Амма До дул доъа-гъари бōйо, дибо божи-иман мукъсан бахъечІе гъихлъальгъа. Къāъ бета Дидой о^нкъоль, динлила иснāсна йакІода йилāбакъола.

³³ – Йа БетІерчІахъаяв! – лІо нисос Петер-ли Исахъа. – До гъаьдураб гей Дѹгъой къа-ціо тІусагъийаъ э^Нкъанна, угъал нуціода угъанна.

³⁴ – Нисос дѹхъа Петер, – лІо нисойо Иса, – хисалдайлил мамали уь^Нъудальол, лъахна инкар бовас Дїкъас, До икъаъаслІо нисона эцас.

6. Иса гъаьдур бахъна бечелІо нисос

³⁵ – Йа окко-месед гаьчІел, йа моьшо-кІи-къаціиццо йоькчечІе, йа гъалальцова ги-йахечІе До Дие чапарлацой мегъна муьгъат-тā мизол нійона къарилъи йахъийоди? – лІо нисолло гьоллохъа Иса.

– Йахъезш, – лІо нисона жаваб нилІийо гьолло.

³⁶ Иса гьоллохъа нисойо:

– Амма же окко гаьгъийā гьулина къаціо йеза, гъиногъидил санаъатлъилал моьшо-кІи-къаціиццона йоькча. Балъаййа гаьччā, къодо лъичІейо чухъа-гужгатна йи^Нсона, балъаййа йовахал санаъат бова. ³⁷ До мизо-хъа нисос: «Гьули такъсирчилъилаъ бикІзи овас», – лІо Дїкъас Тєкликъа чахийо жо тІубази йахъалъльегъна гей. Дїкъас чахийо жо же йахъца.

³⁸ Асгъабла нисолца:

– Йа БетІерчІахъаяв, вагъалІоъ къона балъай гей.

– Оьлилла, – лІо нисойо Иса.

6. Иса авараг Гетсеманияъ

а) Гетсеманияъ гаьгъийо къркьей

³⁹ Бета гъулиъис гисакна, воддиъ э^Нкъе-
цала Зайтун маъкъа э^Нкъейо. Гьолцогъой
муьгъалІ асгъаблана мекъейо. ⁴⁰ Маъкъа
мокъоль, Иса гьоллохъа нисойо:

– Мизос гъаьл бикъелцалаъ, сабру-ягъ
бахъальгъа, доьъа йовагъа.

⁴¹ Йикъейо къало йо^Нкъова манзиллиъ
гьоллодойс атана э^Нкъена, суждалкъана эче-
на, Иса доьъа бовал уь^Нхольийо. ⁴² Гьолцо
нисос зукъойо:

– Йа Дие Або! Дибо амро зогъда, хеллис
гъино Дйдойс атакІа! Амма Дил йатІгъа
гаьъа, Дул йатІгъа йахъала.

⁴³ Гъа^Нсаькъа о^Нкъона, малаикли Гьолцос
йакІо йилІакъолло.

⁴⁴ Вагълиъис йакІиъ гаьгъийа букъа гъаьл-
ейликъа, Гъули къодона тели Аллагълихъа

гъардизи ахъал уь^Нхолъийо. Гьолцоъкъа гугъцас гъад гье^Нйас кІаькІачой мицакъа тІаьлІеш зукъойо.

⁴⁵ Довъана лъикъона, Гъинила чапарладой къаь о^Нкъоль, Исал гьоллѳл пашманлъилахъа буьчабѳхена мийахъос.

⁴⁶ – Суд миже буьчабѳхена? – лѳо нисолца Иса. – Баьгъбаь, мизос гъаьлла йийакъелцалаь, сабруна ягъна бугъечІе гъихлъальгъа, гъари-довъа йовагъа.

*б) Ягъуда баьдѳлѳи, бета Иса
авараг охийолѳи*

⁴⁷ Вагъла гьоллохъа икълашешлаь, тели халкъ къодо мокъойо. Халкъилагъа аь^Нйда зукъойо Исас ацІон къониъис Ягъудалѳо нисоцас гьо^Нсцойс асгъаб. Гъуги баьдѳл Исадой гъи^Нцакийо. ⁴⁸ Иса Ягъудахъа нисойо:

– БаьлІонад ми Аьдамлис Оьжо тушмаллѳл икъал ѳс, – лѳо.

⁴⁹ Гъулиъ йахъцас жо йегаль, сѳ^Н гаьгъийа асгъабла Исахъа нисос:

– Йа БетІерчІахъаяв! Балъайя йагъалди?

⁵⁰ Асгъаблаь э^Ндо гаьгъийа сидцойсола балъай йакъенна сид укъа кашишила лагълис кІетІакъас аь^Нгъа йуьчІийо.

⁵¹ – Оълилла, беченувацІ! – лІо нисойо гьоллохъа, кьодо кона ѓе^Нхенна, Иса лагъ-лис аь^Нгъа сагъ йойо.

⁵² Гьингьой муьгьалІ мокьовā букъā ка-шишлāхъана, Аллагълис билІо цІуми йогъна бечейā рагъухъаллāхъана, гъаькимлāхъана Иса нисойо:

– Балъаййана хечлана йāкъона, къачагъ охал гүваъцой, мокьона гей миже До охал.
⁵³ Воддиъ До мизогьой, къацІо Аллагълила билІоъ ахъца зукъоваъ, гьугиъ, миже Дил кō ѓе^Нхелеэш. Амма же мизос саъат мокьона гей, нишела ханлъилас мех* мокьона гей.

7. Петерли Иса авараг икъаъаслІо нисона инкар бōйо

⁵⁴ Охна эжейо гьолло Иса укъа кашиш-лила билІоъ. Гьоллогьой муьгьалІ гъаьте-эчена э^Нкъеш зукъойо Петерна. ⁵⁵ Гьогцо кашишлила билІола бежиъ йалІодā, цІона ѓекІенна, гьоггōл сō^Н къē бечейо. Гьоллоъ алІо цІодой Петерна къē эчейо. ⁵⁶ Сид гъа-рабашли цІодой шеблаъ Петер эгаль, ахо гьогцохъана гийачІена нисос:

* 22:53 Илбислис ханлъилІо нисойо маъна гей.

– Вагъли сукІона Гьокцогъой къацІо зукъойо.

⁵⁷ Амма Петерли инкар бѡйо:

– Йе аьдам, дил Гьули икъаьас.

⁵⁸ Гьольльогъа муьгъаттѡ тели мех ме-
къечІе бацо сукІона нисос:

– Мина гьоглос сукІо гей, – лІо нисона.

Петерли жаваб нилІийо:

– Гаьъа гьалмагъ.

⁵⁹ Саьатлъийо заман мекъель, бацосола
сукІона йилІа йакІона йо^нкъонна нисос:

– БитІараб гей, вагъди сукІо Гьокцо-
гъой къацІо зукъойо. Гьулина Галилеяли-
ьис ахъца.

Амма Петерли нисос:

⁶⁰ – Энекси ахъ, ми сийод йекІца, гьал-
магъ!

Гьолцо вагъли нисослаъ, мамали уь^ньу-
дѡл муьхолъийо. ⁶¹ Кьоддѡс Иса, кІаьйна
уь^нхона, Петерлихъа говацІойо. Петерлил
йакІкъа йо^нкъойо Кьоддѡла Иса гьинхъа
нисовѡ йаьжбо: «Хиссалдайлил мамали
уь^ньудальол, ми лъахна Дѡкъас инкар бѡс-
лІо». ⁶² Гьулиьисна гисакна, Петер йилІа
ийѡйо.

Иса диваллил аь^Нйда эчелло

⁶³ Иса охийа аьдамла Гьули, нуькучІна огьна, аькъелло. ⁶⁴ Гьаьйдана йи^Нйациона гьолло нисолца зукьойо:

– Авараг зогьда, льод Дул бакьелло йикьелалІо нисона.

⁶⁵ Бадина лади инжитаб жо йекІийо гьолло Исахъа.

⁶⁶ Хискьакльо, Ягьудиялис гьаькимлана, букъа кашишлана, динияб аьлимлана гьулиъ къацІобакийо, бета Иса эжейо бишшун къоддас диван богьцала мицаъ.

⁶⁷ Гьогло нисолло:

– Ми Масигьди гей? Ниса илохъа.

– Нагагь До нисода, миже боьважаъаш.

⁶⁸ До мизол суал нилІа, гьольльонна миже жаваб Гьинил нилІаъас. ⁶⁹ Амма желагъа муьгъатта Аьдамлис Оьжо Кьудратаб Аллагьлила кІетІакьала рахълиьда къе эчена ахъца.

⁷⁰ КъацІцІола нисолло:

– Вагьла зогьда, Ми Аллагьлис Оьжод гей?

– Миже нисос До гей, – лІо нисона жаваб нилІийо Иса.

⁷¹ Гьолло нисойо:

– Бадина нійо нуьълъид йатІна илол. Гьолцола сикІаькъа гиса гуйо илол тухьал йатІийо жо.

23 кьаьм

Иса авараг Пилатдой аь^Нйда эчелца

1. Гьисаб-суал

¹ Гьоллѳл кьацІцІа баьгьбаьна, Исана эжена, Пилатдой мекьейо. ² Гьулиь гьодло аьйиб чІези бѳйо Исакьа:

– Илос халкъ кьѳсси богьцас, кьайсар-лил гьаькъ нилІал мейаьцас, гьулазу жу Масигь-Пача гейло нисоцас и^Нхьойо илол Гьули.

³ Пилати Исакьа нисолло:

– Мид гей жугьутІаллис Пача?

Иса жаваб бѳйо:

– Ми вагьла нисос.

⁴ Бета Пилати букьа кашишлахъана халкъилахъана нисойо:

– Вагьацо сукІокьа гулал аьйиб дил ми-хъезш.

⁵ Амма гьолло кьѳдос больечІе Гьолцо-къас тели арзѳ йагьѳс зувакьойо:

– Галилеялиѣкъѣ уѣ^нхольна, гьоліоѣ
о^нкъоцал къаціціо Ягьудиялис халкъ Гьол-
цо жо малъзи йогъна мекъса бадагьударлил
мѣш, – ліо нисона.

2. Пилатдойс Гьероддой

⁶Галилеялис цā^Н йагьоль, Пилати нисолло:

– Гъули Галилеялиъисди гей?

7 Гьєродила вилаятлис* сукіо гейліо гьол-
ло нисоль, вагьалло водлѧь Иєрусалимлиѧь
о^нкьона зукьова Гьєроддой э^нйо Пилати
Иса. 8 Иса эгѧйоназу, Гьєрод йилла рази
ахьийо. Гьєхзу гьолцол Иса эгѧл атІна зу-
кьойо, судліо нисода Гьолцос тели хабарла
тувахьна зувакьойо; гьулѧзу гьо^нсдана кара-
матлыи гьинил йегѧллакьа Гьєродис кулна
зукьойо. 9 Гьєроди тели суалла нийалІийо
Исал, амма Гьолцо гьо^нсна жаваб нилІєэш.
10 Гьулиѧь гаьгьийѧь букьѧь кашишлѧна ди-
ниябла аьлимлѧна кьодос болъєчІє ба-
тІи-батІиябла аьйибла Гьолцокьа гувалца
зувакьойо. 11 Гьєродина, гьолцола рагьу-
хьаллѧна Иса нуькучІна гьаькьирна огьна,
чІугьараб кьодо льицІона льичІєнна кьѧь

* 23:7 Виляят – улка (провинция, область).

¹⁹ Барабба зукьона гей шагьарбаш халкъна бадагьударлил баьгьбаьинна, аьдамна икъена, хьарандийаь тІотІийо сукІо.

²⁰ Иса э^Нйал атІна бетана халкъилахъа икълашейо Пилат. ²¹ Амма аьдамла илІе-лабāйо:

– Хьанчлилѣ охолал э^Нйа Гьули! Хьанчлилѣ охолал Гьули!

²² Лъахнасна Пилати нисойо гьоллохъа:

– Гьолцо йōйо кешлъи сийод гей? Дил михъеэш Гьули икъал оьлло аьйиб, лІу-ручІбадна аькъенна э^Нйал.

²³ Амма гьолло котакаб букьо аьгьи-гьур баьгьиѣилло Иса хьанчлилѣ охолал нуцІос-лІо нисона. Гьоллос илІелабāлъи йижейо. Йукъа аьгьи-гьурлихъа Пилатис гьокІна тухъас зукьойо. ²⁴ Ахирна Пилати гьоькмо бōйо гьоглос гьари тІубази бовал. ²⁵ Аьдам-лāла гьарилакъа Пилати, халкъна баьгьба-ѣинна, аьдамна икъена э^Ндо тІотІийо сукІо гиса э^Нйо, Исана гьоглола каь нилІийо.

*Иса авараг хьанчлилѣ охолло,
бета шунаѣ и^Нхьолло*

1. Голгофалиѣ хьанчли йагьойо гьино

²⁶ Вагьлиѣис Иса икъал эжеллислаѣ, ми-цальцо гогьцас Киринейлиѣис гьо^Нс Симон-

лѠ нисоцас сукѠ данде кези ахъийо. Гьол-
цо сукѠод Иса охолцас хъанч Гьолцогъой
муьгъалѠ бежеллийо. ²⁷ Тели халкъ зукъойо
Исагъой муьгъалѠ мекъеца, вагълазу тели
ийѠнна бийабана чѠачѠадабана мекъеш зу-
къойо. ²⁸ Ийолѧхъана гоцѠохъна Иса нисойо:

– Йѧ Иерусалимлис ийѠл! Миже Дѧгъа
бийабѧкъа! Миже бийабѧ мизогъана мизо-
ла кьовагъана. ²⁹ «Къова бѧхъаъцасна нене
нилѠна хѧгъолеэшна ийѠл гьардарабла гаъ-
ъад», – лѠ миже нисоцас водбо кьодо йо^Н-
вакъас. ³⁰ Кьодо йейакна иле лѠийо мийа-
хъолалѠ нисона мѧьдѧхъа гьардизи бахъас
миже вагъальлъо мехлаъ, йувагъона бизо-
вѧна лѠийо мийахъолалѠ нисас. ³¹ Ничдийа
хѠхил вагъаддийо жо йѠслаъ, хѠхъова
хѠхил сийоле йовал!

2. Иса авараг хъанчлилъ охолло

³² Гьолцогъой къацѠо бийакъал бейажел-
лис зукъойо кьона къачагъна. ³³ «КѠоцолѠо»
нисова мицадой мокъоль, Иса хъанчлилъ
охолло, гьо^Нсцойс къачагъ Исадой клетѠа-
къала рахълиъдѧ, бадисо о^Нкъакъала рахъ-
лиъдѧ бовахолло. ³⁴ Иса нисойо:

– Йѧ Дие Або! Гьоллокъа кьодос тилѠки
Ми. Гьиде йогъцас жо гьоллол йикъечѠе гей.

Цулана йагьона рагьухьаллā Исас лъи-
цѳо гьидеъ э^Н до йитѳас зукьойо.

³⁵ Тели халкъ зукьойо гувабацѳона бечена.
Гьули гьаькъирна огьна, гьаькимлā нисос
зукьойо:

– Баддѳл хьосар бѳйо. Аллагьли кьодос
гьакѳна э^Нйо Масигь зогьда, жузу хьосар
ахьала.

³⁶ Рагьухьаллāна гьаькъир ѳс зукьойо
Гьули. Гьолцол чачало гьинона гуцѳонна
нисос зукьойо:

³⁷ – Ми жугьутѳаллис Пача зогьда, Мизу
Ми хьосар ова! – лѳо нисона.

³⁸ «Вагьди жугьутѳаллис Пача», – лѳо ни-
сона грек, рум, жугьутѳи мицагьад чахийо
къокькъо зукьойо Гьолцола къаьмкъа кьодо
гьеммалъ йохонна.

3. Кьон къачагьлис бикълабашейолъи

³⁹ Хьанчлилъ охолло гьѳ^Нсцойс къачагь
Иса инжит-гьаькъирна огьна Гьолцохьа
илѳелайо:

– Ми Масигьйаъ гей? Гьа^Н, Мина илена
хьосар бовагьа!

⁴⁰ Бацосола къачагьли гьѳкѳи йѳиллийо:

– Ми Аллагьлихьадана гьицѳаьасди? Дун-
на вагьаллозу къадар беганна гей. ⁴¹ Илол

иле йѡвакѡа тамбигь богьцас гей, амма Гьолцо гьѡшшона кешлѣи йогьна гаѡа.

⁴² Бета гьолцо нисойо:

– Йѡ Иса, Ми Пачалѣилаѡ о^нкьоль, дона акІкѡа о^нкьола!

⁴³ – Гѡакькѡаб гейлѡ нисос До дѡхѡа: жей-сазу ми Дѣгьѡй аржамлиѡ кѡацѡ ахѡца, – лѡ нисона гьолцол Иса жаваб нилѣийо.

4. Иса авараглис ругь багьос

⁴⁴ Лѡбакѡас анта зукьѡйѡ вагьалѡлѡ замаллиѡ. Кѡацѡ дуниял колѣлѣина, саѡат лѡана тѡубази бахѡцал вагьлѡ дуниял бечейо.

⁴⁵ Бохѡна бохийѡ, хирияб билѡѡос пардав кьоддѡкѡа лѣийокцал йѡхейо. ⁴⁶ Вагьлиѡис Иса гьѡ^нс йукьѡ гьокІна йагьѡна илѣейо:

– Йѡ Дие Або! Дибѡла кѡѡ ницца До дие ругь!

Вагьлѡ нисона муьгѡаттѡ, Гьолцѡла ма-гьѡѡос ругь больѡйѡ.

⁴⁷ Вагьли йегѡйѡ рагьухѡаллѡла нусилбетѣрли Аллагьлил рецна богьна нисос:

– Зукѡанна Гьули ритѡухѡаб сукѡ зукьѡна гей.

⁴⁸ Вагьалѡлѡ кѡацѡѡлахѡа гувабацѡал мокьѡѡа аѡлам гьулиѡ йахѡийѡ жо йегаль,

гъейодана зувакІна, гъулиъис къаъ билІо-
вāгъа мекъейо. ⁴⁹Иса икъецаc аьдамлана
Галилеялиъис Гьолцогъой гъува ийōнна ата-
дākъа гувабацІона гъулиъ бечейо.

5. Иса авараг шунаъ и^Нхъолло

⁵⁰⁻⁵¹ Гъулиъ о^Нкъойо Ягъудиялиъ Арима-
тейа шагъарбаъаш УсуплІо нисоцаc къод-
дāла диваллис гъо^Нс кІетІо ритІухъаб сукІо.
Гьолцос кул зукъойо Аллагълис Парчагълъи
йо^Нкъаллакъа. Иса икъал бōва гъоъкмола-
къана, гъогло бōва дивалликъана, гъули ра-
зияб зукъеэш. ⁵²Пилатдойна э^Нкъена, Усупи
гъарзи йōйо Исас жаназа шунаъ михъолал
нилІалІо нисона. ⁵³Изно михъоль, Исас жа-
наза хъанчлилъцона багъона, къодо мусрона
кІаьйлІонна, гулца шедиъ йоъ^НтІона йōва
жегун гъо^НссукІона ихъолеэшла шунаъ.

⁵⁴Вагъли водо зукъойо мужмар вoдо, бе-
та шамат водис нишеш мех къодо мокъойо.
⁵⁵Галилеялиъис Исагъой гъува ийōнна мекъейо
Усупгъой къацІо шунакъа, гьоллол Исас шу-
нана Гьолцос шунаъ гулцаc жаназана бегāйо.
⁵⁶Къаъ билІогъа мокъоль, Исала жаназалил
йе^Нхелал нийā маьгъ гаьгъийо йе^Нлъ гъаь-
дур йōйо. Мусала къанонликъа шамат водийъ
гьоллōл сийона йойчІе билІогъа бечейо.

24 кѡам

Иса авараг шунаѡ и^Нхѡаѡас

¹ Анкѡилала аѡ^Нйдѡла водиѡ* хискѡа кѡайкѡа, гѡиде гѡаѡдур йѡйо кІетІо маѡгѡ гаѡгѡийо йе^Нльна йежена, ийѡл мекѡейо шунакѡа. ² Амма гѡоллол шунакѡа аѡ^Нйдѡ йецока гулло кѡало атакІна йи^Нхѡос. ³ Э^Ндобаклѡ, Кѡоддѡла Исас жаназа шунаѡ ми-хѡаѡас. ⁴ Гѡольлѡокѡа гѡикмат бахѡна сийо-на йовал йикѡечІе гѡихбалѡоваѡ, гѡоллодой аѡ^Нйдѡ эчеш кІетІо бабалo лѡицІо лѡичІейѡ кѡона сукІо. ⁵ ГѡийабачІейахѡа ийѡл лІийодѡ муѡвакѡона бечена бегабалѡ, гѡогло кѡони-на гѡоллохѡа нисойо:

⁶ – Суд миже бувагѡоваѡ э^Ндо ЧІагояб СукІо и^Нзца? Гѡули гѡолІоѡ гаѡѡа. Гѡули угѡоваѡас кѡѡѡ чІаго ахѡна. ЙакІкѡа йо^Н-кѡола Галилеялиѡ гаѡгѡийа мехлаѡ, Гѡокцо мизохѡа нисойо жо: ⁷ Аѡдамлис Оѡжо гѡакѡ-кѡа мунагѡлѡд бовацІийа аѡдамлѡхѡа ницца, бета гѡолло Гѡули хѡанчлилѡ охонна икѡеш, амма угѡона лѡанасла водиѡ Гѡули кѡѡѡ чІаго ахѡца, – лІо.

* 24:1 ГѡатІан (базай) водиѡ.

⁸ Гьолло ийолал Иса нисойо жо йакІкъа йо^Нкъойо. ⁹ Шунакъаш мокьоль, ийолā вагь-ло хабар мейо Исала ацІон сид гьицала чапарлихъана, гьулāзу бадло асгьаблāхъана. ¹⁰ Гьоллōл ийōл зувакьойо Мариян Магдаленана, Иоаннана, Якъубис ийо Мариянна, баддōнна. Ийолā чапарлāхъа вагьлозу хабар мейо. ¹¹ Асгьаблал гицІийо вагьгāзу хабар гейлІона. Ийолāла хабалликъа гьоллōл боьважеэш. ¹² Амма вагьаллиъисзу Петер аьгьиъна чІалликъа э^Нкъейо шунакъа. Э^Ндо-на э^Нкъена говацІоль, мусровāъ бади сийона жо йи^Нхъеэш гьулиъ. Гьикматна ахъна гьули къāъ билІогъа э^Нкъейо.

*Угьоваъас ахъийо Иса авараг
гьид кези ахъца*

¹³ Вагьальльозу водиъ Исас къона асгьаб Иерусалимлиъис ацІона гьо^Нс километра-лаъ цІиходā гаьгьийа Эммауслō нисоцала аьлІаъ э^Нкъеш зукьойо. ¹⁴ КъацІцІо йахъийа жойлала хабарликъа зукьойо гьоллōл. ¹⁵ Йахъийо-йе^Нкъейо жо йакІкъа йо^Нкъонна бикълабашена мекъешлаъ, Жу Иса гьол-лодойна гьицакна къацІо э^Нкъеш зукьойо. ¹⁶ Амма Аллагъли Иса гьоллол икъал ойэш,

гьоллола гъаьйдаьгъа аь^Нйда пардав гунна зукъойо. ¹⁷ Иса гьоллохъа нисолло:

– Лъинисди миже бикълабашеш гъино-гъид мекъешлаъ?

¹⁸ Пашманлъилаъ мекъецагъ гьоллол беченувацIийо. Сидцойла, Клеопа ца^Н гаьгъийа-сола, Исахъа нисойо:

– ВагъалIo водлаъ Иерусалимлиъ мокъоваъ э^Ндо йахъийо жо йикъаъцагъ гъо^Нс мийаъ зогъассаъ.

¹⁹ – Лъинис? – лIo нисолло Иса.

– Назаретлила Исас, – лIo нисона жаваб нилIийо гьолло, – Гъули зукъойо Аллагъ-лидойна къацIцIo халкъиладойна аь^Нйда Гъини богъцала гъаьлтIиласна, йаьжисна, гъаьлкIолъи гаьгъийо аварагъ. ²⁰ Амма букъа кашишлāна гъаькимлāна Гъули икъал гъоькмо бойиллийо, Гъули хъанчлилъ охолло. ²¹ Вай, илол гицIна зукъойо Вагъаллисо Израиллис халкъ хъосар бовал о^Нкъойо сукIo гейлIона. Гъуна жейса лъанас водо гей вагъли жо йахънас. ²² Амма гъо^Нсо илла ийолā мейа хабарли иле гъикмат бōйо. Жейса хискъа къайкъа мекъена зукъойо гьоллол Исала шунакъа. ²³ Гъогцос жаназа-на михъечIе, Гъуги чIаго гейлIo нисоцагъ малаикла бегабайолIo нисона ийол къаь

мокъойо. ²⁴ Илоъ э^Ндос саддѡл шунакъа мекъель, ийолѧ нисогъа шунаъ жу Иса и^Нхъезш.

²⁵ Вагълиъис Иса гьоллохъа нисойо:

– Авараглѧ аь^Нйдажу нисоцала жойлакъа боъважал баъкъкъаъ йакІис аьгъмакъабла аьдамла гей миже! ²⁶ Масигъли азаб-акъуба гъекези бовал нуцІаъасди, вагълѧйаъ гъули Гъинила букъа рецлиъ о^Нкъал нуцІос зукъойо.

²⁷ Мусакъалакъа уьхолъна къацІцІѧ авараглана бакІкъа мокъонна, гъинис ТІеклѧкъа чахийо шинаб жо биджи йѡйо Иса гьоллол.

²⁸ Гъа^Нже гьоллѡл гьоглѡ аьлІадой мокъаллъейо. Иса эченоцІечІе э^Нкъекас хел бѡйо. ²⁹ Бохъна боъца, нишеш мехна мокъос, илогъой къацІо вагъалѡ аьлІаъ нише эчелѡ нисона гъарзи йѡйо Гьолцохъа. Рази ахъна Исана гьоллогъой нише эцал билѡъ э^Ндокийо. ³⁰ Бесал муьхобалъльо, Иса рец-бакълис доъана богъна, букІинна баъба нилІийо гьоллохъа. ³¹ Вагълиъис аь^Нйдаш пардавна йольона гьоллос гъаьйда йе^Нйагъейо – Иса гаьгъийолъи икъейо. Амма Иса гьоллол эгѧъкас ахъийо. ³² Бета гьолло сидхъа-гъо^Нсо нисойо:

– Гъиногъид гъидехъа икълашена, Тiekлā-къа гаьгъийо хабар биджи бōслаъ, цюьцой зукъеэши илос йакIода?

³³ Вагъаллиъисзу гъоллōл баьгъбаъна Иерусалимлиъ къāъ мекъейо. Шагъарбаъ э^Ндобаклъо, гъоллол мийахъойо ацIона гъо^Нс чапарна, гъулāзу баддōл аьдамлана асгъаблана. ³⁴ Гъодло гъоллохъа нисойо: унго-салда Къоддāс Иса чIаго ахъна гей. Шунаъас аьгъийийо Гъули Симонил эгана. ³⁵ Гъодлона мейо гъидегъой къацIо Иса гъид зукъовас, бесцалаъ баьба букIиллъо, гъидел Гъули Иса гаьгъийолъи икъейас хабар.

*АцIон сид чапарлидойна асгъаблāдойна
аь^Нйдā о^Нкъос*

³⁶ Вагълā гъоллōл бикълабашешлаъ, салам алайкумIо нисона Иса гъоллокъа къодо о^Нкъойо. ³⁷ ГъийабачIена, гъаьл хуьжона гъихбалъовā гъодлол гицIийо вагъло бувагъовāс ругъ зогъцалIо гъидедой мокъона.

³⁸ Иса гъоллохъа нисойо:

– Суд миже гъийабачIена? Суд мизола йакIиъ шаклъи гей? ³⁹ ГуцIобахъ Дйхъа: гъуна Дие кōда, гъуна Дие хаьбā. До мизодой аь^Нйдā эцокъа эчена гей. Кō йе^Нхенна

хал бова мижезу. Бувагъовѧла ругълис лІоѡ^Н-
вѧна лІоѡ^Нвѧкъа хона йахъцади? Диела ма-
гъокъа вагъли гей.

⁴⁰ Вагълѧна нисона, Иса гъинис кѡдана
хаѡбѧна гъоллол йегабалло. ⁴¹ Йилѧа разина
гъайран-гъикматна бахъйяхъа, боъваже-
чІецойна бегабалъ, Иса бесал кен гаъѡадлІо
нисолло. ⁴² Гъолло Исахъа нилІийо зизѧ би-
салис роъил. ⁴³ Гъоллодой аѡ^Нйдѧкъа бок-
чина муъхъийо Гъинил нилІийо биса.

Ахирияб букъо тІадкъай

⁴⁴ Бета Иса гъоллохъа нисойо:

– Гъуна, До гъоггѡлъо нисова йаѡжлѧш
маъна: Мусалана бадло авараглѧла ТІеклѧ-
къана, забурлѧкъана Дйкъас чахийо шинаб
жо йахъал нуцІослІо нисона. ⁴⁵ Гъолцо гъол-
лос гъаѡйда йе^Нйагъелло ТІекликъа чахийо
жо гъоллол биджи йахъальгъа. ⁴⁶ Бетана
Гъолцо нисойо гъоллохъа:

– ТІекликъа чахна гей Масигъ азаб-акъуба
нилІна угъос, угъона лъанасла водиъ шу-
наъаш аѡгъиъца. ⁴⁷ Иерусалимликъѧ муъхо-
балъна къацІцІола халкъилахъа, мунагъла
чурзи йовагъцала Аллагълилѧдѧ муъвахо-
лІо, гъолцола цѧ^Нйакъа гъулина нисослІо.

⁴⁸ Мизол вагъли къацІцІо гъаькъкъаб гаьгъи-
йолъи йегайо, миже нуьъла гей. ⁴⁹ Диеда Або
къодо йохийо жо гъаколъечІе До мизодой
йе^Нш. Вагъли гъаьлкІолъи къоддас мизодой
йо^Нкъоцал, Иерусалим шагъарбаъ бече.

Иса авараг гъа^Нсаъ э^Нкъейо

⁵⁰ Иса гьоллѳл Иерусалимлиъис Бетани-
йалиъикцал бейажейо. Кѳдана гувацІонна
баркат гулалІо нисойо. ⁵¹ Иса гьоллол доь-
ъана богъна, Гьули гъаьтеэчена гъа^Нсаъ
э^Нкъена оьийо. ⁵² Гьоллѳл сикІо лийода
бейакийо, бета йукъа разилъилакъа Иеруса-
лимлиъ мекъейо. ⁵³ Гьольльогъа муьгъаттѳ
гьоллѳл Аллагълила билІоъ бечейо, Аллагъ-
лил воддиъ тасбигъна йогъна. Амин!